

**АНЧВА ЙГІАХЧАХРА
АЖВАБЫЖЬБЗИ**

АНЧВА ЙГІАХЧАХРА АЖВАБЫЖЪБЗИ

**АжвабыжьбзихІвагІв
ЛукІа йшгІайхІвауа**

Черкесск,
2013

•

Перевод Евангелия от Луки
на абазинский язык

Издание не предназначается для продажи

*Эта книга познакомит вас
с удивительной Личностью,
который приведет вас к спасению
и вечной жизни с Богом.*

1 Йапхъахауа ахъа

1 ХІара хІпны йакІвшаз агІаншараква ргІахІвахра аныргІалра щардагІвы аналагазара, 2 зыла йабата Ажва азынхагІвчва апхъадза хІара йшгІахІархІвыз апшта, – 3 зымгІва бзита ахъа уалагата йансырхъвых амщтахъ саргъи ауаса йщаквсыргылтІ: йащтацауата уара йузызгІвныс, хІатыр зкву Феофил, 4 узыхъвындыргылыз апхъарадырра ащапІы абагъара йузыдырныс.

5 ИудейргІа рпатшахІ Ирод йзаман даъан пщагІвыкІ¹ – Авиевгвып дрыуата Захарийа – хІва йыхъызта, ауи йтагвжвагъи АаронргІа рткъвым дауан, Ельизабет – хІва лыхъзын. 6 АгІвыджъгъи ауат Анчва йпахъ йрейшан, ХІыхвитыгІв йщаквыргылраква йырхъымпауа. 7 Ауат саби дгърымамызд, йауа ухІварыквын Ельизабет дпхІвысмхъан, йаргъи агІвыджъгъи наскІахъан.

8 Зны, ауи йкъазу гІадзата Анчва йпахъ йкъврлыккъв анихуз, 9 апщагІвчва йшырцІасу апш, йчІвы гІатыцІын, ХІыхвитыгІв йныхІварта днашылта хъщфгІвыпщдза анибылуаз, 10 анахъанат аугІа зымгІвагъи агваны йгыла Анчва

¹ ПщагІвы — священник.

йанишпапхьадзуз, – 11 дгІаншатІ ауи йпахь ХІы-
хвитыгІв ймальяикъ, акъвырманыхъа хьщфы-
гІвпщдза зыквырбылуа агъьмала дгыла. 12 Ауи
дызбаз Захарийа дъанквынхатІ, шваракІгъи
гІайыжвылтІ. 13 Ауаса амальяикъ ауи йгІай-
айхІвтІ: уымшван, Захарийа, ухІва Анчва йгІатІ,
утагвжва Елизабет па дуызгІалриауаштІ, хъы-
тагъи йыхъуцІуштІ ауи: Иоанн; 14 уаргъи йуыз-
гІайуаштІ гвыргъьари къахври, щардагІвгъи ауи
ййра йайгвыргъьуштІ; 15 йауа ухІварыквын ауи
дхІаракІхуштІ ХІыхвитыгІв йпахь; йгъйыжвуа-
шым чагІыргъи гІвадзгъи, мгва дштумцагъи
Дыхв Шйыхла² дгІатырчвгІахуштІ; 16 Израиль
рпачва йрыуата щардагІвгъи РыхвитыгІв Рын-
чва йахъыла рхъа найырхуштІ; 17 йаргъи Ауи
йпахь дгІагылуаштІ Ильйа *йгви* йымчи йыма-
та, абачва ргвы апачва йрзыгІахънйырхІвых-
рныс, амдзыргІвчвагъи абзирархІвагІвчва
рхъвыцца ритныс, аугІагъи ХІыхвитыгІв йпахь
йазыхІазырта йнайыргылныс. 18 Захарийагъи
амальяикъ йайхІвтІ: сара ауи шпаздыруаш?
Ауаса сара сажвыпІ, стагвжвагъи днаскІахъапІ.
19 Амальяикъ ауи йгІайайхІвтІ: сара Гавриил
сакІвпІ, Анчва йпашвхІа йгылу, йгъи сгІауцтпІ
упны агвыргъьара йуызхІвуш уасхІвныс; 20 йгъи
абар, уара угъчважвушым, учважванысгъи
гъуылшушым ауи аныншуш амщдза – сажваква
йаназаману йниуаш йъарызхъауымцІаз ахъаз-
ла. 21 АугІагъи, агваны йгылаз, Захарийа йызп-
шуан йгъи джъарщун ауи аныхІварта апны ауаса
дызкъваз. 22 ДангІаджвылцІхгъи ауат ауи

² *Дыхв Шйых* – Дух Святой, Дух Божий

дгъзырмачважвузтІ; даргъи йгІаргвынгІвытІ
аныхІварта апны ауи мбачІвыкІ шибаз; йаргъи
ауат дыргалан дызларгвынгІвуаз, дшІамчва-
жватагъи дгІанхун. 23 Йгъи йаъан: йкъвыр-
лыкъвъхарауысмшква аналга, йпны дцахтІ.
24 Ауат амшква рымщтахъ лчва далашватІ
Ельизабет – ауи йтагвжва, хвымызкІгъи
тщІалкІуан зымгІва рпны, арасагъи лхІвун: 25
сйыршІыйатІ ХІыхвитыгІв артамшква, Йара
йанитахъыз сгІацІигарныс аугІа ртшпыхІва.

26 Йцбахуз амыз Анчва йпныла дгІащтихатІ
амальяикъ Гавриил Назарет – хІва йзпхъуз Ага-
льильейшта акъала, 27 атпхІа лпны — Йосиф
йзырхІвайыз, Давид йгІвната йауаз, атпхІа
йлыхъзын: *Марийа*. 28 Йгъи днашылын амаль-
аикъ ауи лпны йхІватІ: бгвыргъа, Анчва йлпха
зауыз! ХІыхвитыгІв Бара дбыщпІ! 29 Ларгъи ауи
данылба, йхІвазгъи анылгІа дшватІ, йажваква
рмагІынгъи дазхъвыцуа далагатІ. 30 Амальяикъ-
гъи йлайхІвтІ ауи: бымшван Марийа, бара Ан-
чва йбзира баутІ; 31 Йгъи абар, бчва далашвуштІ,
Пагъи дбауаштІ, хъзытагъи йыхъбцІуштІ Ауи:
Иисус. 32 Ауи швабыжта дхІаракІхуштІ, хъзы-
тагъи йауаштІ: *ЗымгІвирайхІу Йпа*; йыйтуаштІ
Ауи ХІыхвитыгІв Анчва йаба Давид йтахта,
33 Йаков йтдзы апынгъи паштахІра нкъвигуштІ
анцІрала, *ЙпаштахІрагъи* йгъамазлушым
цІхъва. 34 Марийагъи амальяикъ йалхІвтІ: ауи
шпацуш – сара схъацІа данзымдыруа? 35 Ама-
льяикъ джъауапта йлыттІ Ауи: Адыхв Шйых
дгІабхъылуаштІ, *ЗымгІвирайхІу* йымчгъи бгІат-
наркІкІуштІ; абарауи ахъазлагъи ййуа Ашйых-
гъи Анчва Йпа йыхъызхуштІ. 36 Йгъи абар,

Ельизабет, бара бткъвым йау, гIари дызмауашта ззырхIвуз, лажвынтахъа ахъшара лчва далашватI, ларгьи цымызкI лхъыцIитI, 37 ауаса Анчва йажвакIгьи мчымхъата йгьIанхум. 38 Йгьи йалхIвтI Марийа амальаикъ: дабар — ХIыхвитыгIв йчрын; йшухIваз апш Сара йсызнийыргIатI. Йгьи дгIалкъвыцIхтI ауи амальаикъ.

39 Щарда йналымгхуа, Марийа ауат амшква рагIан тшадылгалын, дгвжважвауа дцатI ащхъакъраль, Иуда йыкъала, 40 Захарийа йтыдзгьи днашылтI, Ельизабетгьи гвахъвата дылпылтI.

41 Ельизабет Марийа лпылрагвахъва анылгIа, лымгва йтаз асаби тшгIайрыцIстI; Ельизабетгьи Дыхв Шйыхла дгIатырчвгIахатI, 42 йгьи дгIацIрын йылхIватI быжьдула: атагвжвакварпны Бара йбаутI Анчва йбзира, Анчва йбзира йымапI Бара бымгва йтугьи! 43 Йгьи йышпасызгIацI ари сара, СыхвитыгIв Йан сара дышпасызгIай? 44 Ауаса Бара бпылрагвахъва абжьи сара слымхIа йантыгIа, гвыргъбахъвыта тширыцIстI асаби сымгва йту, 45 насыпдулагьи дырчвыпI ЙхъазцIаз, йшнийуаш йгIа-лахIвхаз ХIыхвитыгIв йылзихIваз. 46 Йгьи йлхIватI Марийа: *ДартшхъвитI Сара спсы СыхвитыгIв,*

47 *Сгегьи гIатгвыргъзъгIатI Анчва йыхъаз — Сара СгIахчахыгIв;*

48 *Йара йчрын лтшырхвыцра йыла йшгIацтIнах; ауаса ужвы уалагата насып ду зыму — хIва йсзырхIвуштI Сара абанпараквазымгIа;*

49 *ЗымгIвайрайхIу джьащяхъвадура*

йъасызыршыаз ахъаз, йалкІгІапІ Йара
йыхъызгы;

50 Йылпхагы рыцитІ Йара йчшвауа абан-
параква рабанпараква;

51 ЙдйырбатІ йжъышв амч; тшзырнагъуз
ргвахъвыцраквала йахъипсатІ;

52 Амчхъаква атахтаква йгІаркІнихын,
зхъа ззынаркъвуаз щтІухтІ;

53 Йымлащийуаз бзирала йгІатйырчв-
гІатІ, тшзырбайузгы закІгы рымамкІва
йауищтхтІ;

54 ДйызгІайтІ дицхърагІарныс йыдикІылыз
Израиль – Йара йычкІвын, агвчІагІвра гІай-
гвалайыршвахын;

55 ХІара хІабачва Йара йшгІарайхІвыз апш
– Авраам йзичпаз йгвчІагІвра, ауи йыжвлагы
анцІрала...

56 Длыцын Марийа ауи хымызкІ раъара,
уадыргІвана лпны дцахтІ.

57 Елизабетгы лхъагІа надзан па длаутІ,
58 йгы дыргІатІ ауи лыгвлачви лзаъачви,
ХІыхвитыгІв йгвчІагІвра шлызйырдууыз, йгы
лыцгвыргъун. 59 Йгы йаъан: йагІмышкІхуз
асаби йызгІайтІ пЫтІачвапкъра, йыхъыр-
цІарнысгы йртахъын йаба йыхъыз, *Захарийа*.
60 Ауаса ауи асаби йан йылхІватІ: мамо, *Иоанн*
йыхъызхаргІатІ. 61 Ларгы йлархІвтІ: бткъвым
апны заджвгы дгыгъам ауи апш хъзы йымата;
62 дыргала йабагы йцІгІун – хъзыта асаби
йыхъицІарныс йтахъхарызла. 63 Ауи гъвы-
чкІвынкІ гІадирахвын ауаъапны йгІвытІ:
*Иоанн*І ауи йыхъызхуш. ЗымгІвагы йджъар-
щатІ. 64 Йарауи асахІатгы йпыккквгагы йыбыз-
гы гІахвитхатІ, йгы дчважвун ауи Анчва

дйызхІвахІвуа. 65 Ргъагъара йыгъаз зымгІвагъи швара рыквын, Иудейщхъакъраль зымгІва апын-гъи ауи йалачважвун. 66 ЗымгІвагъи згІаз ргвква йтаркІытІ ауи, йгъи рхІвун: дзачІвхушйа ари асаби? Ауаса ХІыхвитыгІв йнапІы йыквкІын ауи. 67 Захарийагъи, ауи йаба, Дыхв Шйыхла дгІатырчвгІахан, апхъала йгІаншуш гІайырбауа, йхІватІ:

68 Артишхъвара йыгшвмырхан ХІыхвитыгІв Израиль Рнчва,

— ЙугІа дъарызгІайыз йгъи йъарзыгІайшаз — агІазабчакъра гІалгара,

69 Йгъи хІызщтІухтІ агІахчахра ачІвгІва Давид йтдзы апны, Йара йычкІвын,-

70 Йара йших фигІамбарква ршІала йшихІваз апи,-

71 ХІагъачва хІырчвихчаныс, хІызчвымгъу зымгІва рнапІы хІачвихчаныс:

72 ХІабачва гвчІагІв рзичпаныс, Йара йших агвынгІвра гІайгвалайыршвахта,

73 ХІаба Авраам Йара йажва багъба йыйтызла,

74 ХІымшвауата, хІагъачва рнапІы хІачвихчата,

75 Йара къвырллыкъв йзыхІхарныс, ацкъарагъи ацІабырггъи хІымата, хІбзазара мшыта йаму зымгІва рпны.

76 Уаргъи, асабиншка, ЗымгІвирайхІу йыфигІамбар уыхъызхушд, йауа ухІвузтын ХІыхвитыгІв йпахъла уымгІвайсуа йымгІва йызурыхІазыруаштІ,

77 Йара йугІа йыдйырдырныс ргІахчахра зпщылу ргванахІзыргІвара шакІву,

78 ХІынчва йгвчІагІвчпара ацІолара,
ахІгІарала йхІызгІайуаш ЙгІацІуа АкІара,

79 ЙырзагІакІарныс алащари апсра
ахваги йылачІву,
хІара хІщанІква амамырмгІвала йна-
хІырханыс.

80 Асабишшкагы йызхІун, йгвылагы дба-
гыбахун. Акъвымквагы рпны дыъан – Из-
раильугІахъа рпахъ дгІагылынцІкІа.

ЙгІвбахауа ахъа

1 Ауат амшква рагІан акъесар Август йажва
гІацІцІтІ – адгъыл зымгІва апны ашвъатшанцІа-
ра акІвыршара. 2 Ауи йапхъахауа швъатшан-
цІаран, ауи акІвшун Квириний Сирийа да-
науысцтигІвыз. 3 ЙджвыквылтІ зымгІвагы
швъатшанцІара – дасу йара йыкъала. 4 Гальи-
льейшта йгІатыцІыз, Назареткъала йауаз Иосиф-
гы дцатІ Иудейшта – Вифлием – хІва йызпхъауа
Давид йыкъала, йауа ухІварыквын ауи Давид
йткъвым дауан, 5 тшанырцІарныс тагвжвата
йзырхІвайыз, йымгвадууыз Марийа дйыцта.
6 Ауат ауаъа йанаъаз, Ауи лхъара надзатІ,
7 дгІалритІ Лпа – Лара Лщыпа, йгы дам-
гвалцІатІ Ауи, йгы дталцІатІ Ауи аччора, йауа
ухІварыквын ауат хъащтацІарта гърымамызтІ
асасырта апны.

8 Ауи акъралъ апны архъа йыквын ауасах-
чаква, руасахІвычаква уахъынла йырчІапщауа.
9 Ауат йрымдырдзакІва ХІыхвитыгІв йымалья-
икъ рпахъ дгІагылтІ, ХІыхвитыгІв йнургыи ауат

йГанаркІкІатІ, йшватІ даргъи шварадула. 10 Амальяикъгъи ауат йрайхІвтІ: швымшван, ауаса абар, йнашвсырдыритІ швара агвыргъьараду, агІвычІвгІвысква зымгІва йырзаъазлуш: 11 дшвызгІадритІ уахъчІва Давид йыкъала апны ШвгІахчахыгІв, Мессийа ХІыхвитыгІв йакІвпІ Ауи. 12 Йгъи абар швыхъаз дырга: швара дгІашвауаштІ Асабипшка дауацІарышата йгъи аччора дтата. 13 Зынла йГаншатІ амальяикъ йыцта зпхъадзара щардаз агІарщры, Анчва ддыртшхъвауа йгъи рхІвауа:

14 Ртихъвара йыманІ ахІаракІыра апны Анчва, адгъыл апынгъи мамыр, агІвычегІвысква рпынгъи йтахъырабзи.

15 Йгъи йаъан: амальяикъква ауат йГаркъвыцІта гІарщ йанхъалх, ауасахчаква аджв аджв йайхІвхуан: Вифлием хІцапІта хІпшыпІ йГаншаз, ХІыхвитыгІв хІара йшгІахІайхІвыз. 16 Йгвжважвауа йГайын Марии Йосифи гІараутІ, дгІараутІ Асабипшкагъи аччора дтата. 17 Йгъи йрархІвтІ йГарахІвхаз Ари Асабипшка йыхъаз. 18 ЗымгІвагъи йызгІаз йджьарщун ауасахчаква йГархІвуз. 19 Марийагъи ауат ажваква зымгІва лгвы йталкІуан. 20 Ауасахчаквагъи йГлахъынхІвыхтІ Анчва ртшхъвара йиртуа, йырбази йыргІази зымгІва рыхъаз, йшгІарахІвхаз апш.

21 АгІмышкІ цІыта Асабипшка йпІытІачвапкъра ангІадза, Ауи ареш хъзы йыхъырцІатІ: Иисус, мгва данташва амальяикъ Ауи хъзыта йГайыйтхъата йаъаз.

22 Моисей Анчва йГайыйтыз Йщаквыргылраква йшгІанахІвауа апш, ачврыцкъара амшква аннадза, Ауи Иерусалим дгІаргтІ, ХІыхвитыгІв

йпахъ ддыргылныс, 23 ХІыхвитыгІв Йщаквыргылра йшгІанахІвауа апшта: «йхъацІачкІвыну асабипшка дзачІвызлакІгъи, ан луацІа йгІа-тыцІуа, ХІыхвитыгІв дйызалкІгІахаргІатІ», 24 къвырмантагъи йыщра атахъыпІ ХІыхвитыгІв Йщаквыргылра йшгІанахІвауа апшта: йа гІвхІвыхІвгІвазакІ йа гІвхІвыхІвчыркІ.

25 Ауи азаман Иерусалим апны дыъан гІвычІвгІвыскІ Симеон – хІва йыхъызта, гІвычвгІвысрайшакІ збазара Анчва дыззыразыз, Израиль аугІа ргвбжара артынчра йазпшуаз; Дыхв Шйыхгъи йыквын. 26 Йгъи йзагІахътІын ауи Дыхв Шйыхла, ХІыхвитыгІв Мессийа дйымбакІва дшымпсуаш. 27 ДгІайтІ ауи йгвы йшгІайнахІвыз апш аныхІварта, Асабипшка Иисусгъи йгІарийыгІвчва дангІарг Анчва Йщаквыргылра йшахІвауа рчпарныс, 28 ауи йнапквала дгІайахвын, Анчва дйызхІвахІвын йхІватІ:

29 — Ужвы дауыущтитІ Уара улыг, ХІнапшыцІагІв, Уара уажвала, амамыр йымата,

30 — ауаса сылаква йырбатІ Уара угІахчахра,

31 — аугІа зымгІва рпахъ Уара йурыхІазырыз:

32 Анчва дзымдыруа рыхъаз ймаракІарахуш, Израиль аугІаква рыхъазгъи йырхъар-тшхъварахуш.

33 Йабагъи йангъи йджъарщун Ауи йыхъаз йхІвахауа ажва. 34 Йгъи дрыквхІвахІвын ауат Симеон, Марийагъи, Ауи Йан, йлайхІвтІ: дабар, Ари дщтІапІ Израиль апны щардагІв ркІажъри ргІащтІыхри ахъаз, дырга амакІыратагъи, 35 бара бхъаталагъи абджъар бгвы йалсуаштІ, щардагІвы ргвтахъвыцтраквaгъи гІахътІхуштІ.

36 Йгъи даъан араъа Анна-фигІамбар-
пхІвыскІ, Фануил йпхІа, АсирргІа рабанпара
дауата. Ауи нцІраду нылцІытІ, зпхІвыспара
йгІашІарышвта быжъсквша зхъацІа йыцбзааз,
37 пхІвысчвзабатагъи — сквшыпщынгІважви
пщба. Ауи аныхІварта дгъакъвымцІуазтІ, дурь-
чуа йгъи дныхІвауа уахъгъи-тшынгъи Анчва
дйыхІвауа. 38 Ларгъи ауи асахІат дгІарыдгылын
ХІыхвитыгІв йыхъыз ртшхъварала йщтІылхуан,
йгъи йралхІвуан Иерусалим агІархвitra йаз-
пшуаз зымгІвагъи Ауи йыхъаз.

39 Ауат ХІыхвитыгІв Йщаквыргылра
йгІанахІвауа анырчпа амцтахъ Гальильейшта
йгІайхтІ — дара рыкъала Назарет.

40 Асабишка йызхІун дбагъяхун, уасара-
жвралагъи дгІатырчвылгІахун, Анчва йылпха-
гъи йыквын.

41 Ансиквшагъи Ауи дгІазрийыз Иерусалим
йцун АпІасха аныхІва. 42 Ауи жвыгІвсквша да-
ныртал, йщцалуз апшта, Иерусалим йцатІ
АпІасха аныхІва, 43 аныхІвамшква алгата йан-
гІайхуаз ачкІвын Иисус Иерусалим дгІанхатІ, ауи
гвы гъарымттІ йабагъи йангъи. 44 Датша
зджъакІы дрыцта дгІайуадзырцатІ, мщцарам-
гІва анамырда, рыуачви рдырчви дрылазтын —
хІва йпшгІауа йалагатІ, 45 ауаъагъи дырмауата
Иерусалим йхъынхІвыхтІ — Йара йзыпшгІумца.
46 Йгъи йаъан: йхымшкІхуз ауат Ауи аныхІварта
апны дгІараутІ, арыпхъагІвчва рквта дтачІвата
ауат дрыздыргІвуа йгъи дырцІгІауа; 47 йгъи
йджъарщун йздыргІвуаз зымгІва Ауи йгІа-
гвынгІвыри йджъауапкви. 48 Йгъи данырба Ауи
ауат йджъарщатІ, Йангъи араса йалхІвтІ: Ссаби,
ауаса йзхІзуха ачІвыйа? Абар, уабагъи саргъи

хІгвѣаджьюа хІузыпшгІитІ. 49 Йгъи йрайхІвтІ Ауи ауат: ачІвызйа швара Сара швызсыпшгІуз? Йгъжвымдырузма швара, Сара Саба йчІву апны сыъазара шатахъыз? 50 Ауаса ауат йгъыргвным-гІвытІ Ауи йхІваз ажваквa. 51 Йаргъи ауат дгІарыщлын Назарет дгІайхтІ, йгъи дрыздыр-гІвуан, Йангъи ауатква зымгІва лгвы апны йтал-кІуан. 52 Иисусгъи Анчви агІвычІвгІвыскви рбзи-бара йымата Анчва йуасаражврaли сквшыли йызхІун.

Йхпахауа ахъа

1 Тиберий къесарь йахІра йжвухвсквша ъанцІуаз агІан, Иудейшта апны Понтий Пилат унашва анахъицІуз, Гальильейшта апынгъи Ирод дантетрархыз (ахІрапщбачІвы знапІыцІаз), ауи йаща Филлип Трахтоници Итурейи анина-пІыцІаз, 2 Лысанигъи Абильена апны дантет-рархыз, апхъапщaгІвчва Анни КІайафи рагІан, Захарийа йпа Иоанн йзынархан Анчва йажва акъвымрхъа апны. 3 Ауи дрылстІ Иорданкъраль ачІвылаквa, адзыцІщра акІвигашауа Анчва йзгІахъынхІвыхра йыргауа ргванахІква рыз-гІвара ахъаз, 4 афигІамбар Исайя йгІвыраквa рпны йажва йшгІанахІвауа апшта:

Акъвым апны ачІвагІгІабжъы гІагитІ:

«ХІыхвитыгІв йыхъаз мгІва шврыхІазыр,
рейшата йшвчпа Ауи йымгІващквa:

5 акІварбжъараквa тырчвылгІазтІ,

ахвакви атобакви накъврагІатІ,

ахъвахъвартаквагъи мгІварайшахарагІатІ,

ахьагІватасраквагьи гІвзыртахарагІатІ,
6 йгьи йырбуштІ чви жьи зму зымгІва Ан-
чва йгІахчахра».

7 Ауи акІвпта, адзыцІщра йгІацІсырныс
йызгІайуаз аугІа Иоанн йрайхІвуан: ащтан-
чІвхъшаква, йшвазхІвда йаъазлуш ахІаквымра
швачвыгІвныс? 8 Йшвылшвырша йаквнагу
агІахънхІвыхра ауысква, йгьи шваламган
швхъаква йашвхІвхныс: «хара хІаба Авраам
йакІвпІ», — хІва, йауа швхІвузтын йшвасхІвитІ,
Анчва ахІахъв йгІалыйхта Авраам саби йзы-
гІанйыршаныс йылшуштІ. 9 АгврахІагьи хІа-
зырта ацІлащапІква рпны йщтІахъапІ: ауи
акІвпІта, швырхІалъаль гІазшІамылуа ацІла
пыркъитІта амца йаладрышвитІ. 10 ЙцІгІун
аугІагьи ауи: йхІчпушйа щта? 11 Ауат йрайхІвтІ
ауи джъауапта: гІвчгІвычакІ зму йцагІвишар-
гІатІ йызмам, фачІвы змугьи ауаса йчпарагІатІ.
12 АдзыцІщра йгІайтІ ахъвадкІылхыгІвчвагьи,
йгьи йархІвтІ ауи: арыпхъагІв, хІара йхІчпара
атахъыйа? 13 Йаргьи йджъауапхатІ: йшвзалху
акІвмызтын закІгьи шващтамлын. 14 ЙцІгІун
ауи аргІвчвагьи: хІара йхІчпара атахъыйа? Ауат-
гьи йрайхІвтІ: заджвы йгвгьи швамсын, заджвы
ййчвгъагьи швымхІван, швразха швынхаша-
хІакъквала.

15 АугІагьи азпшуан, йгьи йазхъвыцуан
зымгІва Иоанн ргвы дтата: ауи Мессийа гъйа-
кІвыммищтІ — хІва? 16 Иоангьи йджъауапхатІ
зымгІва йырзынархата: сара швара дзыпІ швы-
цІсцуа; ауаса сацкІыс Йымчхъадзу дгІайитІ,
замгІа ацІгъа гІасыртІларныс сызпсам. Ауи шва-
ра швыцІыщцаштІ Адыхв Шйых игьи амца.
17 Йара йбель Йара йнапІыцІапІ, ймашв

шГайрыцкьюш апш йгвадзгьи йца йштайпсуш,
ашыхІвгьи мцамчвла йбылуаштІ.

18 Датша ажва щардагьи райхІвуан ауи
аугІа, АнчІва йгІахчахра агвыргъъара дйыргІауа.

19 Ауаса апщыгІвмчхъаранапІыцІагІвкІ Ирод
йаща йтагвжва Йродиада лыхъаз, Иоанн йрып-
хашуз, адатшагвымхаращарда зымГІва йчпаз
рхъахъгьи, чвгъаракІ атарылайырхІахтІ, 20
Иоанн атутанакътара дтайырчІван.

21 Йгьи йаъан: аугІа зымГІва дзыцІщра
йанГІацІсуаз, Иисусгьи адзыцІщра дагІацІста
данныхІвуз, ажвГІванд тшхънатІын йгьи
дизыгІалбгІатІ 22 Адыхв Шйых, ахІвыхІв апш,
чви жьи йымата, гІарщлагьи бжъы гІагатІ: Уара
УакІвпІ Спа швабыжта бзи йызбаз, Уара йуылапІ
Сара стахъырабзи.

23 Йара Иисусгьи, йкъвырльыкъвъхарауыс
даналагуз, сквшГІважвижваба йхъыцІуан; Ауи,
йшазхъыцуазла дипан: Иосиф, Илиѳа,

24 Матфат, Льевий, Малхый, Ианнай, Йо-
сиф,

25 Маттафийа, Амос, Наум, Есльийа,
Нагъгьей,

26 Мааф, Маттафий, Семей, Иосиф, Йодайѳа,

27 Йоаннан, Рисайа, Заровавель, Салафиил,
Нирийа,

28 Мелхый, Аддий, КІосам, Елмодам, Ир,

29 Йосий, Ельизар, Йорим, Матфат, Льевий,

30 Симеон, Иуда, Иосиф, Ионан, Елиакым,

31 Мельѳайа, Майнан, Маттафай, Нафан, Да-
вид,

32 Йассей, Овид, Воос, Сала, Наассон,

33 Аминадав, Админ, Арнийа, Есром, Фа-
рес, Иуда,

- 34 Йаков, Исаак, Авраам, Фара, Нахор,
 35 Серух, Рагав, Фалик, Евер, Сала,
 36 КІайнан, Арфаксад, Сим, Ной, Ламех,
 37 Мафусал, Енох, Иарет, Малилиил, Кай-
 нан,
 38 Енос, Сиф, Адам, Анчва.

Йпщбахауа ахъа

1 Иисус, Дыхв Шйыхла дырчвыта Йордан дангІахъынхІвых Адыхв Шйых акъвым дйырцатІ, 2 Иблис дгІайырхъвыхырныс — дйызатІахъырпкІырныс мшыгІвынгІважва дчамкІва йгьи дыжвымкІва. Ауат амшква аналга амщтахъ мчыта дгІамлащитІ. 3 Йгьи йгІайайхІвтІ Ауи Иблис: Уара Анчва Йпа уакІвызтын, ари ахІахъв йахІв чІахъвата йшщущ. 4 Иисусгьи ауи джъауапта йййттІ: йгІвыпІ: «АгІвычІвгІвыс йгъчІахъвагІвацам дызлабзаслуш». 5 Йгьи дхъайдылын Ауи ахвахІгІара, ййырбатІ адуней апаштахІраква зымгІва лахъвгІахъасракІ ауацІапны. 6 Йгьи йайхІвтІ Ауи Иблис: Уара йуыстуаштІ ари амчхъара зымгІва йгьи рртшхъвара, йауа ухІварыквын ауи сара йгІаснапІыцІацІапІ, саргьи ауи йззыстахъу йыститІ. 7 Абар Уаргьи, сара квырмыш сзучпузтын, зымгІва Уара йучІвызлуштІ. 8 Иисусгьи ауи араса йайхІвтІ: йгІвыпІ: «УыхвитыгІв Уынчва квырмыш йзычпа, йгьи Ауи азаджвзаджвыкІ упсы йзыщти, къвырллыкъв йзыха». 9 Йгьи дйырцатІ Ауи Иерусалим йгьи дыквйыргылтІ аныхІварта акв-

бырг йгъи йайхІвтІ Ауи: Уара Анчва Йпа уакІвызтын, тшкІынцІа араѣа. 10 ЙгІвыпІщди :

«Йымальаикъква унашва рзичпуштІ Ауи Уара уыхъазла, угІахчахарныс Уара»,

11 йгъи: «РнапІква уыкв уыргуштІ Уара, ущапІыла ахІахъв уапыщкІламсра ахъаз».

12 Иисусгъи йыйттІ ауи джъауапта: йхІвапІ: «УыхвитыгІв Уынчва думырхъвыхын». 13 Архъвыхраквагъи зымгІва дрылган, Иблис зын-заманкІдза Ауи дгІайкъвыщтІ.

14 Йгъи дгІахъынхІвыхтІ Иисус Адыхв Шйых йымчла дгІатырчвгІата Гальилейшта, Ауи йунашвагъи амцІыщтІ акъралъ зымгІвала, 15 йгъи йайрыпхъун Ауи рджъутныхІвартаква апны, зымгІва ддыртшхъвауа.

16 Йгъи дгІайтІ Ауи Назарет, дъарыгІаз апны, йгъи днашылтІ, Йара йшицІасыз апшта, амтшашамш аджъутныхІварта, йгъи дгІагылтІ дапхъарныс. 17 Йгъи йгІайырттІ Ауи афигІамбар Исайа йгІвыра, йгъи йгІахъитІын, йгІайаутІ Ауи ахъата, араса йъаныз:

18 ХІыхвитыгІв Йдыхв сыквпІ Сара, ауаса Ауи сйалкІгІагІвпІ Сара. СгІауищттІ Сара Анчва йгІахчахра йдсыргІарныс арыцхІаква, йрыласхІварныс йырхвитым агІархвитра, алашква лахъдзахра, агІазабчакъра йацІу гІасырхвитырныс,

19 йрыласхІварныс ХІыхвитыгІв йквачІа-гІвра апхын.

20 Акътапгъи хъигІвахын, ауысхагІв йыйтхын, Ауи дчІвахтІ; аджъутныхІварта йгІвназ зымгІвагъи рылаква Ауи йзынархан; 21 Йаргъи дгІалагатІ ауат йрайхІвуа: ужвы йыншватІ швара швпахъ ари агІвыра. 22 ЗымгІвагъи йзыкв-

шахІатхун Ауи, йгьи йджьарщун Йара йгІай-
 шыщІуаз азылпхаражваквa, йгыийырхІвун:
 Иосиф дгыпаммащта Ауи? 23 Йаргьи йрайхІвтІ
 ауат: щта, швара йгІасашвхІвуаштІ Сара ари апш
 ажваж: «рбзихагІв, уара ухъа рбзиха: йчпа ара-
 тагьи, Уара уабашта апны, хІара йыгІгІаз,
 КІапернаум йыншата». 24 Йгьи йхІватІ Ауи:
 «тамамта йшвасхІвитІ швара: *фигІамбаркІгьи*
дгырайгвам йабашта апны. 25 Тамамта
 йаташвасхІвхитІ швара: пхІвысчвзаба щарда
 аъан Израиль апны Илийа йымшква рагІан,
 хсквши цымызкІи ажвгІванд анкІыз, адгъыл
 ахъахъ зымгІва апны мла ду анынша, 26 аджвы
 лпынгьи дгыщтимызтІ Илийа, Сарепта — Сидон
 йтаз апхІвычвзаба лпны акІвмызтын; 27 щар-
 дагІвгьи аъан чвалабгІахъгІвыта Израиль апны
 афигІамбар Ельисей йагІан, ауаса ауат рыуа за-
 джвгьи дгыгІамцкъахатІ асирийаныгІв Нееман
 йакІвымызтын. 28 АджьутныхІарта апны ари
 згІаз зымгІва агвыжвкІра ду йнанауахвтІ, 29 йгьи
 йгІагылын Ауи акъала дтырцан, ддырцатІ, ры-
 къала зхъвынгылаз атоба ашыгІвгІвырта
 дгІакІнырцІарныс. 30 Ауаса Йара ауат рквтала
 дрылсын, Йара йымгІвала дымгІвайстІ.

31 Йгьи дгІайтІ Ауи КІапернаум, Гальиль-
 ейшта йачІву акъала апны; йгьи йайрыпхъун ауат
 амтшашамш, 32 йгьи йджьарщун Ауи йапхъа-
 радырра, ауаса Ауи йажва хъгалра аман. 33 Даъ-
 ан аджьутныхІварта апны гІвычІвгІвыскІ,
 гІвычвгъа злаз, йгьи дгІацІрытІ ауи быжьдула:
 34 О! Уара хІара йыхІзыууысйа, Иисус На-
 зарйаныгІв? Уара угІайтІ хІара хІурыдзныс! Уыз-
 дыритІ Уара узачІву, Анчва Йшйых. 35 Иисус-
 гьи ауи багъята йайхІвтІ: ушІа кІы йгьи угІа-

йылці ауи. Йгьи дкІайкъѡан аджъутныхІварта агвбырг, агІвычвгѡа йгІайылціті зараркІгьи йыз-намхауата ауи. 36 ЗымгІвагьи шварадукІ гІарыжвылтІ, йгьи йырхІвун ауат дара-дара: йамгІан ажвайа ауи, хъгалри мчыли Ауи унашва зларзичпауа агІвычвгѡаква, даргьи йгІарылціитІ? 37 Йгьи йамціыціуан Ауи йхабар акъралъ ахѡа-таква зымгІвала.

38 ДгІагылта аджъутныхІварта дангІаджвылці, Ауи Симон йтдзы днашылті. Симон йпхІвыс лан шыраблыра мчы лыман, йгьи йыхІватІ Ауи ауат ауи лыхѡаз. 39 Йгьи дналхѡадзгылын, Ауи ашыраблыра унашва азичпатІ йашІасхырныс, йаргьи дгІаунащтхті ауи. Ларгьи, йара ауи асахІат дгІагылын, кІара рзылмаціауа далагатІ. 40 Йапшым азгІваква змаз зымгІва амара анташвахыз азаман Ауи йызгІардуа йалагатІ. Йаргьи, йнапІы рыквиціумца ауат йырбзихун. 41 ЩардагІвгьи йрылаз агІвычвгѡараква бжьи рхѡыціуа йгІарылціуан, йгьи йырхІвун: Уара – Анчва УипапІ. Йаргьи ауат йгъйымырхвитуазті йыдйырхІварныс, Ауи Мессийа шйакІвыз, йырзынархаз йажвагьи швабыжта йырхѡан.

42 АмшшІыц ангІатал, Ауи *дгІаджвылціын* амцырартала дцатІ, аугІагьи Ауи йзыпшгІун йгьи дгІараутІ, йгьи дгІашІаркІуан, Ауи дшыркѡвымціуаш ахѡаз. 43 Йаргьи йрайхІвтІ ауат: анахѡанат акѡалаквагьи Сара йрыласхІвара атахѡыпІ Анчва Йнурштара ахабар, йауа ухварыквын ауи акІвпІ Сара сыззыгІащтиу. 44 Йгьи йрылайхІвун Анчва Йажва Йудейшта аджъутныхІвартаква рпны.

Йхвбахауа ахъа

1 Йгъи йаъан: ауглажвпIара дгIадырпцIуа Анчва йажва йаназдзыргIвуаз, Йаргъи Гъеннисарет адзгъагъара данадзхъагылаз, — 2 йгIайбатI Ауи адзгъагъара йхъгылаз гIвкIъанджъакI. АпслачвакIыгIвчвагъи, ауат йгIартыцIын, акIатаква рджвджвун. 3 Ауи Симон йчIвыз акIъанджъакI даквчIван, дйыхIватI мачIкI атшпы дакъвыцIныс; йгъи дчIван, акIъанджъа даквчIва аугIа йбжъун. 4 Ауи йхIвуз даналга, Симон йайхIвтI: ацIоларала унадзцата йгъи йташвршвшыкIатаква пслачва гIашвкIырныс. 5. Симонгъи йджъауапхатI: АмгIваквцIагIв, хIара ацIхшабгаз хIынхан закIгъи гъхIзыгIамкIтI. Ауаса Уара уажвала акIатква тасрышвпI. 6 Ауаса анырчпа, ауат ауи аъара пслачващарда гIаркIын; рыкIатаква пхъжвун. 7 Йгъи йырзырчпатI ауат анахъани акIъанджъа йаквчIваз напIы, ауат йрызгIайта йшгIарцхърагIуш; ауатгъи гIаскъатI, йгъи йдырчвытI агIвкIъанджъакIгъи, йцIашвкIвалума-хIва. 8 Ауи аниба Симон Иисус йщамхъаква тшрыцIайрышвын йхIватI: ускъвыцI сара, ХIыхвитыгIв, ауаса сара гванахI зму схъацIапI. 9 Ауи йгIаркIыз апслачва збаз, йыцызгъи йаргъи шварадукI гIарылалтI, 10. йара ауаса Заведей йпачва Йаковгъи Иоангъи, Симон йыгIвзачваз. Иисусгъи Симон йайхIвтI: уымшван; ужвы уалагата йгIаукIуаш гIвычIвгIвыспI. 11 АкIъанджъакIва адзатшпы йгIатырган, ауат зымгIва гIаныржъын Йара йцIыхъва йтагылтI.

12 Йгъи йаъан: Ауи къалакI апны данаъаз, зымгIва дчвабгIата гIвычIвгIвыскI дйызгIайтI.

Иисус даниба, ауи йпашвхІа тшкІайрышвын дйыхІвауа далагатІ: ХІыхвитыгІв, Уара йутахъызтын, сузрыцкьюштІ сара.13 Иисусгьи йнапы йрауын, ауи дихъысын, йхІватІ: йстахъыпІ, тшгІарыцкьях. Аныгьи йарауи асахІат ачвабгІара йкъвыщІтІ. 14 Йаргьи унашва йзичпатІ ауи заджвгьи йайымхІвныс, ауаса йхІван: уцата, апщагІвы³ тшйырба угІарыцкьяхра ахъазла йаквнагауа гата, Моисей йшихІваз апш, ауат йышрызшахІатхуш ахъаз. 15 Ауи йунашва рыцІарыцІа тшамцІнахуан, угІащардагьи тшазыркІкІуан йыздыргІвныс рзгІваквагьи дырбзихарныс.16 Йаргьи акъвымква рпны дцун йгьи Анчва дишІапхъадзун, дныхІвун;

17 Йаъан зны: Йара йайрыпхъауата, Гальлейшта, Иудейшта, Иерусалим акытква зымгІва йгІартыцІта йгІайыз афарисейчвагьи ахабзарыпхъагІвчвагьи йчІвата, йгьи йалан ХІыхвитыгІв йымч йчпуз арбзихараква, — 18 йгьи абар, дгІаргтІ аугІа ахъыгъвцІыгъв дыквта гІвычІвгІвыскІ — йымчымхъаз, йзымгылхуаз. Даргьи швабыж йыртахъын ауи днаргылта Иисус йпахъ днацтІарцІаныс, 19 ауаса аугІажвпІара рыхъаз дахъъанаргылуаш рмауата, ауат атдзакв ацІыкв гІаквырхын, ауи йхъыгъвцІыгъвгьи дшамгваз дгІакІныржъылын, рейша Иисус йпахъ дгІацтІарцІатІ. 20 Ауат разхъацІара аниба, Ауи йхІватІ: агІвычІвгІвыс, уыгванахІква йузыргІвапІ. 21 АкътапгІвчваква йгьи афарисейква йазхъвыцуа йалагатІ, араса рхІвауа: ймагІныйа ари? Ауи Анчва дйырджьитІ. Дызда агвана-

sc³ ПщагІвы – священник.

хІзыргІвара зылшуш Анчва йакІвымкІва? 22
Иисус, ауат разхъвыцпраква йдырын, йрайхІвтІ
джъауапта: швгвтахъвыцпраквагьи йырмагІ-
ныйа? 23 РыцІа ймайрайа? ЙухІварныс:
«уыгванахІква уызгІвапІ», момкІва: «угылта
уныкъва»? 24 Ауаса швара йжвдырырныс,
АгІвычІвгІвыспа дшырхвиту адгъыл апны гва-
нахІ рзиргІварныс, – Ауи йайхІвтІ йымчымхаз:
уара йуасхІвитІ: «угыл, ухъыгъвцІыгъв нахвта,
упны уцах». 25 ЙчмазагІвызгьи йара ауи асахІат
зымгІва рпахъ дгІагылын, дызквызгьи гІайа-
хвын, Анчва дйыртшхъвауа йпны дцахтІ. 26
ЗымгІвагьи джъацахъвараду рызгІайтІ, Анчва-
гьи ддыртшхъвун, шварагьи рыкв йырхІвун:
джъацахъвара гІбатІ хІара уахъчІва.

27 Ауи амцтахъ Ауи дангІаджвылцІ, акъва-
дкІылхыгІв — Льевий зхъзыз днайбатІ, акъвад-
кІылхырта йчІваз, йгьи йайхІвтІ ауи: Сара
сцІыхъва утагылта унай. 28 Йаргьи зымгІва ни-
жбын, Ауи йцІыхъва дтагылын дцатІ. 29 Йгьи
йчпатІ Ауи йыхъаз Льевий чаражвра ду йтдзы
апны, йгьи йаъан къвадкІылхыгІвщардагІв, да-
тшагьи Йара йыцчваз. 30 Йгьи йашшуан акъ-
тапгІвчви афарисейчви тшырзынадырхауа Ауи
йапхъагІвчва: ачІвыйа швара акъвадкІылхы-
гІвчви агванахІрхІагІвчви швызрыцчауа йгьи
швызрыцыжвуа? 31 Йгьи йриттІ Иисус ауат
джъауапта: азгІвадаква гъракІвым арбзихагІв
дызтахъу, ачымазагІвква ракІвпІ. 32 Сара
сззгІайыз азгІвадаква агІахъынхІвыхра йазсыр-
царныс гъакІвым, ачымазагІвчва ракІвпІ.

33 Даргьи Ауи йархІвтІ: Иоанн йапхъагІвчва
щарда йыурычитІ, Анчвагьи йшІацІгІитІ, йара

ауаса афарисейчва рыуагы; Уара учІвква йчитІ-
йыжвитІ. 34 Иисус ауат йрайхІвтІ: анадылра
айшва йадзхъачІву швызрыурычуашма, атагв-
жвагІагыгІв данрыцу? 35 Ауаса йгІайуаштІ амш-
ква, атагвжвагІагыгІв ауат данрыквххуш, ауи
агІан йуурычуаштІ. 36 ЙрайхІвтІ ауат уасара-
жвракІгы: заджвгы, йамуыхуата йхаз ачгІвыча
акврышв гьадигалуам ачгІвычашІыц йгІалжвата:
ашІыцгы йакъвижвуштІ, ажвгы йгъаквшву-
шым акврышв ашІыц йгІалхыз. 37 Заджвгы
агъашажв гІвадзшІа⁴ гьтайчвум; агІвадзшІа
агъашажв гІапхънажвуштІ, йаргы гІаты-
чІвуштІ, агъашагы ахъазйыдзуаштІ; 38 ауаса
агІвадзшІа агъашашІыц йтачвара атахъыпІ, ауи
асхъан акІвпІ аныгы арыгы анхчахуш. 39 За-
джвгы, гІвадзыжв зыжвыз йгьитахъхушым
гІвадзшІа, ауаса йхІвитІ: «ажв бзипІ».

Йцбахауа ахъа

1 ЙыншатІ сабшамшкІ Ауи тшыгІвра зкву
архъаква дрылсныс; Йара йапхъагІвчвагы ач-
хъаква гІахъырчІвчІвун, напІыла йашІдырпІ-
лунта йырфун. 2 Афарисейчва рыуа азджъакІ
ауат йрархІвтІ: йачІвыйа швара асабшамш йчпа-
ра атахъым зшвчпауа? 3 Иисусгы ауат джъау-
апта йриттІ: швгъампхъама швара, Давид йчпаз
йыцызгы йаргы йанымлаций? 4 Ауи аны-
хІварта дшнашылта, апцагІвчва ракІвымкІва

⁴ ГІвадзы – йажвыз абазажваб – чагІыр (вино).

заджвгъи йфанис дызхвитмыз ачІахъваква йаргъи йшифаз йыцызгъи йшдирыфыз? 5 Йгъи йрайхІвТІ ауат: *АгІвычІвгІвысна* асабшамшгъи дахвитыгІвпІ.

6 ЙыншатІ датшасабшамшкІгъи Ауи аджъутныхІварта днашылта йайрыпхъарныс; гІвычІвгІвыскІгъи даъан ауаъа, йагъманапІы гІвата. 7 АкътапгІвчви афарисейчви Йара йызкІылпшуан, асабшамш Ауи йгъимырбзихушма-хІва, дызладыркъванчуш йгІарауырныс рта-хъыта. 8 Ауаса Йара ауат ргвтахъвыцпраква йдыруан, йгъи йайхІвТІ агІвычІвгІвыс знапІы гІваз: угІагылта ауатыкв угІатал. Йаргъи дгІагылын ауатыкв дгІаталТІ. 9 Йгъи йрайхІвТІ ауат Иисус: сшвцІгІитІ швара: йырхвитума асабшамш абзира ухарныс момкІва ачвгъара? Апсы гІаухчыхырныс момкІва йыурыдзырныс? 10 ЗымгІвагъи дырпшын, йайхІвТІ ауи: унапІы гІаргъвгъва. Ауи ауаса йчпатІ, йнапІгъи тшгІанарзахвахтІ. 11 Ауатгъи гІапкІра рызгІайын дара-дара йабархІвуан, йзырхарйищТІ-хІва ауат Иисус.

12 ЙыншатІ ауи амшква рагІан, Ауи атоба дхъалта дныхІварныс, ауахъ зымгІвагъи Ауи Анчва дишІацІгІауа йгатІ, 13 амшгъи ангІатал, Ауи Йара йапхъагІвчва зшІитТІ, йгъи йгІарылихТІ ауат жвыгІвыгІв, апостол-хІва йзыхъицІаз: 14 Петр – хІва зхъицІаз Симон, ауи йаща Андрейгъи, Йаковгъи, Иоаннгъи, Филипгъи, Варфоломейгъи, 15 Матфейгъи, Фомагъи, Алфей йпа Йаковгъи, Зилот – хІва йызпхъауа Симонгъи, 16 Йаков йпа Иудагъи, Искарот йпа Иудагъи, ауи амщтахъ агвымхара тшазтыз, ацІабыргра пызтшыз.

17 ДанГакІнылхгьи атоба ауат йыцта, Ауи агъвгъварта дгылтІ, Йара йапхъагІвчвагьи, аугІащардагІвгьи – Иудейшта, Иерусалим акъала, атенгъызтшпы Тири Сидони йГартыцІыз зымГІвагьи. 18 Ауат ауи йыздзыргІвныс йГайтІ, рызГІваквгьи дырбзиханыс. ГІвычвгъа гІаздысылта зхъа зляжъазгьи бзихун. 19 АугІажвпІара зымГІвагьи йыртахъын Ауи йхъысныс, йауа ухІварыквын Ауи къару гІайылцІуан йгьи йырбзихун зымГІва.

20 Йаргьи йылаквa йапхъагІвчва йрыкви-кІын йхІвун:

Насып ду рымапІ йрыцхІу — Анчва дшыр-тахъу гІазгвынгІвыз, ауаса швара йшвшІыпІ Анчва Йнурштара.

21 Насып ду рымапІ ужвы йымлацийуа, ауаса швара швархъахуштІ. Насып ду рымапІ ужвы йчІвыуа, ауаса швара швыргвыргъа-хуштІ.

22 Насып ду швымапІ, аугІаква шваныр-чвымыгъу, швандрыхъарауа, швандырджъауа, швыхъызгьи чвгъарала йанынкъвырхІвауа, АгІвычІвГІвыспа йыхъазла. 23 ШвГІагвыргъа ауи амш, швыгъгьиГІакъахвха, ауаса абар, швГІатрабзищарда швабыж йдупІ гІарщ апны: йара ауаса акІвын йырзырхуз афигІамбарквa ауат рабачва.

24 Ауаса чІвыуара швызГІайуаштІ, абайачва, йауа ухІварыквын швара швгвыртынчра швыт-хъапІ.

25 ЧІвыуара швызГІайуаштІ, уахъчІва зым-гва рчву, йауа ухІварыквын швГІамлаций-хуаштІ. ЧІвыуара швызГІайуаштІ, уахъчІва йхъыччауа, йауа ухІварыквын швГІачІвыу-хуаштІ.

26 ЧІвыуара швызгІайуашті, аугІа зымгІва шва швыхъаз бзи анырхІвауа. Йауа ухІварыквын ауи акІвын йырзырхуз афигІамбармцквa ауат рабачва.

27 Ауаса швара, йдзыргІвуа, йшвасхІвитІ: швагъачва бзи йжвба, швызчвымгъу бзира рзышвха, 28 шврыквхІвахІв швызшвиуа йгъи шврызныхІва швгвы йгІасуа. 29 УдзамгІвакІ йгІасыз ауахъауи удзамгІвакІгъи йзынарха, ухъахъквцІачгІвычагъи уыквызхуа уасгъи йыт. 30 ЙгІауыхІвауа дзачІвызлакІгъи йыт, учІвы назахвызгъи йгІайыквумххын. 31 АугІагъи швара тшшвзыгІарчпарныс йышшвтахъу апш шваргъи аугІаква тшырзышвчпа. 32 Бзи швызбауагъи бзи йжвбахидхІва, швбзирата йалу ачІвыйа? АгванахІрхІагІвчвагъи бзи йзбауа рбахитІ. 33 Ауаса бзира швзызхауа бзира рзышвхахидхІва, швбзирата йалу ачІвыхйа? АгванахІрхІагІвчвагъи ауаса рчпитІ. 34 ПсарчІвгъи гІашвызтхныс швзайгвыгъауа псарчІвы йышшвтидхІва, швбзирата йалахйа? АгванахІрхІагІвчвагъи псарчІвы рыртитІ агванахІрхІагІвчва, ауиъара шгІарыртхуаш рдыридта. 35 Ауаса швара швагъачва бзи йжвба, бзихарагъи рыдыжвгал, псарчІвгъи рышшт гІахънырхІвыхракІ швазымпшуата; агІатрабзирагъи йшвызпшуа дууызлуштІ, *ЗымгІвирайхІугъи* швиначвазлуштІ, йауа ухІварыквын Ауи абзира гІазгвынгІвуагъи ачвгъаквагъи дрызбзипІ. 36 ШврыцхІацагІвха, *Шваба* дшрыцхІацагІву апш. 37 ХІаквым швымхан, хІаквымгъи гъшвыквхахушым. Йшвмырджъан, шваргъи швгъырджъахушым. ЙрызшвыргІва, шваргъи йшвзыргІвахуштІ. 38 Йрышшт, швар-

гъи йшвытхуштІ: швага хІалъальла, швага щар-
дала — азнакъызкъызла йшвзытарпсахуаштІ
швара швтапсарта; йауа швхІвузтын — швара
йзлашвшвауа ашвагала шваргъи йгІашвзыр-
швахуаштІ».

39 ЙрайхІвтІ ауат квырпшыгагІахІвах-
ракІгъи: алашв лашв дизырцума? АгІвуджъгъи
гътамшвушма амаша? 40 АпхъагІв арыпхъагІв
йацкІыс дгъхІгІам, ауаса дзачІвызлакІгъи
тшазибжъарквын йарыпхъагІв дйапшхуштІ.
41 АчІвыйа уаща йыла йыцІу акъвыра узапшуа,
уара уыла йыцІу ачІвгІван узымбауа? 42 Йшпа-
уызйахІвуа уаща: «саща, йгІахв, сара йгІацІ-
схуаштІ акъвыра, уыла йыцІу», уара уыла йыцІу
ачІвгІван уымбауа? Нахърышвт-гІахърышвт,
лактапсах, апхъапхъа уара уыла йыцІу ачІвгІван
гІацІх, уадыргІвана акІвпІ йанубуш, уаща йыла
йыцІу акъвыра шгІацІухуаш.

43 Йгъыгъам цІлахІалъалькІгъи, швырхІарам
гІашІалуа, йгъыгъам цІлахІарамгъи, швыр-
хІалъаль гІашІалуа. 44 Йауа ухІварырквын,
йзачІвцІлазлакІгъи йара ашвырла йудыритІ.
Ауаса амыгъ жвумп гыгІашІалуам, абжъынцІгъи
ажъ гыгІашІырхуам. 45 АгІвычІвгІвыс хІалъаль
йгвхІалъаль акІвпІ абайара ахІалъальра агІа-
тихуа, агІвычІвгІвыс чвгъагъи ачвгъара йгвычв-
гъа йгІатихитІ. Йауа ухІвузтын йгвы златыр-
чвылгІу акІвпІ йшІагъи йахІвауа. 46 АчІвыйа
швара Сара швызшІапхъадзауа: «ХІыхвитыгІв,
ХІыхвитыгІв!» — хІва, йгъи йызшвымчпауа Сара
йсхІвауа? 47 ДзачІвызлакІгъи, Сара йсызгІайуа,
Сажваквaгъи йрыздыргІвуа йгъи йзырхъйауа,
— Сара йшвасхІвпІ ауи дзапшу. 48 ДйапшпІ ауи

аГІвычІвГІвыс, тдзы зыргылуа, ачІвыла гІазжыз
йГЫи йзрыцІолаз, ащапГЫи ахІахъв йыквынзыр-
гылыз. Адзы гІатыГІврыта, адзыГІв ауи атдзы
йанГІагвыквыл йгъазамрыцІстІ, йауа швхІвуз-
тын ауи бзита йыргылын; 49 ауаса йызгІата
йзмышъйаз дйапшпІ аГІвычІвГІвыс, щапІыдъа
адгъыл тдзы йыквынзыргылыз. ЙГЫи йагвыквылтІ
ауи адзыГІв, йарауи асахІатГЫи ауи ахъыГІв-
рыхтІ, йГЫи швабыжта йдуун ауи атдзы ахъва-
шахра.

Йбыжьбахауа ахъа

1 Ауи йажваква зымГІва, аугІа йыздзыр-
гІвуаз, йрайхІвта даналга, Капернаум дталтІ.
2 ЦентурионкІ⁵ швабыж хвы ззибуз йчрынкІ
апсра тшазичпауата дчмазагІвын. 3 Иисус йу-
нашва анядза, ауи аиудейахІбауасаражвква
йзищтитІ йыхІварныс Ауи, дгІайта йычрын
дгІайхчаныс. 4 ДаргЫи, Иисус йызгІайын,
йыхІвун Ауи швабыжта йГЫи йырхІвун: ауи
дапсапІ Уара ауаса йзуханыс: 5 ауи хІыугІа бзи
йбитІ, йара джьутныхІвартаГЫи хІызйыргылтІ.
6 Иисус ауат дрыццатІ. Ауи атдзы даначвыхъа-
рахымыз, ацентурион йыгІвзачва йщтитІ йар-
хІвныс Ауи: ХІыхвитыГІв, тшумрыгІапсан. Ауаса
сара сгъапсам Уара стдзы угІашылныс; 7 ауи
акІвапІ сара Уара сызуызнамйызгЫи, ауаса йхІва-
гІваца ажвазджвыкІ, сычкІвынГЫи дбзихуштІ.

⁵ *Центурион* – угІашвыгІв йнадзауа аримрхъвы рахІба.

8 Ауаса саргы сырнапыцІагІвпІ, аргІвчвагы йснапыцІагІвпІ, йгы йасхІвитІ азаджв: «уца», йгы дцитІ, анахьаныгы: «угІай», йгы дгІайитІ, сычрынгы йасхІвитІ: «ари чпа», йгы йчпитІ. 9 Ауи анигІа Иисус дджайщатІ; аугІажвпІара йцІыхъва йтагыла йнейуазгы тшрызгІацайырпан, йхІватІ: йшвасхІвитІ, Сара Израиль апынгы ауи апш азхъацІара гьгІасмаутІ. 10 Ашти-йыгІвчва ангІахъынхІвых рпны, ачрын дызгІвадата дгІараухтІ.

11 Ауи амщтахъ Иисус Наин – хІва зхъыз акъала дцатІ, йыццун Ауи йапхъагІвчвагы, угІащардагы. 12 Ауи акъала агвашквва данраргванха, абар, дгІатыргун апсы, ан-пхІвысчвзаба лпазаджвыкІ, йгы йлыцын ауи акъала йауата угІащарда. 13 Йгы даниба, ХІыхвитыгІв дйымарыцхІан ауи, йлайхІвтІ: бымчІвыуын. 14 Йгы днаскІан агІасы дахъыстІ. Йызгузгы гІашІастІ. Йаргы йхІватІ: ачкІвын, уара йуасхІвитІ: угІагыл! 15 Апсгы дгІахъчІвалын дчважвуа далагатІ; Иисусгы ауи йан длыйтхтІ. 16 ЗымгІвагы ашвара йгІанакІытІ, Анчвагы ддыртшхъвун йгы йырхІвун: афигІамбардудздза дгІахІылшатІ хІара, Анчвагы дрызгІайтІ ЙугІа. 17 Ари ажвагы, Ауи йыхъаз йхІваз, йгІакІвшатІ Иудейшта зымгІвагы, агъагъарагы.

18 Йгы йархІвтІ Иоанн йапхъагІвчва ауат агІаншараква зымгІва. 19 Йгы йгІазшІитын йапхъагІвчва йрыуата гІвыджъ, Иоанн йщтитІ ауат ХІыхвитыгІв йцІгІарныс: Уара уакІвма Ауи йгІайуаш, момкІва датшазаджвы хІйызпшуашма? 20 Ауатгы, Иисус йызгІайын, йырхІватІ: Иоанн АдзыцІщыгІв Упны хІгІайщтитІ хІуцІ-

гІарныс: «Уара уакІвма Ауи йгІайуаш, момкІва датшазаджвы хІйызпшуашма? 21 Ауи азаман Иисус щардагІвы йырбзихахъан – акІарахъри азгІви зымаз, агІвычвгъагъи зылаз, алашвквагъи рылаква гІахъитІыхтІ. 22 Йгъи йрайхІвтІ ауат Ауи: швцата, Иоанн йашвхІв, швара йжвбази йжвгІази: алашвква рылаква тшгІахъыртІыхитІ, ахъачаква ныкъвахитІ, ачвабгІахъагІа зму тшдрьцкъахитІ, адагвквагъи йыргІахитІ, апсква гІабзагылхитІ, арыцхІаква Анчва йгІахчахра агвыргъара йрахІвхитІ, 23 насыпдугъи йымапІ Сара йыспыщкІламсуа, йхъымпкІбуа.

24 Иоанн йгІащтийыгІвчва анцах, далагатІ Ауи Иоанн йыхъаз аугІа йрайхІвуа: ачІвыйа швызпшныс швызцаз акъвым? АкъвырагІва, апша йарыцІсуа акІвма? 25 Щта швпшныс швызцаз ачІвызйа? АгІвычІвгІвыс, ачгІвыча чІара-чІаква зшву? Ауаса ачгІвыча чІара-чІаква зшву йгъи йбайу апаштахІтыдзка йрыгІвнапІ. 26 Щта йзачІвызйа швпшныс швызцаз? АфигІамбар? Щта, йшвасхІвитІ швара, афигІамбар йайхІагъи. 27 Ауи йакІвпІ, зыхъаз йгІву:

«Абар, Сара днасцтиитІ смальяикъ Уара упахъла,

Уара уымгІварайша узызрахІазыруаш Уара упахъла».

28 ЙшвасхІвитІ швара: агІвычІвгІвысткъвым апны заджвгъи дгъыгъам Иоанн йацкІыс йхІа-ракІу; ауаса Анчва Йнуриштара апны зымгІва рацкІыс йхвыцу ддупІ ауи йацкІыс. 29 АугІа зымгІвагъи, Ауи йыздзыргІвуаз, акъвадкІыл-

хыгІвчвагы Анчва артшхъвара йырттІ, Иоанн йакІвигашуз адзыцІщра йгІацІсын. 30 Афари-сейчви ахабзарыпхъагІвчви Анчва йтахъырата йрызйымаз тшгъадрымкІылтІ, Иоанн йакІви-гашуз адзыцІщрагы йгъгІацІымстІ. 31 Ауи акІвпІта, дызда сара йызшІсырпшуаш ари аза-ман абанпара аугІаква, йгы йзапшуда ауат? 32 Ауат асабиква йрапшпІ, атбгІараква рпны йчІвата азаджв азаджв йырзыцІырхуа, йыз-хІвауа:

«ХІара кІыжкІыж хІшвзасуан, шваргы швгъгІамхІвуазтІ,

хІара уарад-гъыбза швзыхІхІвун, шваргы швгъымчІвыуазтІ».

33 ДгІайтІ Иоанн АдзыцІщыгІв: чІахъвагы гыфум гІвадзгы гъйыжвуам, шваргы йшвхІвитІ «гІвычвгъа йылапІ». 34 ДгІайтІ АгІвычІвгІвыспа: йгы дчитІ йгы дыжвитІ, шваргы йшвхІвитІ: «дабар агІвычІвгІвыс ачарагы агІвадзыжврагы бзи йызбауа, агванахІрхІагІвчви акъвадкІыл-хыгІвчви рыгІвза». 35 Анчва Йуасаражвра тшызлагІанахчахуа йара асабиква зымгІва ракІвпІ.

36 Йгы дгІайыхІватІ Ауи афарисейчва рыуа заджвы айшва йыцагІвишарныс. Иисус ауи йтдзы днашылын дйыцІватІ. 37 Йгы абар, пхІвыскІ, гванахІщарда змата акъала апны йыр-дыруаз, йылдырын, Иисус афарисей йпны дшыгу, йгІалгтІ цІыквмачвахвыцкІ фгІвыпшдза зму хъщыкІ тата, 38 йгы дзынаскІѡан Ауи йщапІ-ква рпны дчІван дчІвыуа далагатІ, лыладзква-гы Ауи йщапІква йрыквчІвун, лыбраквалагы

йылрыцкьун, багьи ралхІвуан, хьщфГІвыпщдза-
гьи рхьылщуан. 39 Ауи аниба, афарисей, Иисус
дГІазшІызтыз, йхъа йайхІвтІ: Ари, дфигІам-
барзарквын, йдыррын, дзачІвугьи йылмагІын-
пхІвысугьи йгІайхьысуа, йауа ухІварыкІвын ауи
дгванахІрхІагІвыпІ. 40 Иисусгьи ауи йзынарха-
та йайхІвтІ: Симон, Сара йуызсымапІ йуасхІвуаш
закІы. Ауи йхІвитІ: йхІва, АрыпхьагІв. 41 Псар-
чІвтигІвыкІ гІвпсарчІвыквыгІвкІ йыман: аджв
— псарчІвыта йыквын рызнасомта хвышв,
йгІвыджьхуз — швбжакІ. 42 Ауаса ауат рпсар-
чІвква зларшвахуашыз гьрымамызтІ, ауи
агІвыджьгьи йрызйыргІватІ. ДзачІвыйацта ауат
рыуа ауи рыцІа мчы бзи дызбуш? 43 Симон
йджьауапхатІ: сшазкъвыцуа, ащарда зызйыр-
гІваз йакІвхапІ. Иисусгьи ауи йайхІвтІ: уара
тамамта узакъвыцтІ. 44 АпхІвысгьи тшылзына-
йырхан, Симон йайхІвтІ: дубума уара ари ап-
хІвыс? Сара утдзы сгІашылтІ: уара дзы гьгІа-
сыуымттІ сщапІква рыхъаз, лара лыладзквала
сщапІква лджвджван лыбраквалагьи йлрыц-
къахтІ; 45 уара Сара бахІварала угьспымылтІ,
лара, сгІашылтІ уалаган, сщапІква рбарахІвра
гьашІалрысуам; 46 уара схъа азейтыншша⁶
йгьгІахьууымцттІ, лара хьщфГІвыпщдза сщапІ-
ква йырхьылцтІ. 47 Ауи акІвпта йуасхІвитІ уара:
йылзыргІвапІ лгванахІщардаква ауи, рыцІа бзи-
барамчы алыму ахъаз. МачІгьи ззыргІвахауа,
йбзибарагьи мачІпІ. 48 Ларгьи йлайхІвтІ ауи:
йыбзыргІвапІ быгвнахІква. 49 Йгьи йалагатІ

⁶ *Азейтын* — азейтынцІла — (оливковое дерево) — йа-
жвыз абазажвапІ.

йыцтшаз рхъа йархІва: дзачІыйа ари, агванаквагы йрызйыргІвауа? 50 Иисусгы йлайхІвтІ апхІвыс: базхъацІара бГІанакхъатІ, бца амамыр бымата.

ЙагІбахауа ахъа

1 Йгы йаъан: ауи амцтахъ Иисус дрылсуан акъалакви акыткви *Анча Йнуштара* агвыргъьарабыжьбзи йрылайхІвауа. Ауи йыцын ажвыгІвыгІв апхъагІвчагы, 2 агІвычвгъакви азгІвакви йырчвихчаз пхІвысквакІгы: Марийа, Магдалына – хІва йзпхъуз, быжьгІвычвгъакІ гІазылцІыз, 3 Иоаннагы, Ирод йымлыквнкъвгагІв Хвыза йтагвжва, Сусаннагы, датшагы щардагІвы, рымлыквла ауат йырцхърыгІвуз.

4 Зны угІащарда тшазыркІкІуа йаналага, акъалаква зымгІва рбзагагІвчва йанизгІайуаз, Иисус ашІырпшыгагІахІвахракІ йхІвауа далагатІ: 5 дтыцІтІ адгылрхаржъагІв йжвла аквипсарныс, данаквпсуз, ажвлаквкІ амгІва адзхъа йкІапІлан йгвычІахатІ, апсгІачІвквагы йырхъвшватІ. 6 АзджъакІ адгыл ахІакъвара йылашватІ, йгІакІылсын йгІвахтІ багІдзара рмауата. 7 АзджъакІ амыгъква йрылашватІ, ауаса амыгъква рыцгІайын йырхъватшытІ. 8 АзджъакІгы адгылбзи йылашватІ, йгІайын швныла тшыгІвра гІарылцІтІ. Ауи йхІвауа, йбжы гІайырдутІ: лымхІа зму йгІарныс, йгІарагІатІ.

⁷ *АшІырпшыгагІахвахра* — притча.

9 ЙапхъагІвчвагъи йцІгІауа йалагатІ: ари ашІырпшыгагІахІвахра йгІаныцІуа ачІвыйа? 10 Йаргъи йхІватІ: швара Анчва Йнурштара ацІакІыраква йыжвдырныс йшвытпІ, анахъанат рыхъаз ашІырпшыгагІахІвахрата, йырбауата йшырзымбуш, йыргІауата – йшырзалмыргуш. 11 Абар, ашІырпшыгагІахІвахра йгІаныцІуа: ажвла Анчва йажва акІвпІ. 12 АмгІва йадзхъу – йызгІаз ракІвпІ; ауи амцтахъ Иблыс дгІаитІта ажва ргвы йгІатихитІта йджвыквигитІ, йазхъарцІата йышгІамхчахуш. 13 АхІакъвара йылашваз, — йзгІата йгвыргъъауа ажва назахвыз ракІвпІ, ауаса щайдза гърымам; ауэт заманайшыскІла йазхъарцІазтІхІва, архъвыхраква анырзгІайра йгІатхъахитІ. 14 Амыгъ йылашвазгъи – йызгІаз ракІвпІ, ауаса абазара амгІва апны йхъватшхитІ ауат ахъгвыргІвараквала, абайарала, абазаратхаджъраквала: ртшыгІврагъи йгъзауам. 15 Адгъылбзи йылашвазгъи – ажва згІата згвхІалаль йтазкІуа ракІвпІ, чхІара рыма атшыгІвра ззгІащаквыжъуа.

16 Заджвгъи, ачвамза айыркІыта, ауи цІыквла йгъхъигІвахуашым йа ачвартагъвы ацІахъ йгъыцІайыргылхуашым, мамо, ауи хІгІата йыквдыргылитІ, йгІашылуа алашара шырбуш ахъаз. 17 Ауаса йгъаъам къачІвахыракІгъи, йгІацІымцІхуаш, йгъыъам цІакІыракІгъи агвы йгІаквмылхуаш. 18 Ауи акІвпІта, швапшы швшаздыргІвуа. Ауаса йзыму, ужвыгъи йытхуштІ, йзымамгъи, йымазшва йбауагъи йыквххуштІ.

19 Йгъи йызгІайтІ Ауи йани йайщчви, йгъи йгъзынамскІятІ Йара йпны аугІа ажвпІара ры-

хъаз, 20 йгъи йдырдыртІ Ауи: уани уайщчви гІайын апахъ йгылапІ, уырбара ртахъыта. 21 Йаргъи джъауапта ауат йриттІ: йсану йгъи йсащу – Анчва йажва йаздыргІвуа йгъи йзырхъйауа ракІвпІ.

22 Йгъи йаъан: Ауи йапхъагІвчвагъи йыцта акІъанджъа даквчІватІ; йгъи йрайхІвтІ ауат Ауи: адзгъагъа анахъани атшпы хІахъыспІ. Йгъи йццатІ. 23 Йанццуз азаман, Ауи дычвтІ. Йгъи йгІащтІыцтІ пшахъванчыкІ, ркІъанджъагъи адзы йгІатаначвауа йалагатІ, даргъи ашварагІвара йалашватІ. 24 Йгъи йыдзхъагылын, дгІадыршыхан Ауи йархІвтІ: ХІымгІваквцІагІв! ХІымгІваквцІагІв! ХІыдзитІ. Йаргъи дгІашшыхан, апшагъи ачквырпаквагъи⁷ унашва рзичпан, даргъи тшщаквыркІыхтІ, зымгІвагъи тынчхатІ. 25 Йаргъи ауат йрайхІвтІ: йабаъу швара швазхъацІара? Даргъи швари джъащари рыма аджв аджв йайхІвхуан: дзачІвыйа щта Ауи, апшагъи адзгъи унашва рзызчпауа, даргъи йыздыргІвуа Ауи?

26. Йгъи йазнайтІ ауат Гальильейа йазрейшу Агъерасин къраль. 27 Ауи адгъыл даннаквгыл, акъала йауаз гІвычІвгІвыскІ дгІайпыралтІ, агІвычвгъаква зылаз; щардагъи цІуата ауи чгІвыча гъынкъвйымгузтІ йгъи атдзы дгъымбзазузтІ, анышвынтарахІахъквва дрыцІапхъун. 28 Иисус даниба, ауи дгІагІвагІгІын, йщапквва тшгІарыцІайрышвын быжъдула йхІватІ: ачІвыйа Уара йысзутахъу сара, Иисус, ЗымгІвирайхІу

⁷ Чеквырна – йажвыз абазажвапІ – толкъвын (трыквважвапІ).

Анчва Йпа? СнауыхІвѣтІ Уара, джѣбагаІа сумыр-
 бан. 29 Ауаса унашва азичпун Ауи агІвычвгѣа
 йгІайылцІныс ауи агІвычІвгІвыс: ауаса сквшщар-
 да цІуата агІвычвгѣа дгІайкІуан ауи; аркъанла-
 гѣи пшвахІвлагѣи дшІархІвун йгѣи дырхчун;
 ауаса ауи йшІахІвагаква ашІижвжвун, агІвычв-
 гѣагѣи акѣвымырта дарцун. 30 Йгѣи дицІгІатІ
 ауи Иисус: уыхъыз ачІвыйа? Йаргѣи йджѣауап-
 хатІ: Лъегѣион, йауа ухІварыквын гІвычвгѣа-
 щарда йылалтІ ауи. 31 Йгѣи йгІайыхІвауа йала-
 гатІ ауат, унашва рзыйымчпарныс цгІвадарта
 йшйымщтиуаш. 32 Ауаѣа ашІыгІвгІвырта адз-
 хѣа йхІвуан хІвахІвычадукІ. Йгѣи йыхІватІ Ауи
 ауат йырхвитныс ахІваква йрылалныс. Йгѣи йыр-
 хвиттІ. 33 Йгѣи йгІайылцІын агІвычвгѣаква
 агІвычІвгІвыс ахІваква йрылалтІ, ахІвахІвычагѣи
 ашІыгІвгІвырта тшгІатарпсан адзыгѣагѣара
 йахѣватштІ. 34 Ауи збаз ахІвахчагІвквагѣи,
 йыгІвын акѣали акыткви йрархІвтІ йгІаншаз.
 35 Йгѣи йгІатыцІтІ аугІа йапшныс йгІаншаз,
 йгѣи йызгІайтІ Иисус, йгѣи дгІараутІ агІвычв-
 гѣаква гІазлыцІхыз агІвычІвгІвыс, Иисус йщапІ-
 ква рпны дчІвата, дгІвычата йакѣыльгѣи згІва-
 дата, йгѣи шварадукІ гІарылалтІ. 36 Йгѣи йрар-
 хІвтІ ауат йызбаз, агІвычвгѣа гІаздыслыз дшгІах-
 чахаз. 37 Йгѣи йыхІватІ Ауи Гадарин акѣраль
 аджѣамгІат зымгІва дыркѣвыцІныс, йауа ухІвуз-
 тын ашвараду йаман. Йаргѣи, акІѣанджѣа дакв-
 чІван, дхъынхІвыхтІ. 38 АгІвычІвгІвысгѣи агІвы-
 чвгѣаква гІазылцІыз, дйыхІвун Ауи дйыщызлар-
 ныс. Ауаса Иисус дауищтхын ауи йгѣи йайхІвтІ:
 39 ухъынхІвыхта уыунагІва йгѣи йрахІв, Ан-
 чва уара уыхѣаз йчпаз. Йаргѣи дцахтІ, акѣала

апны зымгІва йрайхІвуа, Иисус ауи йыхъаз
йчпаз.

40 Иисус дангІахъынхІвых угІажвпІараду
гІайпылтІ, йауа ухІвузтын Ауи зымгІва йыз-
пшуан. 41 Йгьи абар, Иаир — хІва йыпхъауа
заджв дгІайтІ. Ауи аджъутныхІварта апны
дахІбан. Иисус йцапІква рпны тшкІайрышвын,
дйыхІвун Ауи йыунагІва днашылныс, 42 йауа
ухІварыкІвын жвыгІвсквшаквакІ дыртата пхІа-
заджвыкІ дйыман, ауи дпсуашта дщтІан. Иисус-
гьи данцуз, аугІажвпІара тшвара гІандыршатІ.
43 ПхІвыскІгьи, жвыгІвсквша цІуата ща гІаз-
къвыцІуаз, арбзихагІвчва йрыквылрыдзтІ млы-
квта йлымаз зымгІва, ауаса заджвгьи дгъйыз-
мырбзихатІ, — 44 йыцтахъла днейын, Ауи
йчгІвыча ахІапа дахъыстІ, йара ауи асахІатгьи
аща ашІастІ. 45 Иисусгьи йхІватІ: дзачІвыйа
йгІасхъысыз? Ауаса зымгІвагьи йшихъымсыз
дрыбагъун, Петргьи йыцквазгьи йырхІватІ:
МгІваквцІагІв, аджъамгІат угІакІвдыршатІ йгьи
йцІагвитІ. 46 Иисусгьи йхІватІ: заджв дгІас-
хъыстІ; ауаса акъару шсылцІыз здыртІ. 47 Ап-
хІвысгьи, йылбан штшылзыцІамкІыз, дкІъазызуа
дгІайыдгылын, йцапІква рпны тшкІалрышвын,
аугІа зымгІва йшыргІуз йлхІватІ, дыззихъысыз
Ауи йара ауи асахІатгьи дшырбзихахаз. 48 Йар-
гьи йлайхІвтІ: бгвышхва, атпхІа! БазхъацІара
бгІанахчатІ бара; бца агвтынчагІа мамыр быма-
та. 49 Иисус ауи анихІваркІвуз, аджъутныхІварта
ахъада йахъыла заджв дгІайын йхІватІ: упхІа
дпсытІ; ауи ахІа дуымрагІапсахын АрыпхъагІв.
50 Иисусгьи йанигІа, джъауапта йыйттІ ауи:
уымшван, йазхъацІа заджвыкІ, йгьи дгІахча-

хуштІ. 51 ЙыунагІвагы дангай, Ауи йгыймырхвиттІ йыцнашылныс, Петр, Иоанн, Йаков, апхІвыспахвыц лани лаби ракІвмызтын. 52 ЗымгІвагы чІвыуан ргвтшпква йрысуа ауи лыхъаз, ауаса Ауи йхІватІ: швымчІвыуын; ауи дгъымпсытІ, дычвапІ. 53 Йгьи йылахъыччун Ауи, дшпсыз рдыруанта. 54 Йара, ауи лнапЫ йкІын, быжьдула йхІватІ: ссаби, бгІагыл! 55 Йгьи йгІахъынхІвыхтІ лпсы, йарауи асахІатгьи дгІагылтІ, Йаргьи унашва йчпатІ ддырчарныс. 56 Лангьи лабагы йджъарщатІ. Йаргьи ауат унашва рзищпатІ йгІаншаз заджвгьи йарымхІвныс.

Йжвбахауа ахъа

1 ЙжвыгІвыгІвапхъагІвчвагы йгІазшІитын, йриттІ ауат къаругьи хъгалрагы агІвычвгъаква рылырцарныс йгьи азгІваква дырбзихарныс, 2 йгьи йцтитІ Анчва Йнурштара рылархІварныс йгьи ачымазагІвква йрыхъварныс. 3 Йгьи йрайхІвтІ ауат: мгІва шваныквылуа закІгьи нашвмахвын: лабацІарысгьи, артмакъгьи, чІахъвагы, ахчагы, гІвасыкІгьи швымамызтІ. 4 Тдзыта швъанашыллакІгьи, ауаъа швгІанха, ауыла швгІаджвылцІта мгІва швыквылх. 5 Швъадымрайгвауа апны, — акъала швагІатыцІхта мгІва шваныквылхуа, швщапІква йгІарыквнахІваз асабанадзара швыршвшвах ауат йышрыквшвахІатхуш. 6 Йгьи йыквылуан ауат мгІва, акытквагы йрылсуан Анчва Йнурштара аунашва дыртауа, йъакІвызлакІгьи йрыхъвауа.

7 Ауат агІаншараква зымгІва рхабар йгІатІ атетрарх⁸ Ирод йгы йгызалмыргузтІ, ауаса азджьакІ Иоанн дгІабзагылхта рхІвун, 8 азджьакІ, Илия дгІаншата, азджьакІгы, афигІамбарыжвква заджвы дгІабзагылхта. 9 Иродгы йхІватІ: Иоанн йхъа хъысхтІ. Дызда щта Ари, Зыхъазла ауатква згІауа? Йгы дазыпшшгІвун дибарныс йтахъыта.

10 Апостолквагы ангІахъынхІвых, йархІвтІ Ауи ауат йырчпаз. Йгы йыцнайахвын ауат, Ауи анахъанат дгІаркъвыцІын, Вифсаида – хІва зхъыз акъала ахыла дымгІвайстІ. 11 Ауаса аугІа йанырдыр, йыщта дырцатІ, Йаргы ауат гІайраргванын, Анчва Йнурштара ахъаз йрайхІвуан, арбзихара зтахъугы йырбзихун. 12 Амш ахшам тшазначпауа йалагатІ; АжвыгІвыгІв гІайыцхъагылын Ауи йархІвтІ: аугІа амцІыщтх, акытаргванква йыщцуш апш, хъапхъартагы фачІвгы шгІарауаш, йауа ухІварыкІвын хІъану угІадарапІ. 13 Ауаса Йара ауат йрайхІвтІ: швара йрышвт ауат йырфуш. Даргы йырхІватІ: хІара хвчІахъвакІи гІвпслачвакІи рахІа гъхІымам, хІцата арат аугІа зымгІва рыхъаз фачІвы хІымхвгІушызтын. 14 Ауат ахъачвагІвацаква хвынзыкыгІв раъара йнадзун. Ауаса Йара йарыпхъагІвчва йрайхІвтІ: угІашвбжакІшвбжакІмцара кІыдакІыда йалашвырчІва. Йгы йырчпатІ ауаса, зымгІвагы йаладырчІватІ. 16 Йгы йнайахвын ахвчІахъвакІи агІвпслачвакІи, Ауи ажвгІвандла йылаква хъайгылын

⁸ *Тетрарх* – апаштахІра пщбачІвыта азакІы анапІыцІагІв.

даквхІвахІвын йгъи йакъвитшуамца йапхъа-
гІвчва йритуан аугІа йырзыршарныс; 17 Йгъи
чатІ, зымгІвгъи нахъатІ. Йгъи йгІархъшвалхыз
атшытква жвыгІвмартанкІ рызна азыркІкІыхтІ.

18 Йгъи йаъан: Ауи угІадартакІ данныхІвуз,
апхъагІвчвагъи йара йыцын йгъи дырцІгІатІ
Ауи ауат: йсмагІныта йырпхъадзауа аугІа сара?
19 Ауат йырджъауапхатІ: Иоанн АдзыцІщыгІвта,
азджъакІгъи Илия йакІвта, анахъанатгъи — аза-
маныжвдзаква рагІан йпсыз фигІамбаркІ дгІа-
бзагылхта. 20 Йгъи йрайхІвтІ ауат: швара йсмагІ-
ныта йышвпхъадзауайа? Петр йджъауапхатІ:
Анчва Ймессийата. 21 Ауи багъята унашва
рзичпатІ заджвгъи йарымхІвныс ауатква, 22 ара-
са йхІван, агІвычІвгІвыспа гІазабщарда йпырапІ,
ахІбауасаражвквагъи апщагІвахІбачвагъи⁹
акътапарыпхъагІвчвагъи дгъыруашым, йгъи
дщхуштІ, йгъи йхымшкІхауа дгІабзагылхуаштІ.
23 ЙрайхІвуан Ауи зымгІвагъи: Сара сцІыхъва
йнаатагылта йнайныс зтахъу, йхъагъи йхъира-
штылргІатІ, мшигІадзагъи йджъуар найахвыр-
гІатІ, йгъи дсыщтанйыргІатІ Сара. 24 Ауаса, зпсы
зхчарныс зтахъу, йрыдзуаштІ ауи; Сара сыхъаз
зпсы зрыдзуагъи, йгІайхчахуаштІ ауи. 25 Ауаса
сабапта йымайа агІвычІвгІвыс, адуней зымгІва
гІайыцІайкІта йара йхъа анирыдзра, йа даназа-
рархара? 26 Ауаса, Сара йысчвпхащцауа, Сара
сажвагъи, агІвычІвгІвыспа дгІайчвпхащущтІ,
йыртшхъвара йымата дангІайра, Йабагъи, аших
малаикъкьвагъи. 27 ЙшвасхІвитІ тамамта: йаъапІ

⁹ ПщагІвы — священник.

араѣа йгылу азджѣакІ, апсра зылымшуш *Анчва*
Йнуриштара рымбакаІва.

28 Йгьи йаѣан ауат ажваква рымщтахъ
аГІмышкІ анцы: Иисус Петр, Иоанн, Йаков
найахвын, ахва дныхІарныс дхѣалтІ. 29 Ауи
данныхІвуз, йшлахѣа аквпшыра датшахатІ,
йчГІвычагьи уарлашвуа йшкІвокІвасышхатІ. 30
Йгьи абар, гІвхѣацІакІ Ауи йачважвун. Ауат
Моисейи Ильи ракІвын. 31 Артшхѣвара йалата
йГІаншан, ауат йалачважвун Ауи йхъын-
хІвыхра, Иерусалим апны йчпара атахъыта
йпыру. 32 Петргьи йыцквазгьи цІолата ачва
йалан; ауаса, йанГІашІыха йырбатІ Ауи йыр-
тшхѣвара йгьи йыцхѣагылаз гІвхѣацІакІ. 33
Йгьи йаѣан: ауат Ауи йаникѣвыцІхуаз Петр
Иисус йайхІвтІ: ХІымГІваквцІаГІв, бзипІ хІыхѣаз
араѣа хІаѣазларныс, йыхІчпапІ хтыпкІ: азакІы
Уара, азакІгьи Моисей, азакІгьи Ильѣа — йым-
дыруата, ауи йхІвауа. 34 Ауи ауатква анихІвар-
кІвуз, пстхІвакІ гІаншан йхѣнаГІватІ ауат; йгьи
йшватІ ауат апстхІва йанылал. 35 БжъыкІгьи
гІалгГІатІ апстхІва: Ари *Сара ДспагІалкІгІа-*
гІвнІ; Ауи швйыздыргІвы. 36 Абжъгьи анга,
Иисус йатаркІвах йхѣазхатІ. Даргьи закІгьи
гърымхІвузтІ ауат амшква раГІан, ауи йырбаз
ауаѣа.

37 Йгьи йаѣан: уадыргІвана атшын, ауат ахва
йанГІабгѣалх, йГІайпылтІ Ауи угІажвпІарадукІ.
38 Йгьи абар, гІвычІвГІвыскІ аугІажвпІара дГІа-
рылцІыргІатІ: АрыпхѣаГІв, снауыхІвахитІ спа
уипшныс, йауа ухІварыквын ауи сара дспа-
заджвыкІпІ. 39 Йгьи абар, аГІвычвгѣа дГІанакІитІ

ауи, зынлагъи дгІацІритІ, ахвачагъи дакІитІ
 йджвджвы гІайшыцІуа, дгІанарагІапсауа, агІы-
 ла дгІайкъвыцІитІ ауи. 40 Саргъи срыхІватІ Уара
 уарыпхъагІвчва йгІайылырцаныс ауи, даргъи
 йгъырхъамыкІытІ. 41 Иисусгъи йджъауапхатІ: оу,
 ужвгІанчІви аугІаква, азхъацІара змам йгъи
 йацакІу, зъара сшвыцызлара йгъи швсчхІара
 атахъыйа? ДгІад арахъ упа. 42 Ауи дангІайыц-
 хъагылуазгъи, агІвычвгъа ауи атшыла дкІай-
 къъан ахвача дайыркІытІ. Ауаса Иисус агІвы-
 чвгъа гъйымырхвиттІ йгъи дйырбзихатІ ачкІвын
 йгъи дйыйтхтІ йаба. 43 Йгъи йджъарщун зым-
 гІвагъи Анчва йщтІыхра.

ЗымгІвагъи Иисус йчпуз анджъарщуз, Ауи
 йапхъагІвчва йрайхІвтІ: 44 швлымхІаква йыр-
 ташвкІы арат ажваквa йшвасхІвуа: *АгІвычІе-
 гІвысна* аугІа рнапІква дрыцІацІахуштІ. 45 Ауат-
 гъи йгъгІаргІвнымгІвуазтІ йхІваз ажваквa, ауи
 амагІны ауат йырчвыцІакІын, йгІаргвнымгІвныс
 ахъаз. Йгъи йшвун ауат йхІваз йазцІгІарныс.

46 Йгъи йгІаншатІ ауат руацІа къайгъыш-
 ра, рыуа рыцІа йайхІу. 47 Иисусгъи ауат ргвта-
 хъвыцпраквa йдыруа, асаби дгІайахвын, йыдзхъа
 дгІайыргылын 48 йгъи йрайхІвтІ ауат: ари аса-
 би Сара сыхъызла дызраргвануа, Сара сирар-
 гванитІ, Сара сызраргвануагъи, СгІазщтийыз ди-
 раргванитІ. Ауаса швыуа зымгІва рацкІыс йхвы-
 цу, – дайхІапІ. 49 Иоангъи Иисус йайхІвтІ:
 ХІымгІваквцІагІв, хІара дыгІбатІ гІвычІвгІвыскІ,
 Уара уыхъызла гІвычвгъа рылызцауа, йгъи дгъи-
 хІмырхвитуазтІ ауи, йауа йхІварырквын ауи
 дыгъуыщтанайгІвым Уара хІара дхІыцта. 50

Йгъи йайхІвтІ ауи Иисус: швипырамсын; ауаса швара йшвпшІагылам, швара дшвылапІ.

51 Йгъи йаъан: Ауи гІарщ данхъагылхушыз амшква рцІыхъва гІадзун йгъи йщаквйыргылтІ, Ауи Иерусалим дцаныс, 52 йгъи йауищттІ йапхъала ащтийыгІвчва. Йгъи йцан, ауат Самарит-йан кыткІ йталтІ, Ауи йгІайра ахъаз зымгІва дрыхІазырныс. 53 Йгъи дгъдымраргвантІ Ауи, йауа ухІварыквын йымгІва Иерусалимла йнархан. 54 Ауи збаз, йапхъагІвчва Йакови Иоанни йырхІватІ: ХІыхвитыгІв, йутахъума хІара йыхІ-хІвапІ: агІарщла амца шгІалбгІуш ауат йыквнахныс. 55 Ауаса Ауи дгІацапан йгъйымырхвиттІ ауат. 56 Йгъи йджвыквылтІ датша кыткІ.

57 Йгъи йанцуз ауат, амгІва апны заджвы Ауи йгІайайхІвтІ: сара Уара уъацалакІгъи уцІыхъва стагыла снайуаштІ. 58 Йгъи йайхІвтІ ауи Иисус: абагаквагъи апсгІачІвквагъи гІвара рымапІ, ауаса *АгІвычІвгІвысна* йхъа ъаквицІушгъи гъйымам. 59 Датшазаджвгъи йайхІвтІ: Сара сцІыхъва унатагылта унай. Ауыгъи йхІватІ: ХІыхвитыгІв, сырхвит апхъапхъа сцата саба дыцІасцІарныс. 60 Иисусгъи йайхІвтІ ауи: йырхвит апсчва рпсчва йыцІарцІахныс. Уаргъи уца *Анчва Йнуштара* уаунашванкъвгаха. 61 ЙхІватІ датшазаджвгъи: сара суыщтанайуаштІ Уара, ХІыхвитыгІв, ауаса апхъапхъа сырхвит сцриква тшдсырбарныс. 62 Иисусгъи йайхІвтІ ауи: заджвгъи, знапІы акІватан ащхъва йаквызцІата йыщтахъла йацапшхуа, *Анчва Йнуштара* ахъаз дгъауашым.

Йжвабахауа ахъа

1 Ауи амщтахъ йыргылтІ ХІыхвитыгІв да-
тшагы хынгІважвижваба, гІвыджьгІвыджьгы
йацицІан йапхъала йауищттІ, Йара дъацара йта-
хъыз акъалакви ашыпакви, 2 йгы йрайхІвуан
ауат: атшыгІврацІагахра щардапІ, анхагІвчва
мачІыгІвпІ; ауи акІвпта атшыгІврацІагахра
Апшвыма швйыхІва анхагІвчва йшищтиуаш
Йара йтшыгІврацІагахра апны. 3 Швца! Абар,
швщтитІ швара, асараква аквыджьмаква
йшрыларжъуа апш. 4 Йшвыцнкъвжвымган чан-
тагы, багІвчагы, щапІхъацІагы, амгІва апын-
гы заджвгы салъам йышвымтын. 5 Тдзыта
швызнашыллакІгы, апхъапхъа йшвхІва: «ари
атдзы мамыр азгІайыргІатІ». 6 Йгы даъазтын
ауаъа амамыр йапсу гІвычІвгІвыс, швмамыр ауи
йызгІайуаштІ; момызтын, йшвзыгІахъынхІв-
хуаштІ. 7 Ауи атдзы апынгы швгІанха, йрыму-
гы швфа, йшвыжв: ауаса анхагІвы йгвыргъа-
ранхаша дапсапІ. АтдзыкІ швгІаджвылцІуа,
атдзыкІ швнашылуа — ауаса швымчпан. 8 Къа-
лата швъаталлакІгы, — швдрайгвузтын,
йгІашвыртуа швфа, 9 чымазагІвта йыгугы
швырбзиха йгы йрашвхІв: «йшваргванпІ *Ан-
чва Йнуришара*». 10 Къалата швъаталакІгы,
— швдымрайгвузтын, ауи аурамква швгІаквыл-
та йшвхІва: 11 «асабагы, хІщапІква йгІар-
кІынхалыз швыкъала апны, хІара йшвы-
кІынхІыршвшвахитІ; ауаса йжвдыр, аргваныпІ
Анчва Йнуришара ». 12 ЙшвасхІвитІ швара, ауи
амш агІан Содом рыцІа йазымайрахуштІ ауи
акъала ацкІыс. 13 ЧІвыуара уызгІайитІ, Хора-

зин! Чыуара уызгайтI, Вифсаида! Ауаса, Тири Сидони рпны йчпахазарквын ауат аджъаща-хъвараква, швара швпны йчпахаз, ауат машаквыжв ршвырцIата ахъва рыквырпсата йтарым-щаIауа йгIахъынхIвыхуашын. 14 Ауаса Тири Сидони рыцIа йырзымайрахуштI ахIаквымхара апны, швара швацкIыс. 15 Уаргьи, КIапернаум, гIарщдза тшцтIызхыз – джъахIанамдза укIынцIахуштI. 16 Швара йшвыздзыргIвуа Сара дсыздзыргIвитI, швара швзрыхъарауагьи Сара сыхъаритI, Сара сызрыхъарауагьи СгIазщти-йыз дыхъаритI.

17 АхынIважвижвагIвгьи йгвыргъауа йгIа-хъынхIвыхын йгьи йархIвуан: ХIыхвитыгIв, агIвычвгъаквагьи хIыздзыргIвитI унашва аныр-зыхIчпауа Уара уыхъызла. 18 Йаргьи йрайхIвтI ауат: Сара йзбатI Ибльис ацмачвысрата ажв-гIванд дшгIакIашваз. 19 Абар, Сара йшвыстI хъгалра ацтанчIвкви ацIларцIыгъькви швры-квпарныс, агъачва рымчхъара зымгIва швыр-гвыквсныс; йгьи гъшвызарархушым швара закIгьи. 20 Ауаса швамайгвыргъан агIвычв-гъаква гъшвыздзыргIвуа, швзайгвыргъуш гIарщ апны швыхъызква агIву акIвпI.

21 Ауи асахIат Иисус Дыхв Шйыхла дгIатырчвгIахан гвыргъарала йгьи йхIватI: ртшхъвара уыститI Уара, Саба, ажвгIванди адгыли Апшвыма, Уара йъагIарчвыцIаукIыз ауи ауасаражвкви агвыбзыгъагIвчви йгьи йъагIар-зыхъутIыз асабипшкаква. Щта, Саба, ауаса йаъан Уара утахъырабзи. 22 ЗымгIва Сара йгIасна-пIыцIайцIатI Сара Саба; заджвгьи йгидырам Апа ймагIну, Аба йакIвымкIва; Аба ймагIнугьи за-

джвгъи йгъидырам, Апа йакІвымкІва, йгъи
йыззыхъитІныс йтахъу Апа. 23 АпхъагІвчвагъи
тшырзынайырхан кІыдата йрайхІвтІ: насып ду
рымапІ алаква швара йжвбауа збауа. 24 Ауаса
йшвасхІвитІ швара: фигІамбащарди патшахІ-
щарди йырбара ртахъын швара йжвбауа, ауаса
йгърымбатІ, йыргІара ртахъын швара йжвгІауа,
ауаса йгърымгІатІ.

25 Йгъи абар хъабзарыпхъагІвкІ дгІагылын,
дйырхъвыхуа Ауи йхІватІ: АрыпхъагІв, сара
йсчпара атахъыйа, цІхъва змам абазара саура
ахъаз? 26 Иисусгъи йайхІвтІ ауи: Анчва йща-
квыргылра йшпану? уышпагІапхъауа? 27 Ауыгъи
йджъауапхатІ: *«Бзи дба ХІыхвтыгІв, уара Уын-
чва, угвылагъи, упсылагъи, къарута йуыму
зымгІвалагъи, уакъыльлагъи», «йуаргванугъи,
уара ухъа шубауа апшта»*. 28 Иисусгъи йайхІвтІ
ауи: уара тамамта джъауап гІауттІ: ауаса йчпа-
лата убзазуштІ. 29 Ауаса ауи, тшырытамамра
йтахъыта, Иисус йайхІвтІ: дзачІвыйа сара сар-
гван? 30 Иисусгъи йарауи асахІат йаджъа-
уапхатІ: дцун заджвы Иерусалим дтыцІын Иери-
хон йгъи дырнапІыцІашватІ ахІаджъратквa; ауат
ауи ддыртІлатІ йгъи дырхвйтІ, йгъи дпсбзахым-
кІва дгІащтІаржъын йджвквылхтІ. 31 Ауаса йа-
лын, ауи амгІвала пщагІвыкІ дцун, йщтІаз да-
ниба, дйыгІвсын дымгІвайстІ. 32 Йарауаса алье-
витгъи, ауаъа днадзата даниба, днаскІатІ, дип-
шын дйыгІвсын дымгІвайстІ. 33 СамаритгІв-
кІгъи, мгІва йыквыз, ауи дихъанагата даниба
дйымарыцІахатІ, 34 йгъи днаскІан, йхвырта-
квa гІвадзыйи азейтынхвшии йаквичвымца
йшІайхІватІ; йтшадагъи даквйырчІван асасыр-

та дГІайгын дихьпшуан; 35 анахьани атшынги, мгІва дыквылуата, гІвдинарийкІ гІатихтІ асасыр-та зчІвыз йыйтын йги йхІватІ: «ари уихьпшы, йуыстуа айхІа йыквурьдзуазтын, сангІахъын-хІвыхра йуыстхпІ». 36 Йышпазубауа, дзачІвыйа ауатахыгІв рыуа рыцІа йаргваныз ахІаджьратква йырнапІыцІашваз? 37 Ауи йхІватІ: йрыцхІаща йагІвымсыз. Исусгыи йайхІвтІ ауи: уца, уаргыи ауаса йчпала.

38 Ауат рымгІвайсра йаналаз азаман Ауи кыткІ днарылалтІ. ПхІвыскІгьи, Марфа-хІва зхъыз, лтдзы дылрайгватІ. 39 Ауи ахщакІгьи длыман, Марийа – хІва йызпхъуз, ХІыхвитыгІв йщапІква рпны дчІвата йажва йаздзыргІвуа йа-лагаз. 40 Марфагыи амацІаура-нагІвгІагІвраква дрылан. Ауи дгІаскІан йги йылхІватІ: ХІы-хвитыгІв, Уара уыс гъазуымамма, сахща снагІв-гІагІвраква рпны схъазы сьагІанылжъыз? ЙлахІв ауи, сара дшгІасцхърагІуш. 41 ХІыхвитыгІвгыи джъауапта йлыттІ ауи: Марфа, Марфа, бара щарда бахъгвыргІвитІ йги бахъпшитІ, 42 йара закІзаджвыкІ акІвпІ йатахъу: Марийагыи йгІа-лылхтІ хъвхІалаль, ауи йлыквымххуш.

Йжвизхауа ахъа

1 Йги йаъан: Ауи зджъара дныхІвата да-налга, йапхъагІвчва рыуа заджвы йайхІвтІ Ауи: ХІыхвитыгІв, хІаргыи хІызныхІвауа хІбжъа, Иоанн йапхъагІвчва шибжъаз апшта. 2 Исус-гыи ауат йрайхІвтІ: шванныхІвауа араса йшвхІва: ХІаба! ЙщтІыххаргІатІ Уара уыхъыз. ЙгІайыр-

гІатІ Уара Унурштара. 3 ЙахьчІвала хІызла-
бжахауа хІчІахъвагьи йгІахІутныс хІнауыхІвитІ
мшигІадзагьи. 4 ХІыгвнахІква хІзыргІва, хІара
дзачІвызлакІгьи хІпсарчІвы зкву йышйыз-
хІыргІвауа апшта. Апышварагьи хІтаумыргы-
лын, амцхІвагІвгьи (Иблис) хІичвыхча. 5 Йгьи
йрайхІвтІ ауат: дызда швыуа гІвза дызмата, йгьи
данйызгІайта ауи цІыхквта йангІайайхІвра:
«сыгІвза, псарчІвыта хчІахъвакІ гІасыт, 6 йауа
ухІварыквын, мгІва йгІаквцІыз сынбжъагІв
дсызгІайтІ, саргьи йызлайчІасхІуаш гьсымам»;
7 ауыгьи ауацІала джъауапта йгІайыйтхитІ: «уыс
салауымцІахын: сышв аркІхъапІ, ссабиквагьи
саргьи хІцтІалххъатІ; сгьызнагылуашым йгьи
йыгьсызуытуашым», — 8 йшвасхІвитІ швара:
ауи дгІамгылыргьи нбжъагІвцІасрала йгІайы-
йымтыргьи, ауаса дъайцрымцІуа ахъаз дгІагыл-
та йтахъу зымгІва гІайыйтуаштІ. 9 Саргьи
йшвасхІвитІ швара: швахІва, йгьи йшвытхуштІ;
швазыпшгІа йгьи йшвауаштІ; швасла йгьи
йшвзагІартІуаштІ. 10 Ауаса дзачІвызлакІгьи
йахІвауа йытхитІ, йпшгІауагьи йгІайауитІ,
йасуагьи йзыгІартІитІ. 11 Швыуа дзачІв абайа,
йпа чІахъва данахІвара, хІахъвы йызызрауаш?
МомкІва, пслачва, — йаргьи, апслачва атара,
ацтанчІв йызтуаш? 12 МомкІва, квтІагъь дана-
хІвара? АцтанчІвы йызтуаш? 13 Ауи акІвпта,
швара, ачвгъара нкъвыжвгауата, швсабиква аб-
зираква аншвызрытуазара, агалагьи йайхІапІ
АгІарщ Аба йгІаритуаштІ Адыхв Шйых Ауи
йыхІвауа.

14 Йгьи гІалыйцун Ауи агІвычвгья; агІвы-
чвгьягьи шІамчважван. Йгьи йаъан: агІвычвгья

анГайылцІ ашІамчважва дчважвуа далагатІ;
аугІагъи йджъарщун, 15 ауаса азджъакІгъи йыр-
хІватІ: Ауи агІвычвгъаква злагІарылицауа Ве-
ельзевул йакІвпІ, агІвычвгъаква рхъада. 16 Ана-
хъанатгъи, ддырхъвыхуа, дкІыдыркІылуан
гІарщла йгІалбгІуш адырга дйырбарныс. 17 Йар-
гъи, ауат рхъвыцраква йдыруата, йрайхІвтІ:
йамГанхІвынтккІаразлакІгъи, агъарала йагІв-
шахауа, мцырахуштІ, атыдзгъи ачвгъара ъагІвна-
луа, йалпІлахитІ. 18 Ауаса аркъванчагІвгъи да-
гІвшахузтын, йхъа дапшІагылхуазтын, дышпа-
гІащаквхуш? Шваргъи йшвхІвитІ, Сара Веель-
зевул йымчрала агІвычвгъаква йгІарылсцауата.
19 Ауаса Сара Веельзевулла йгІарылсцузтын
ауат, швара швпачваква йызлагІарылырцауайа
агІвычвгъаква? Ауи акІвпта ауат швара йшвхІа-
квымхагІвхуштІ. 20 Ауаса Сара Анчва йнапІы-
лазтын агІвычвгъаква злагІарылсцауа, – ауи ас-
хъан, йшвзынадзатІ швара Анчва Йнурштара.
21 Амчхъа йабджъар йымата йтдзы анихчауа,
йымлыкв хчахитІ. 22 Ауаса йара йацкІыс йым-
чхъу дгІайгвыквста дйайгІайырквын, ауи асхъ-
ан йнайахвитІ ауи дзайгІайыз дзайгвгъуз йаб-
джъар, йгъи йагІвишитІ йчвнаихвыз. 23 Сара
йсылам, Сара дгІасапшІагылитІ, Сара йсыца-
зымкІкІуагъи, дхъылапситІ. 24 АгІвычвгъа
агІвычІвгІвыс йанГайылцІра, акъвымраквала
йамдитІ, атшыртынчра йазыпшгІауа, йгъи йана-
маура, йахІвитІ: «сазцахпІ сгІазджвылцІыз
стдзы»; 25 йгъи йанГайра, йгІанайауитІ ауи
атдзы йпсата йгъи йалыргата; 26 ауи асхъан
йаргъи йцитІта, йгІанауахвитІ датша гІвычв-
гъагъи, йара ацкІыс рыщІагъи йчвгъата, быжь-

пхъадзаракІла, йгъи йнашвылитІта, ауат ауаѣ
йгІагІвнахитІ, ауи агІвычІвгІвыс йыхъазгъи
йцІыхъвахауа рыцІагъи йзайчвахитІ.

27 Йгъи йаѣан: Иисус ауи анихІвуз, пхІвыскІ,
аугІажвпІара дгІарылцІыргІауа, йылхІватІ: на-
сып ду лымапІ зуацІа уынкъвнагаз, зкІыкІах
уагІаз. 28 Йаргъи йхІватІ: рахІагъи насып ду
рымапІ, Анчва йажва згІауа йгъи йзырхъйауа
ауи.

29 АугІа разкІыра щардахауа йаналага, Ауи
ауат йрайхІвуа далагатІ: ари абанпара — амц
йнануахвыз абанпарапІ. Ауат дырга йазып-
шгІитІ, ауаса дырга гърытхушым, Иона йдырга
акІвмызтын; 30 Ниневийа абзазагІвчва рыхъаз
Иона дыргата дшалыз апш, АгІвычІвгІвыспагъи
уыжвгІанчІви абанпара дырзалуаштІ. 31 Акъвым
аханпатшапхІвыс ахІаквымхара азаман дгІар-
гылхуштІ ари абанпара аугІаква дрыцта, йгъи
йлыркъванчуштІ ауат, йауа ухІварыквын ауи
анахъани адгъылцІыхъва дгІатыцІын дгІайтІ Са-
ламон йуасаражвра даздыргІвныс, йгъи абар,
араѣ йаѣу, Саламон дйайхІапІ. 32 Ниневийа
рыугІа ахІаквымхара азаман йгІагылуаштІ ари
абанпара аугІаква йрыцта, йгъи йдыркъванчуштІ
ауат, йауа ухІварыквын ауат Иона йырзынарха-
та йрызгІайгыз ажва амцтахъ йгІахъынхІвыхтІ,
— йгъи абар, араѣ йыѣу, Иона дйайхІапІ.

33 Заджвгъи, ачвамза айыркІыта йгъйыргы-
луам агъыцІарахъарарта, йгъыцІайыргылуам
ацІыквгъи, ауаса айшва йыхвынйыргылитІ, йгІа-
шылуа аккІара шырбуш апшта. 34 Ухъвади
ачвамза уыла акІвапІ. Уыла анцкъу, ахъвади ша-
бгугъи лашарапІ; йангвымхугъи, ухъвади зым-

ГІвагы лащцарапІ. 35 Ауи акІвпта, уапшы: акІара, ура йуылу, йгылащцарамма. 36 Ауаса ухъвади лашаразтын, лащцарахъыкІгы алам-кІва, ауи агІан ухъвади зымГІвагы лашара-разлуштІ, ачвамза акІарала ушГІанаркІкауа апшта.

37 Йаргы ауи анихІва, фарисейкІ Ауи дГІайыхІватІ йпны дчарныс. Ауи днашылын айшва дадзхъачІватІ. 38 Афарисейгы йджъай-щатІ, йаниба, ачара апхъала Ауи йнапІква шйымджвджваз. 39 Ауаса ХІыхвитыГІв ауи йайхІвтІ: швара ужвГІанчІви афарисейква, швквпІии швтамщакъи рхъахъла шврыцкъитІ, ауаса швуацІала гычрахлый чвгъаралый швыр-чвыпІ. 40 Акъылыыдаква! Ахъахъгы ауацІагы йгІазшаз Йарауазаджв гыакІвымма? 41 Ауи адкІыс йрышвт рыцхІашата йгІалшвхта, швквпІикви швтамщакъкви йырту, ауи агІан швпынгы зымГІва цкъахуштІ. 42 Ауаса чІвыуара швызГІайитІ швара, афарисейква, жваба йчпата ахъвыкІ, акъванхІвра апны уалагата ахІаса йГІайуа зымГІва Анчва йзалшвхитІ, йгы швгъай-гвыГІвуам атамамхІаквымхари Анчва йбзиба-ри: ари акІвын йшвырхъйара атахъыз, анахъа-ныгы йшвхъшвымраштылуа. 43 ЧІвыуара швызГІайитІ швара, афарисейква, аджъутны-хІвартаква рпны акъвытхІараква швчІварныс бзи ъажвбауа йгы айззартаква рпны хвду швы-квырцІауа йанГІашвпылуа. 44 ЧІвыуара швыз-ГІайитІ швара, хІахъв зхъадзгылам адамраква йрапшу, аугІаквагы йзыквныкъвауа йшдамру рымдыруа. 45 Йгы йГІайхІватІ, ахъабзарып-хъагІвчва рыуа заджвы, Иисус йзынархата:

АрыпхъагІв, ауи анухІвауа, Уара хІаргъи хІыхв науыркъвитІ. 46 Ауаса Иисус йхІватІ: шваргъи, ахъабзарыпхъагІвчва, ачІвыуара швызгІайитІ, аугІа йырзынкъвымгауа ахІахъараква йъарыквшвцІауа, швара мачвыкІлагъи швзыдымсылуа. 47 ЧІвыуара швызгІайитІ швара, швабачва рабачва йырщыз афигІамбарква син ъарызшвыргылуа: 48 ауыла швара шваквшахІатхитІ йгъи йрыщшкІитІ швабачва руысква, йауа швхІвузтын, швабачва ауат рщытІ, шваргъи син рызшвыргылитІ. 49 Ауи акІвпта Анчва йуасаражв рагъи йахІватІ: йырзысщтипІ ауат афигІамбаркви апостолкви, ауат рыуа азджъакІгъи рщуаштІ, азджъакІгъи джвыквырцуштІ, 50 афигІамбарква зымгІва рща, адунай гІащаквгылицтара йрычІву, ари абанпара йшгІадыршвахуш: 51 Авель йща апны угІаллагата Захария йща апныдза, акъвырманьпхи аркІкІарырти рбжъара йщхаз. 52 АчІвыуара швызгІайитІ швара, ахъабзарыпхъагІвчва, адырра ацІапха назахвыз: даргъи гътамылтІ, йталуазгъи йырпырастІ. 53 Ауи ауаъа дангІаджвылцІ, акътапыгІвчви афарисейчви йалагатІ мчыта дыдыркІылуа Ауи, азцІгІара щарда йыртуа, 54 дызладыркъванчахуашла дгІаркІныс.

ЙжвыгІвхауа ахъа

1 Ауи азаман агІан, хъагъи цІхъвагъи рымамкІва угІа щарда анайзза йабарпІцІуа, Ауи йрайхІвуа далагатІ апхъапхъа Йара йапхъагІвчва: тшачвхъышвхча афарисейква рчвкъа-

ра, алакта хърышвт — нахърышвтраква. 2 Ца-
кЫракІгьи гыгъам йгІацІымцІхуаш, мадза-
ракІгьи йымдырххуш. 3 Ауи акІвпта, алащара
апны йшвхІваз, алашара апны йгІахуштІ,
алымхІа йташвкІыта атдзауацІа йшвхІвузгьи,
атдзаквквала быджьдула йгІахІвахуштІ. 4
ЙшвасхІвитІ швара, Сара сыгІвзачва: швырчвым-
шван швхъвади зцуа, уадыргІвана датша закІгьи
ззымчпахуаш. 5 Ауаса йшвасхІвпІ швызчвшва-
ра атахъу. Швичвшва, хъгалра зыму, швщра
амцтахъ амцамчв швыззаларышвуаш. Щта,
йшвасхІвитІ швара: ауи швачвшва. 6 ХвцІаракІ
гъракІвымма гІвжвгъайхъвашакІла йыртиуа?
Ауаса ауат рыуа закІгьи Анчва йгъихърашты-
лым. 7 Швара швхъахъвыцнадзара пхъадзапІ.
Ауи акІвпта, швымшван: швара ага цІара щар-
да шврагъьпІ. 8 ЙшвасхІвитІ швара: дзачІвыз-
лакІгьи, аугІа рпахъ йхътІыта ажвабагъьала Сара
сызуа, — *АгІвычІвгІвыспагьи* йажва багъьала
диуаштІ Анчва йымальяиккъква рпахъ. 9 Сара
сзымуата тшызрыхъарауагьи аугІа рпахъ, йар-
гьи дрымуата дрыхъарахуштІ Анчва йымалья-
иккъква рпахъ. 10 ДзачІвызлакІгьи, АгІвычІв-
гІвыспа йыхъаз ажвахъвахъва зхІвауа, — йзыр-
гІвахуштІ. Ауаса Адыхв Шйых йзынарху ажва-
хъвахъва йгъизыргІвахушым. 11 ШвангІардуа-
гьи аджъутныхІвартаква, анапІыцІагІвчвакви
аунашвахъцІагІвчви рпны, швахъымгвыргІван
йшпакІву йгьи ачІвыйа йшвджъауапхуш швхъа
гІашвхчара ахъазла, йгьи йшвхІвуш. 12 Ауаса
Адыхв Шйых швибжьуштІ ауи асахІат агІан,
йшвхІвара атахъу. 13 Йгьи йгІайайхІвтІ аджвы

аугІажвпІара дгІарылцІыргІан: АрыпхъагІв,
 йауымхІвума саща атынха шсыцагІвишуш.
 14 ИсусгЫи йайхІвтІ ауи: агІвычІвгІвыс, дза-
 чІвыйа сзыргыл Сара швхІаквым схарныс йгЫи
 швалысхырныс? 15 ЙгЫи йрайхІвтІ Ауи ауат:
 швапшы, тшачвхъышвхча йамгІанпсынамхъаз-
 ларакІгЫи, йауа ухІварыквын йтахъыранахъа-
 ра агІангЫи агІвычІвгІвыс йбзазара йымлыкв
 йгъапщылам. 16 ЙгЫи йрайхІвтІ ауат аквыр-
 пшыгагІахІвахракІ: гІвычІвгІвыс байакІ йтшы-
 гІвра бажвхатІ, 17 йгЫи дазхъвыцуан ауи йхъа
 дайкъангъашхуа: «ачІвыйа йсчпуш, стшыгІвра
 йгІацІазгаз йъагІатазсккІуаш ансымамзара?»
 18 ЙгЫи йхІватІ: «абар, йсчпуш: сыгІвнацІар-
 таква нысхпІта, рыцІа дута йсыргылпІ, йгЫи
 йтазсккІпІ агІвадз йгІацІазгазгЫи, сбайара зым-
 гІвагЫи, 19 спсгЫи йасхІвпІ: спсы, байара щарда
 щтІапІ упны сквшщарда уапхъала: тшыртынч,
 уча, уыжв, тшыркъахв». 20 ЙгЫи йайхІвтІ ауи
 Анчва: «акъылыыда, йарауахъабырг упсы йащ-
 тагІайуаштІ, йыззагІанхушда йазуггаз зымгІва?»
 21 Ауи акІвпІ дшаъу зхъа ахъаз йазггауа, Ан-
 чва йыхъаз йымбайахауа. 22 ЙгЫи йрайхІвтІ Ауи
 Йара йапхъагІвчва: ауи акІвпта йшвасхІвитІ
 швара: швахъымгвыргІван швпсы ахъазла,
 ачІвыйа йхІфуш – хІва, швхъвади ахъазлагЫи,
 йашвышвцІарйа – хІва. 23 Ауаса апсы афачІвы
 ацкІыс йайхІапІ, ахъвадигЫи — ачгІвыгча ацкІыс.
 24 Шврызхъвыц акъанджъаква: ауат гълацІум,
 йгъацІагум, йгърымам ауат тапсартагЫи, гІвна-
 цІартагЫи, ауаса Анчва драйгвгІвитІ ауат, йыр-
 читІ. 25 Зъарала шврагъыйа швара ацІисква.

Йгъи дзачІвыйа швыуа, дайгвыгІвуа, сахІатза-
джвыкІлазтынгъи зынцІра ззалархІуш? 26 Ауи
атшытракІ аншвзымчпауазара, ауахъауатква
швзырхъгвыргІауайа? 27 Шврызхъвыц ахІвра-
пщдзаква, ауат шгІайуа: йгъынхум йгъи йгъхы-
хум. Ауаса йшвасхІвитІ швара, Саламонгъи рахІа
йыхъыз ангуз, тшгъйымгІвычатІ ауат рыуа закІы
апш. 28 Архъа йгІайуа ахІвра, уахъчІва йаъата,
уачІвы ахІакв йтарышвхуш, Анчва ауаса йани-
гІвычауазара, зъарала шврайхІайа швара – за-
хъацІара пскІакву! 29 Шваргъи швазымпшгІан
йшвфуши-йшвыжвуаши, швгвгъи акъвшвмыр-
пын. 30 Ауаса ауатква зымгІва йазыпшгІитІ
адуней аугІахъа. Швара шваба йдыритІ, ауат-
ква тахъыра шазшвыму. 31 Ауаса швазыпшгІа
Ауи Йнурштара, ауыгъи швызгІацІахуштІ.
32 Уымшван, агвартахвыц, йтахъыра бзи йалапІ
Саба йшвитныс швара Анурштара. 33 Йшвыму
швнапІы йыцІшвщт, рыцхІашагъи рышвт,
йрызшврахІазыр йымхауа атацІартаква, абайа-
раква йзылымдзгІауа гІарщ апны, агъыч дъа-
зынамскІауа, ахІвынгъи зарар ъазнамчпауа.
34 Ауаса швбайараква ъану акІвпІ швгвгъи
ъанызлуш. 35 ЙанакІвызлакІгъи швхІазырызтІ
швыпкъ ацІархъата, швчвамзаквагъи ккІауата,
36 аугІаква эпшвыма йызпшуа швшрапшхуш:
анадылра данбагІахъынхІвыхуаш ауи? Апшвы-
ма дгІайхта дангІасра, йарауи асахІат йшиза-
гІашвтІуаш апш.

37 Насып ду рымапІ агІвнагІвква, апшвыма
дангІайхра йычвамкІва дзынйауа. Тамамта
йшвасхІвитІ швара: апшвыма йара йхъатала

тшгІацІайырхъата, даргъи айшва йадзхъайыр-
чІвата йгъи днаскІъата дшырзычрынуаш. 38
ЦІыхквтазтынгъи, шарпнызтынгъи дангІай-
хлакІгъи, йара ауаса дгІарынйузтын зымгІва,
насып ду рымапІ ауат. 39 Ауаса абар, йшыжв-
дыруа швара: атыдзра апшвыма йдырзарквныз,
йапшзаману агъыч дангІайуаш, — йгъимыр-
хвитрызтІ ауи йтдзы гІацІдйыржвжвгІарныс.
40 Шваргъи тшшврахІазыр, ауаса шваназым-
хъвыцуа асахІат дгІайуаштІ АгІвычІвгІвыспа.

41 ЙхІватІ Петргъи: ХІыхвитыгІв, хІара хІа-
кІвма йгІазаухІвуа Уара ари аквырпшыгагІа-
хІвахра, момкІва зымгІвагъи? 42 Йгъи йхІватІ
ХІыхвитыгІв: дзачІвыйа апшвыма йызцІабыргу
амлыквнкъвгагІв, йгвыбзыгъу, апшвыма агІв-
нагІвква зымгІва драхІбата йыргылуаш, йаназа-
ману рчІахъва хъвы ритырныс? 43 Насып ду
йымапІ агІвнагІв, зпшвыма дгІайхта ауаса
йчпауа дгІазынйауа. 44 Тамамта йшвасхІвитІ
швара: йымлыкв зымгІва дахъадзйыргылуаштІ
ауи. 45 Ауаса ауи агІвнагІв араса йгвы йтай-
хІвырквын: «дгъгвжважвум спшвыма дгІайх-
ныс», йгъи далагарквын дрысуа агІвнагІвхъа-
чвакви агІвнагІвпхІвыскви, йгъи дчауа-дыжвуа,
къахвгъи йауа, — 46 дгІайуаштІ ауи агІвнагІв
йпшвыма данизымпшуа амш, йгъи йанимдыруа
асахІат, йгъи дагІвишущтІ гІвбата, азхъацІара
змамгъи дрылайцІата ауат рквнага данйырйуштІ.
47 АгІвнагІвгъи — зпшвыма йтахъыра здырта
йгъи йзымрахІазырыз, йа йзымчпаз ауи йтахъы-
ра — дзакхуштІ рыцІа щарда. 48 Йзымдырыз-
гъи, ауаса азакрагІанхара зчпазгъи, — дзакхуштІ

рыцІа мачІта. ДзачІвызлакІгъи, щарда зыту,
 щардагъи гІайыквххитІ, щарда зызхъацІугъи,
 щардалагъи йцІгІахитІ. 49 СгІайтІ *Сара* амца
 гІазгныс адгъыл, йачІвытагъи йыстахъыйа *Сара*,
 ауи ласылас йгІацІасныс. 50 ДзыцІщра сгІацІсра
 атахъыпІ *Сара* — йачІвытагъи сазпшуайа *Сара*
 ауи аннийуаш. 51 Швшпазхъвыцуа швара, *Сара*
 сызгІайыз адгъыл мамыр астныс акІвма? Мамо,
 йшвасхІвитІ швара, ауаса агІвшара. 52 Ужвы
 уалагата, атдзы хвгІвы ъагІвну агІвшазлуштІ:
 ахыгІв агІвыджъ йырпшІагылуаштІ, агІвы-
 джъгъи — ахыгІв. 53 ТшагІвыршуштІ: аба дип-
 шІагылуаштІ апа, апагъи — аба; ан дылпшІагы-
 луаштІ апхІа, апхІагъи — ан; анхъва дылпшІа-
 гылуаштІ лтаца, атацагъи — анхъва.

54 ЙрайхІвуан аугІагъи: йаныжвбауа, апст-
 хІва амараташвартала йгІахъылуа, швара йара
 ауи асахІат йшвхІвитІ: «ква гІаквуштІ», ауаса-
 гъи йнийитІ. 55 Йгъи йаныжвбауа, ахъанпша
 гІасуа, швара йшвхІвитІ: «швабыжта йшуара-
 хуштІ», йгъи ншитІ. 56 Алакта нахърышвт-
 гІахърышвтква, адгъыли ажвгІванди атшахъа
 ззалыргауа, ари азаман шпашвзалмыргауа?
 57 АчІвыйа швара швхъачІвыла йзшвзалмыргауа
 атамамра? 58 Ауаса, уара уыркъванчагІв уйыц-
 та анапІыцІагІв йпны уанцауа, — амгІва ушы-
 квыркІвумца тшгІархвит, ауи ахІаквымхагІв
 йпны ушимырцуш апш; ахІаквымхагІвгъи ату-
 танакъпщагІв уыййтуаштІ, атутанакъпщагІвгъи
 атутанакътара утайрышвуаштІ. 59 ЙуасхІвитІ
 уара, угъгІатыцІуашым ауаъа акІапІикІалашв
 йыузагІанхазнадзара рыуымткІва.

Йжваххауа ахъа

1 Ауи азаман зджъакІы гІайын йГІайархІвтІ Ауи АгальильейГІвчва рхабар, зща Пилат къвырманта йрщуаз арахквва рща йшалайчваз. 2 Йаргы йрайхІвтІ ауи ахъаз: швшпазхъвыцуа швара, арат АгальильейГІвчва ауахъауат АгальильейГІвчва зымГІва рацкІыс гванахІ щарда рыквдзышвшума, ауаса ъарызнийыз? 3 Мамо, йшвасхІвитІ швара, ауаса, швГІахънымхІвыхуазтын, зымГІвагы йара ауаса швыдзуаштІ. 4 Йа ажвагыГІв, Силоам апны акъварч¹⁰ гІазквшвата йарпцІыз, — швшпазхъвыцуа швара, Иерусалим йту аугІаква зымГІва рацкІыс рыцІа йкъванчазма? 5 Мамо, йшвасхІвитІ швара, ауаса швГІахънымхІвыхуазтын зымГІвагы йара ауаса швыдзуаштІ. 6 Йгы йхІватІ Ауи ари апш аквырпшыгагІахІвахракІ: йыман агІвычІвГІыс хІацІлакІ, йжъйырта¹¹ апны йлата, йгы дГІайтІ ауи дазыпшГІауа швыр ашІазтын, йгы йгъГІаймаутІ; 7 йгы йайхІвтІ ажъГІарйыгІв: «абар хысквша сГІайитІ сара швыр сазыпшГІауа ари ахІацІла апны йгы йыгъсауам. Уаста йпкыы, йазнагвалайа ауи адгъылгы акІуа?» 8 Ауаса ауахъауи йджъауапхатІ: «апшвыма, йГІаныжь ари ужвыгы сквшыкІ. Сара ауи азаман ащапІы гІасыртшатшапІ жвынткъыгы ацІасцІапІ, 9 хІапхъа асквш швыр йгъГІашІамылуашмищтІ. ЗакІгы гІашІамылуазтын йпухъыпІ ауи.»

¹⁰ Къварч — башня.

¹¹ Ажъйырта — виноградник; ажъ — виноград.

10 Йгъи йайрыпхъун Ауи джъутныхІвартакІ апны асабша. 11 Йгъи абар, пхІвыскІ, жвагІсквша гІвычвгъа ъарыкъарусызра лыман; йгъи дрыхъван ауи, лхъагъи йшатахъыз апш йгъылзгІащтІымхуазтІ. 12 Ауи даниба, Иисус дгІазшитын йгъи йлайхІвтІ: апхІвыс, бара бырхвитпІ бхъыгІала. 13 ЙнапІквагъи лыквицІатІ, ларгъи йарауи асахІат тшгІалыррайшатІ, Анчвагъи длыртшхъвауа далагатІ. 14 Ауи ахъазла йджъауапхауата аджъутныхІварта анапыцІагв, дхІвыртуа, Иисус апхІвыс асабша амш дъагІайырбзихаз, аугІа йрайхІвтІ: цымшкІ аъапІ, йанчпачІву; ауи агІангъи тшшвырбзиханыс швгІай, ауаса асабша гъакІвым. 15 Йгъи йыйттІ ауи ХІыхвитыгІв джъауапта: лакта нахърышвтгІахърышвтква, йгъгІакІыдйымщтума швыуа дзачІвызлакІгъи асабша йычв йа йтшада дзыжвра йырцаныс? 16 Ари — Авраам йпхІа, — аркъванчагІв жвагІсквша дшІахІвата йымаз, дгІархвитра гъатахъымызма асабша амш? 17 Йгъи йанихІвуз Ауи ауатква, зымгІва Йара йгІайпшІагылуаз пхащун, аугІажвпІара зымгІвагъи Ауи йуысщтІыхква йрайгвыргъьун.

18 Ауи амщтахъ, Иисус йхІватІ: йзшІырпшыйа Анчва Йнурштара, йгъи йзшІсырпшрыйа ауи? 19 ЙапшпІ ауи агырраса, агІвычІвгІвыс йна йахвта йцІлауатра йлайрышвыз, йгъи йгІайытІ ауи, цІлатагъи йцатІ, апсгІачІвквагъи ауи ама хъвква рпны гІвара рчпатІ.

20 Ужвгъи йхІватІ: йызшІсырпшрыйа Анчва *Йнурштара*? 21 ЙапшпІ ауи арыпага, апхІвыс йгІалахвта хпуткІ йнадзуз ашыла йалалцІаз йгъи йгІанарпатІ зымгІва.

22 Йгъи дрылсуан Ауи акъалаквѣ акытквѣ, йайрыпхъуа (йазибжъауа), йымгѣвагъи Иерусалимла йнархан. 23 Йгѣайайхѣвтѣ Ауи заджвы: Хѣыхвѣтыгѣв, тамамума йгѣахчахауа шмачѣгѣву? Йаргъи йрайхѣвтѣ ауат: 24 Ашвтшвала швнашылныс тшазышвчпа, ауаса щардагѣвы, йшвасхѣвитѣ швара, тахъыра ду азрымазлуштѣ йнашылырныс, ауаса йгърылшушым. 25 Атдзы апшвыма дгѣагылта ашв анайыркѣра, шваргъи, агваныла швгыла, ашв швасуа швалагуштѣ араса швхѣвауа: «Хѣыхвѣтыгѣв, йхѣзыгѣатѣ хѣара», Йаргъи джъауапта йгѣашвитуаштѣ: «швгъсыздырам швара, швахъпагѣай», — 26 ауи агѣан йышвхѣвауа швалагуштѣ швара: «хѣара хѣцун Уара упахъ, хѣурамква рпынгъи хѣаурыпхъун», 27 йгъи йгѣашвайхѣваштѣ Ауи: «швгъсыздырам швара, швахъпагѣай: швскъвыцѣ Сара, амц тшазтуа зымгѣва». 28 Йаъазлуштѣ ауаъа чѣвыуарагъи пыцабарыфрагъи, йаныжвбара Авраамгъи, Исаакгъи, Йаковгъи, афигѣамбарква зымгѣвагъи Анчва *Йнуриштара* апны, шваргъи швамцахауа. 29 Йгъи йгѣайуаштѣ адгъыл апщхъатакѣгъи йгѣартыцѣта, ачаражвра айшвагъи йгѣадзхъачѣвуштѣ Анчва *Йнуриштара* апны. 30 Йгъи абар, йаъазлуштѣ йцѣыхъвахаз — йапхъахуштѣ, йапхъахазгъи — йцѣыхъвахуштѣ.

31 Ауи асахѣат агѣан йгѣаскѣятѣ афарисейква рыуа зджъакѣы йгъи йархѣвтѣ Ауи: утыцѣта ухъа амга араъа, йауа ухѣвузтын Ирод уыйщра йтахъыпѣ. 32 Йаргъи йрайхѣвтѣ ауат: швцата, ауи абага йашвхѣв: абар Сара агѣвычвгъаква рылсцитѣ, арбзихарагъи акѣвызгашитѣ уахъчѣвагъи уачѣвгъи, йхымшкѣхауагъи — йакѣвсыршитѣ Са-

ра. 33 Ауаса Сара мгІва сыквзара атахъыпІ уахъ-
 чІвагы, уачІвгы, ауи амщтахъ йгІайуа атшын-
 гы, ауаса йгынымшастІ, афигІамбар Иерусалим
 апны акІвымкІва датша зджъара дырщуата.
 34 Иерусалим, Иерусалим, афигІамбарква зща
 зрычІвауа, рзагІащтигІвчвагы хІахъвыла йзы-
 суа! Зъараны йстахъызыа Сара йазскІкІныс уса-
 биква, ацІис йгІалнадаз апхъынцІыгІва йшы-
 цІазнакІкІуа апш, шваргы йгышвымтахъхатІ. 35
 Абар, йшвызгІаныжъхитІ швтдзы мцырата.
 ЙшвасхІвитІ швара: сгыжвбушым Сара, араса
 швхІвандзыкІа: «Бзирала дырчвыпІ Ашйых
 ЙгІайуа ХІыхвитыгІв йыхъызла».

Йжвипщхауа ахъа

1 Йгы йаъан: Ауи асабша алагІв фарисейкІ
 йпны дангІай чкІахбаста йыцагІвишарныс, ауат
 Ауи ддырхъвыхуан. 2 Йгы абар, Ауи йпахъ
 дгІагылтІ гІвычІвгІвыскІ, дзычІвара зхъуаз.
 3 Йгы тшырзынайырхатІ Иисус ахъабзари-
 пхъагІвчви афарисейчви йхІвауа: йырхвитума
 арбзихара асабша, момкІва йгырхвитымма?
 4 Ауат дзыргІвытІ. Йгы дихъысын, дйырбзихан
 ауи дауищтхтІ. 5 Даргы Ауи йрайхІвтІ: швыуа
 дзачІвызлакІгы, йпа йа йычв акъвий йташва-
 рыквын асабша амш, йара ауи асахІат йгыгІа-
 тышвымххуашма? 6 Йгы йгырылымшатІ йап-
 шІагылта кІара азырхІварныс ауи.

7 Йгы йрайхІвуан Ауи асасчва ашІыр-
 пшыгагІахІвахракІ, йаниба, ауат акъвытхІара
 чІвартаква шгІалырхуаз: 8 заджвы надылра

уанызшытра, акъвытхIара уымчIван; асасчва йызшыту рыуа уара уацкIыс рыцIа пIатIу зкву дшгIанымшуш, 9 йгьи дшгIамиуаш швгIазшIызтыз йгьи йышгIауайымхIвуаш: «йыт ари ачIварта», ауи асхъан йыукIуаштI упхащауа йцIыхъвахуа ачIварта. 10 Ауаса уара уанызшырттра, уцата йцIыхъвахуа ачIварта учIва, угIазшIызтыз дангIайра, йшгIауайхIвуаш уара: «сыгIвза, уагIвста учIва»: ауи асхъан уара хвы уымазлуштI йуыцIву зымгIва рпахъ, 11 йауа ухIвузтын дзачIвызлакIыи зхъа щтIызхуа днаркъвхуштI, зхъа назыркъвуагьи дщтIыххуштI.

12 ЙайхIвуан дызшIызтызгьи Ауи: уара чаражвра анучпауа, йгIазшIыуымтын уыгIвзачвагьи, уайщчвагьи, узаъачвагьи, уыгвлачва байачвагьи; даргьи ушызшырымтхуаш, йгьи йшгIауымтхуш убзира. 13 Ауаса чаражвра анучпауа, йгIазшIыт арыцхIачви, аныкъвадыкъвакви, ахъачакви, алашвкви; 14 насып дугьи уымазлуштI, ауат убзира йанырзагIахъынмырхIвхуа; ауаса йыузагIахънырхIвхуштI убзира атамамыгIвчва ргIабзаргылхра атшын.

15 Ауи згIаз асасчва рыуа заджвы Иисус йайхIвтI: насып ду йымапI, чкIахбаста зфуш *Анчва Йнурштара* апны. 16 Исусгьи йайхIвтI ауи: йчпатI заджвы чаражвра дукI, щардагIвгьи зшIиттI. 17 Йгьи дищтитI йгIвнагIв ачара азаман йрайхIвныс асасчва: «швгIай, зымгIва хIазырпI». 18 Йгьи йалагатI зымгIва ацшIакIта арзыргIвара йахIвауа. Йапхъахауа йайхIвтI ауи: «сара йсхвгIатI чIвыла, ауи сцата сапшра атахъыпI. СуыхIвахитI йсзыргIва». 19 Азаджвгьи йхIватI: «сара йсхвгIатI чвыта хвагIвзаракI, сцата

ауат рахъща сапшуаштІ. СуыхІвахитІ йсзыр-
гІва». 20 ЙхыгІвхауагъи йхІватІ: «сара тагвжва
дгІазгтІ, ауи акІвпта сгъызнайуам». 21 Йгъи
дангІайх, агІвнагІв йыпшвыма йайхІвхтІ ауат-
ква. Ауи агІан, апшвыма дгвыжвкІын йыгІвнагІв
йайхІвтІ: «уджвылцІта ласылас аурамкви
абжьаракви уырбжьыста йгІадыл араѳа арыцхІа-
ква, аныкѳвадыкѳваква, ахъачаква, алашвква». 22
Йгъи йхІватІ агІвнагІв: «спшвыма, йрхъйапІ
уыунашва, ужвыгъи чІварта аѳапІ». 23 Йгъи
йайхІвтІ апшвыма агІвнагІв: «уджвылцІта
амгІвакви агварагъыцІаракви угІарыкІвшата,
йадыргыл аугІаква йгІашылныс, сара стдзы шыр-
чвхуш апш.

Ауаса йшвасхІвитІ швара, ауат йызшІытыз
асасчва рыуа заджвгъи счаражвра айшва дгѳа-
дзхъачІвушым».

25 Ауи йыцта угІащарда цун, йгъи дгІацапан,
Ауи йрайхІвтІ ауат: 26 – Сара йсызгІайуа, ауаса
йаба, йан, йтагвжва, йсабиква, йайщчваква,
йайхщчваква, йара йпсы ацкІысгъи бзи сзым-
бауа, Сара дсапхъагІвта дгѳауашым. 27 Зджью-
аргъи назахвта Сара сыцта йнатамгылуагъи, Сара
дсапхъагІвта дгѳауашым. 28 Ауаса дзачІвыйа
швыуа, кѳварч йыргылра йтахъыта, дчІвата
апхъапхъа йзымпхъадзуш аргылра йаквыдзуаш:
йзынардзушма ауи ацІыхъвадза? 29 Ауи акІв-
мызтын, ауи ащапІы анцтайцІата йгъи йанизы-
мыркъарухра ацІыхъва йнайырдазахырныс, ауи
збауа зымгІва йылахъыччауа йалагуштІ, 30 йыр-
хІвауа: «ари агІвычІвгІвыс аквцІара далаган
ауаса йгъизымрыкъарутІ йакІвйыршаныс». 31 Йгъи
дзачІвпаштахІяа, датшаштахІкІ

йайсныс данйызгІайуа, дчІвата апхъапхъа
йымкѡангъашуа, дымчхъума ауи жванзыкѡ йна-
дзауа арла дизыпшІагылныс зкыгІважвала
йызгІайуа? 32 Момызтын, ауахъауи дшхъа-
раркІву, ауи хІвачІвгІвы йцтийитІ амамыр
йахІварныс. 33 Йара ауаса швыуа дзачІвыз-
лакІгъи, йыму зымгІва йыззнымыжъуа, йгъйыл-
шушым Сара дсапхъагІвхарныс. 34 Ауи акІвпта:
аджыкІа бзипІ; ауаса аджыкІа ацІгІара ац-
цІырквын, ачІвыйа ауи акъару злагІацІауцІа-
хуаш? 35 Ажвынткъгъи адгъыл йахъвитІ, ауаса
аджыкІа цІгІара зыцІахым закІгъи йгъахъва-
хуам. Ауи йджвылдырышвтхитІ. ЛымхІа зму
йгІарныс йгІарагІатІ.

Йжвыхвхауа ахъа

1 Иисус тшйыздраргвануан йыздзыргІвныс
акъвадкІылхыгІвчвагъи агванахІрхІагІвчвагъи
зымгІва. 2 Афарисейкѡагъи ахабзарыпхъагІв-
чвагъи йрымгѡапхауа йрхІвун: Ауи агванахІр-
хІагІвчва йраргванитІ йгъи дрыцчитІ ауат. 3 Йгъи
йрайхІвтІ Ауи ауат ари апш ашІырпшыга-
гІахІвахракІ: 4 дзачІвыйа швыуа, уасашвкІ йы-
мата азакІ аничвыдзра, апцынгІважвижвежв
акъвым йгІанижъта азакІ йыдзыз йацтамцуш,
йгІайаухынцІкІъа ауи? 5 ЙангІайаухрагъи, ауи
дгвыргъята йыжвгІва йгІаквицІуштІ, 6 йпны
дангІайхрагъи, йыгІвзачви йыгвладчи гІазид-
дитІта йгъи йрайхІвитІ ауат: «швсыцгвыргъа,
йауа швхІварыквын йгІасаухтІ сара йыдзыз су-
аса». 7 ЙшвасхІвитІ швара, йара ауаса гІарщ

апны агвыргъъара рыцІа йщардазлуштІ йгІа-
хъынхІвыхыз гванахІрхІагІвыкІ йыхъаз, азай-
гІваджъра мгІаны азызымбауа апщынгІважви-
жвежвыгІв рацкІыс.

8 Йа дзачІв пхІвысІа, жварызнахчахъвашакІ
змата азакІы анылчвыдзра, амза алыркІыта ат-
дзы гІазпсауа йаламгуш, йгІалаухынцІкІа? 9
ЙангІалаухрагІи, ауи лыгІвзачви лыгвладча-
пхІвыскви гІазылддитІта йгІи йралхІвитІ:
«швсыцгвыргъъа, йауа швхІвузтын йгІасаухтІ
сара йсчвыдзыз ахчахъваша». 10 Йара ауаса,
йшвасхІвитІ швара, йаъазлуштІ агвыргъъара
Анчва йымальяикъква рпашвхІа йгІахъын-
хІвыхыз гванахІрхагІвыкІ йыхъаз.

11 ЙгІи йхІватІ Ауи: заджвы гІвпачва йы-
ман, 12 йгІи йайхІвтІ айцІба йаба: «саба, йгІасыт
йсыквшвауа амлыквхъвы». АуыгІи амлыкв
рзагІвишатІ. 13 МшщардагІи йнамихуата,
зымгІва азиккІын, апайцІба къральхъаракІ
дцатІ, ауаъагІи йымаз бзазарамагІныдала
далахъвмартІ. 14 Ауи зымгІва даналга агІан, ауи
акъраль апны младу гІаншатІ, йаргІи арыц-
хІагІара дтагылтІ; 15 йгІи дцан, ашІыпІагІвчва
рыуа бзазагІвыкІ йпны чрынта далагатІ, дыззцаз-
гІи йырхъаква рпны хІвахчара дищтитІ. 16 Йар-
гІи дгІвыргъъушын йымгІва йырчвныс акъвыд-
чвала, ахІваква йырфуз, ауаса заджвгІи йгъ-
гІайы йымтуазтІ. 17 ТшангІайдырхгІи, ауи
йхІватІ: «саба йзынхагІвчва зъарагІвы ачІахъва
хвитта йрауайа, ауаса сара араъа амла сагитІ.
18 СгылпІта, саба йпны сцапІта йгІи йасхІвпІ
ауи: саба, сара гванахІ сырхІатІ ажвгІвандгІи
уаргІи швпахъ; 19 сара ауи ахІа йгъсквнагахуам

супата тшыспхъадзахныс; уынхагІвчва рыуа заджвыта снахв». 20 Йаргьи дгылын йгьи дцатІ йаба йпны. Ауи хъарата дшаъаркІваз, йаба дгІайбатІ йгьи дйымарыцхІахатІ, йгьи дыгІвын, йыхъвда тшыцІайрышвын багьи йайхІвтІ. 21 Йгьи йайхІвтІ ауи апа: «саба, гванахІ сырхІатІ сара ажвгІвандгьи уаргьи швпахъ; сара ауи ахІа йгъсквнагахуам супата тшыспхъадзахныс». 22 Йгьи йрайхІвтІ аба йыгІвнагІвчва: «ласыта йгІатышвх рахІа йбзийу ачгІвыча йгьи йшвышвцІа ари, йгьи йахъашвцІа йнапІы мачвхъацІа (ъатлын), амгІагьи йщапІква, 23 йгьи йгІажвд йтагылата йхІырчаз атана, йгьи йшвщы, хІчуштІ йгьи хІгвыргъьуштІ, 24 ауаса ари спа дгъбзахымызтІ йгьи дгІабзагылхтІ, дыдзуан дгІаншахтІ.» Йгьи йалагатІ агвыргъьара. 25 Ауи асхъан йпахІба архъа дыъан; дгІайхуата атдзы даназагІаргванха, ауаради агІахІврабыжъкви гІайгІатІ; 26 йгьи дгІазшІитын агІвнагІвква рыуа заджвы, ауи дазцІгІатІ, йгІаншауа амгІаны. 27 Ауахъауыгьи йгІайайхІвтІ: «уаща дгІайхтІ, уабагьи йтагылата йхІырчаз атана йзищтІ, дабгазгІвада дъагІайаухыз». 28 Ауи дгвыжвкІын днашылнысгьи гъйымуытІ. Йабагьи дгІаджвылцІын дйыхІвауа далагатІ. 29 Ауаса ауи йаба джъауапта йыйттІ: «абар, сара ауи аъара сквшы уара сузынхитІ, зынгьи уыунашва сгъахъымпатІ, ауаса сара уара зынгьи сыснадзара гъгІасыуымттІ, сыгІвзачва срыцгвыргъьарныс. 30 Ауаса ари упа дангІайх, уымлыкв акъахІпква йрыцызфыз, уара йтагылата йхІырчаз атана йзуштІ». 31 Йаргьи йайхІвтІ ауи: «ссаби, уара йанакІвызлакІгьи усыщпІ, зымгІвагьи йсыму – йучІвышпІ, 32 ауаса

йатахъын швабыжта уайгвыргъарныс швабыж-
тагы укъахвныс, ари уаща йыхъаз — дгъбза-
хымызтІ йгы дгІабзагылхтІ, дыдзуан дгІан-
шахтІ».

Йжвицхауа ахъа

1 ЙрайхІвтІ Ауи йапхъагІвчвагы: даъан
гІвычІвгІыс байакІ, млыквнкъвгагІвыкІгъи дйы-
ман, йгІайархІвтІ ауи йымлыквнкъвгагІв йым-
лыкв амцІгауата. 2 Йгы дгІазшІитын ауи, ара-
сагы йайхІвтІ: «ачІвыйа йзгІауа уара уыхъаз?
Амлыкв анкъвгаща ауыс зкву зымгІва гІасахІв,
ауаса уара ауи ахІата йгъынкъвугахуашым сым-
лыкв». 3 Йгы йайхІвхтІ йхъа амлыквнкъвгагІв:
«ачІвыйа сара йсчпуш? Спшвыма амлыквнкъв-
гара сахъыйхитІ. Бельла сынхауа сгъамщцатІ,
садакъа сахІварнысгы спхащитІ. 4 ЙыздыритІ,
йсчпара атахъу, ртыдзка снарахвра ахъазла,
амлыквнкъвгара ансыквырхра амцтахъ». 5 Йгы
йгІазшІитын кІыда-кІыда йпшвыма йпсарчІвы-
гІвчва, йапхъахауа йайхІвитІ: «сыпшвыма йпсар-
чІвыта йуыкву зъарайа?» 6 Ауи йхІватІ: «хвша-
та швпкъвылкІ». Йаргы йайхІвтІ ауи: «умачв-
швъа нахвта йгы учІвата, ласылас йгІвы:
швбжакІ». 7 УадыргІвана йгІвыджъхуз йайхІвтІ:
«уара зъарайа йуыкву?» Ауахъауыгы йхІватІ:
гвадз машаквшвкІ». ЙайхІвитІ ауи: «умачвшвъа
нахвта йгы йгІвы: пщынгІважва». 8 Йгы дйыр-
тшхъватІ апшвыма амлыквнкъвгагІв мцхІва,
гвыбзыгъата йъайчпаз ахъаз, йауа ухІвузтын ари
адуней апачва дара-дара йанагвынгІвуа агалагы

ласыта йГархъвыцитІ йырчпуш, алашара апа-
чва рацкІыс. 9 Саргы йшвасхІвитІ швара: ари
адунеймц абайараквала йГашвау гІвзачва, ауи
йаналгара агІан, ауат швшнарахвуаш абзатар-
таква цІгІва змам. 10 АмачІдза зызхъацІа йауаш
ашардагы йызхъарцІитІ, амачІдза зызхъауцІа
амуагы – ашардагы гъйызхъарцІум. 11 Ауи
акІвпта, швара ари адунеймц абайараква швыз-
хъацІа йамуазтын, дзачІвыйа йшвызхъазцІуш
швара, йтамаму? 12 ЙшвчІвымгы швызхъацІа
анамуазара, дзачІвыйа йшвызтуаш швчІвы? 13
ГІвнагІвыкІгы йгъйылшушым йаразаманкІ гІвы-
пшвымакІ дырзынхарныс: ауаса азаджв йгвы
дачвымыгъызлуштІ, анахъаныгы бзи дибуштІ;
азаджв дйайгвгІвуаштІ, анахъаныгы дгъгІатай-
рышвуашым. Йгъшвылшушым йацшвырцаныс
Анчвагы абайарагы рыщтаква.

14 Йгы йыргІатІ ауи зымгІва афарисейква,
ахчи абайари бзи йызбуз, йгы йылахъыччун
Ауи. 15 Йаргы йрайхІвтІ ауат: швара аугІа
швгІвычІвгІвыс райшата тштшвырбитІ, ауаса
Анчва йдыритІ швара швгвква; аугІа рпны
йщтІыху – махатшарапІ Анчва йпахъ. 16 Анчва
йщаквыргылраква йгы АфигІамбарква — Иоанн
йапхъан: ауи азаман угІалагата *Анчва Йнуриш-*
тара йГатдырггІитІ унашва бзита, йгы дза-
чІвызлакІгы зкъару зымгІва адызгалуа дталитІ
ауаъа. 17 Ауаса рыцІа йласыпІ ажвгІванди
адгыли ййдзныс, Анчва йщаквыргылра апны
чІвагъварахвыцкІ алдзгІара апхъала. 18 Дза-
чІвызлакІгы, зтагвжва дылызщтта датша
пхІвыскІ дгІазгхуа, азцІабыргра питшитІ, зхъа-
цІа йГалищтхыз дгІазгуагы азцІабыргра пи-
тшитІ.

19 ГІвычІвГІвыскІ дбайан, чІарачІатагы тшигІвычун, ансимшгы чаражвра ду тайцІун.

20 ФакъракІгы Лазарь — хІва йыхъызта дщтІан ауи йгІваш, дшабгу пхтрала дхъгІвата; 21 йгы йтахъын ауи йымгва йырчвныс, абайа йайшва йгІакІашвауа арызхъхъвашвала, алаквагы гІайуанта йгы йдырбзун йпхтраква. 22 Йгы йыншатІ, афакъра дпсытІ, йгы дыргатІ ауи амалйаикъква Авраам йпашвхІа. ДпсытІ абайа, ауыгы дыцІарцІатІ; 23 джъахІанам апынгы, агІазабчакъра далата, ауи йылаква гІащтІихын йгы дибитІ хъарачІвыла Авраам, Лазарьгы ауи йпахъ. 24 Йгы дгІахъвагІгытІ ауи йымч зымгІвала: «хІаба Авраам, срыцхІаща, йгы дсыгІащти Лазарь, йымачв ахъа адзы йтищрагІатІта сыбыз гІайырхъшвашваргІатІ, йауа ухІварыквын сара гІазаб збитІ ари амца сълу». 25 Ауаса Авраам йхІватІ: «ссаби, йгІауыргвалашва, йшуытхаз уара убзира убзазара апны, Лазарьгы — ачвгъара. Ужвы ауи араъа тынчра йаутІ, уаргы гІазаб убитІ. 26 Ауи акІвымкІвагы, хІари швари йхІызбжъаргылпІ аташварта цІгІва змам, йнахъысныс этахъу араъа швахъыла йшызнахъымсуаш, ауылагы хІахъыла йшызгІахъымсуаш». 27 Йаргы йхІватІ: «ауи асхъан суыхІвитІ уара, хІаба Авраам, дуцтирныс ауи саба йтдзы апны, 28 ауаса йсымапІ сара хвгІвайщча: йыла йабаз йрайхІврагІатІ ауат, ауатгы йшгІамиуаш ари агІазабырта». 29 Йгы йхІвитІ Авраам: «йрымапІ ауат Моисей йгы АфигІамбарква: йрыздыргІврагІатІ ауат». 30 Йаргы йхІватІ: «мамо, хІаба Авраам, ауаса апсчва рыуа заджвы дрызгІайырквын, йгІахъынхІыхуаштІ».

31 Ауаса Авраам йайхІвті ауи: «Моисейи Афи-
гІамбаркви йанырзымдзыргІвуазара, апсчва-
ква рыуа заджвы дгІабзагылыргыи, йгъйыз-
хъарцІушым ауат».

Йжвибыжъхауа ахъа

1 Датшагыи йрайхІвті Ауи йапхъагІвчва:
йгІамиуашта йгъаѣам арыатараква, ауаса
чІвыуара йызгІайуашті зхъатала йгІайуа ауат.
2 РыцІа йзагъхушын ауи, ахІахъвлу йыхъв-
дарцІата атенгъыз дтадрышвырквныз, арта-
хвыцква рыуа заджвы дхъйырпкІѣуа ацкІыс.
3 Швхъа швырхъвыхла. Уаща гваныхІ анйыр-
хІара, йкъванчагІа йахІв; дгІахъынхІвыхуаз-
тынгыи, йзыргІва; 4 МшкІы апны быжъны упны
дкъванчахаргыи, бжынгыи дуызгІайта йани-
хІвара: «скъванчапІ», — йзыргІва.

5 Йгыи йархІвті апостолква ХІыхвитыгІв:
хІазхъацІара йыхІзалархІа. 6 Йгыи йхІватІ ХІы-
хвитыгІв: гвадзцыракІ ахІа йнамдзауа азхъа-
цІаразтынгыи йшвыму, — йашвхІврын швара ари
ахІацІла: «уыцайдзаква шуцрахІву тшгІацІжва-
та атенгъыз тшлацІа», йаргыи йшвыздзыр-
гІвуашын.

7 ДзачІвыйа швыуа, чрын дйымата — йчва-
гъвауа, рахвы зхчауа, ауи архъа дангІайхра
йазхІвуаш: «угІайта ласылас айшва угІадз-
хъачІва»? 8 Араса йгъйайымхІвуашма ауи: «йыс-
фуш сызрыхІазырта, тшацІархъата, усайгвыгІв
сара съадзачауа-съадзажвуа, уадыргІвана ура
уча-уыжв»? 9 Дшизыразу йайхІвуашма ачрын,

унашвата йзичпаз ѓайырхъйаз ахъаз? 10 Йарауаса шваргъи, унашвата йшвзычпу зымгІва аншвырхъйара амцтахъ, йшвхІва: «хІара хІчрынпІ, закІгъи йахвым; йыхІчпарныс атахъыз хІчпатІ».

11 Йгъи йаъан: Иерусалим амгІва дыквта, Ауи Самарии Гальильейшти радгъыладысырталла далсуан. 12 Йгъи кыткІ данталуаз, йгІайпыралтІ Ауи чвабгІа зхъуаз жвагІвы, йгъи йгІашІастІ хъарачІвыла. 13 Йгъи йгІачважватІ ауат быжьдула: Иисус ХІымгІваквцІагІв, хІрыцхІаща. 14 Йгъи йаниба, Ауи йрайхІвтІ ауат: швцата, апщагІвчва тшдшвырба. Йгъи йаъан: ауат ѓадзацуз, штдрыцкъахтІ. 15 Ауат рыуа азаджв дшбзихаз йбан, быжьдула Анчва дйиртшхъвауа дгІахъынхІвыхтІ. 16 Иисус йщапІква рпынгъи тшкІайрышвтІ, дшизыразу йхІвауа; ауи Самарийа дауан. 17 Иисусгъи йджъауапхатІ: йгъжвагІвымма тшызрыцкъахыз? Ауахъауат ажвыгІвыгІв абоу? 18 Заджвгъи дгъгІарылымцІма, йгІахъынхІвыхта Анчва арштхъвара йызтуашыз, ари агІвыма йакІвымкІва? 19 Йгъи йайхІвтІ ауи: угІагыл, уца; уазхъацІара уахчатІ ура.

20 Афарисейчва разцІгІарагъи, Анчва Йнурштара ангІайуаш, Ауи йджъауапхатІ: йгъгІайуашым Анчва Йнурштара йузыбауата, 21 йгъи йгъырхІвушым: «абар араъа», йа: «анаъа». Ауаса, абар, Анчва Йнурштара швгвы апны йаъапІ. 22 ЙапхъагІвчвагъи йрайхІвтІ: йгІайуаштІ амшква, йыжвбара аншвтахъхуш *АгІвычІвгІвысна* ймшзаджвыкІ, йгъи йгъшвзыбушым.

23 Йгъи йшвархІвуаштІ швара: «абар анаѣа», «абар араѣа», — швымцан йгъи шващтІамлын.

24 Ауаса ац анГІамачвысра ажвГІванд ахѣакІ уалагата ахѣакІдза шГІатнарккІГІауа апшта йаѣазлуштІ *АгІвычІвгІвысна* йымш ѣаГІангъи.

25 Ауаса апхѣапхѣа Ауи джѣабаГІа дГІацІсуаштІ йгъи ддрыхѣаруштІ ари абанпара. 26 Ной йымшкѣа раГІан йшаѣаз апштагъи, ауаса йаѣазлуштІ *АгІвычІвгІвысна* йымшкѣа раГІангъи: 27 йчун, йыжвуан, тагѣжѣа дГІаргуан, хѣацІа йыццун — ауи амщдза, Ной ахѣвахІ дталынцІкІѣа, йгъи йрызГІайтІ адзы йгъи йахѣватштІ зымГІа, 28 йара ауаса, Лот йымшкѣа раГІан йшаѣаз апшта йаѣазлуштІ: йчун, йыжвуан, йхвГІун, йтиуан, йлацІун, йакѣцІун; 29 ауи амщдза, Лот Содом данГІатыцІ, квата йГІакІнылтІ амци атІГІвыши ажвГІвандла йгъи йаладзтІ зымГІа. 30 Ауаса йыѣазлуштІ ауи амшгъи, *АгІвычІвгІвысна* данГІаншущ. 31 Ауи амш ѣаГІан, атдзакѣ йыкѣчІву, зхІапчыпкѣа атдзы йГІвну, дГІакІнымцІыргІатІ ауат гІайахвныс; йара ауаса архѣа йыѣугъи, дГІахѣнымхІвыхргІатІ. 32 Дшвхѣшшвымраштылын Лот йтагѣжѣа. 33 Зпсы зхчара зтахѣхуш — йрыдзуаштІ, Сара сыхѣаз йызрыдзуагъи — йхчуштІ. 34 ЙшвасхІвитІ швара, ауи ауахѣ ГІвѣджѣ чвартакІ йылазлуштІ, азадѣв днахѣхѣуштІ, анахѣаныгъи дГІаныжѣхуштІ; 35 ГІвпхІвысчѣа лагуштІ: азадѣв днахѣхѣуштІ, азадѣвгъи дГІаныжѣхуштІ. 36 Йгъи йархІвтІ Ауи ауи ахѣаз: йабаѣу, ХІыхѣитыГІв? 37 Йаргъи йрайхІвтІ ауат: ахѣвади ѣану, ауаѣа тшазыркІкІуаштІ ауарѣакѣагъи.

ЙжвагІхауа ахъа

1 Йгъи йрайхІвтІ Ауи ауат аквырпшыга-
гІахІвахракІ, Анчва йанакІвызлакІгъи уйыз-
ныхІвара шатахъу, уулахъгъи аквуымцІауа:
2 акъала хІаквымхагІвкІ дыгъан, Анчва дичвым-
швауа, аугІагъи дырчвымпхащцауа. 3 Йгъи даъ-
ан ауи акъала апны пхІвысчвзабакІ, йгъи диз-
гІайуанта йылхІвун: «сджьагІвагІв сгІайчвыхча».
4 Йаргъи талейракІ йгъйымуазтІ. УадыргІвана
йхъа йайхІвхтІ: «сара Анчва сичвымшвузтын-
гъи, аугІа сырчвымпхащузтынгъи, 5 ауаса ари
апхІвысчвзаба санагІалмырбауазара, лджъа-
гІвагІв дичвысхчапІ, ауи ахІата ауи дшгІами-
хуаш, сшлыртынчуаш». 6 Йгъи йхІватІ ХІы-
хвитыгІв: шваздзыргІвыстІ, ахІаквымхагІв
хъпкІы йхІвауа. 7 Анчва йгърыйымтуашма щта
хчара Йара йалкІгагІвчва, уахъгъи-тшынгъи
йашІамсуа йшІапхъадзауа Ауи? Амгвжважвара
тшайтуашма Ауи? 8 ЙшвасхІвитІ швара, ймыр-
къвауата йритуаштІ ауат хчара. Ауаса АгІвы-
чІвгІвыспа, дангІайра, йгІайауашма адгъыл
апны азхъацІара?

9 ЙрайхІвтІ азджъакІгъи, хъпкІыра ры-
мамкІва тшызпхъадзуз анахъанатгъи назыр-
къвуаз, ари апш аквырпшыгагІахІвахракІ:
10 гІвыджь йнашылтІ аныхІварта Анчва йшІа-
пхъдзарныс, азаджв — дфарисейын, анахъаны-
гъи — дкъвадкІылхгІвын. 11 Афарисей, дгылын,
арса йхІвун йгвыла: «ХІгІазшаз, сузыразпІ Уара,
сара анахъант аугІаква съарапшым ахъаз: агъ-
ычква, амцІвагІвква, азхъацІара пызтшуа йгъи
ари акъвадкІылхыгІв: 12 мчыбжъыкІ апны гІван

сурьчитІ, йґасхъахІауа зымґІва ажвабачІвы сшвитІ». 13 АкъвадкІылхыґІвґи, хъарата дгылата, йылаква гыцтІыйымхуазтІ ажвґІвандла, ауаса йґвтшпы дасуан йґи йхІвун: «ХІґІазшаз, срыцхІаща, сгванахІырхІаґІыпІ». 14 ЙшвасхІвитІ швара: ари йакІвпІ зпны йцахыз йкъванчаґІара дґІалгата, йґвнахІква йхъыхта, анахъани гъйакІвым. Ауаса дзачІвызлакІґи, зхъащтІызхуа-днаркъвхуштІ, зхъа назыркъвуаґи-дщтІыххуштІ.

15 ЙызґІаргуан Ауи асабикваґи, ауат дрыквхІвахІвырныс. Ауи анырба, апхъаґІвчва йґдмырхвитуазтІ ауат. 16 Ауаса Иисус йызшІитын асабиква йґи йхІватІ: йшвырхвит асабиква йсызґІайырныс Сара йґи швырпырамсын; ауаса *Анчва Йнуриштара* зчІву ауат йрапшу ракІвпІ. 17 Тамамта йшвасхІвитІ швара: *Анчва Йнуриштара* асаби йапш тшадзымкІылуа, ауи ауаъа дгыталуашым.

18 Йґи дицІґІатІ Ауи ахъадаква рыуа заджвы: АрыпхъаґІвхІалъаль, сара йсчпара атахъыйа, бзазара цІхъва змам саура ахъаз? 19 Йґи йайхІвтІ ауи Иисус: йачІвыйа уара Сара *хІалъаль* – хІва узсыпхъауа? Заджвґи дґхІалъальым, АнчвазаджвыкІ йакІвымкІва. 20 Уара йыудырума Анчва йщаквыргылраква: «*АхъапщылазцІабыргра пумтшын, ґІвы думицын, уымґзычын, аґІвычІвґІвыс йыквым йыквуымцІан, уани уаби хвы рыба*». 21 Йарґи йхІватІ: ауи зымґІва сара счкІвынхъара угІалагата йыґьсымрыдзтІ. 22 Ауи йаниґа, Иисус йайхІвтІ ауи: уыжвґи закІыпІ йузымхъауа уара: йуыму зымґІва тйыта арыцхІаква йырзыша, йґи йуымазлуштІ байараду

Гарщ апны, йгы углайта Сара усыщтаней.
23 Ауатква анигІа, ауи мчыта йылахь аквылтІ,
ауаса швабыжта байакІ йакІвын. 24 Ауи йылахь
шаквылыз аниба, Иисус йхІватІ: йабадзабаргву
байара зму *Анчва Йнурштара дталырныс*.
25 Ауаса амахтша агвырларта йкІылударныс
рыцІа ймайрапІ, абайа *Анчва Йнурштара дта-*
лырныс ацкІыс. 26 ЙызгІазгы йырхІватІ: дза-
чІвыйа щта йхчахуш? 27 Иисусгы йхІватІ:
агІвычІвгІвысква йрылымшауа Анчва йылшитІ.

28 Йгы йхІватІ Петр: абар, хІара йхІымаз
гІаныгІжыын, Уара хІуыщтагылтІ. 29 Йаргы
йрайхІвтІ ауат: тамамта йшвасхІвитІ швара,
заджвгы дгъаѣам, этдзы гІанызжыыз, йа йтагв-
жва, йа йащчва, йа зани заби, йа йгІарийыгІвчва
Анчва Йнурштара ахъаз, 30 йгы йзымтхуш щар-
дала йайхІата ари азаман агІан, йгІайуа аскв-
шышвгы – цІхъва змам абзаара.

31 АжвыгІвыгІвгы йнайрыскІан, Ауи йра-
йхІвтІ ауат: абар, хІара Иерусалим хІталитІ, йгы
йыншущтІ зымгІва афигІамбарква йргІвыз
АгІвычІвгІвыспа йыхъаз: 32 ауаса Ауи дыр-
напІыцІацІахуштІ Анчва дзымдыруа аугІаква,
йгы рычвгъара йхъысуаштІ, йгы йыквшви-
уаштІ, йгы йыквджвджвуштІ, 33 йчвагы дан-
тарпІкъара амщтахь, дырщуаштІ Ауи, йхпахауа
амшгы Ауи дгІабзагылхуаштІ. 34 Ауатгы Ауи
йхІваз апны закІгы гыгІаргвнымгІвытІ, ауи
ажвагы йырчвыцІакІын ауат, йгы йгырзал-
мыргузтІ ауат йгІарахІвхаз.

35 Йгы йаѣан: Ауи Иерихон дазаргванхауа-
та, амгІва атшпы лашвкІ дчІван, рыцІаша
дахІвауа. 36 Йгы йанигІа, угІажвпІаракІ ша-

гІвсуаз, ауи дазцІгІатІ: ачІвыйа йгІаншауа?
 37 Йгъи йархІвтІ ауи Иисус Назорей дшагІвсуа.
 38 Йаргъи быжьдула дцІрытІ: Иисус, Давид Йпа!
 СрыцхІаща! 39 Апхъала йцузгъи ауи мчыла йшІа
 ркІуан, ауаса ауи рыцІагъи дута дцІыруан: Да-
 вид Йпа, срыцхІаща сара! 40 Йгъи дгІашІасын
 Иисус, унашвагъи рзичпатІ дйызгІардныс ауи.
 Ауахъауыгъи дангІаскІа, Иисус дицІгІатІ ауи:
 41 ачІвыйа уара йыутахъу, Сара уара йыузысч-
 парныс? Йаргъи йхІватІ: СыхвитыгІв, сылаква
 йшырбахуаш. 42 Йгъи йайхІвтІ ауи Иисус: йбах!
 УазхъацІара угІанахчатІ уара. 43 Йаргъи йарауи
 асахІат йбахуа далагатІ йгъи йцІыхъва дтагылтІ
 Ауи, Анчва дйыртшхъвауа. АугІа зымгІвагъи,
 ауи збаз, Анчва артшхъвара йыртІ.

Йжвежвхауа ахъа

1 Йаргъи Иерихон дталтІ, йгъи акъала дал-
 суан. 2 Йгъи абар даъан гІвычІвгІвыскІ, Закхей-
 хІва йзыхъзыз, ауи дкъвадкІылхыгІвхъадан,
 йгъи дбайан. 3 Ауи Иисус швабыжта дибарныс
 йтахъын, Ауи ймагІну йгъи дгъизымбузтІ аугІа
 ъажвпІаз ахъаз, йауа ухІварыквын йыурала
 дхвыцын. 4 Йгъи рапхъала дыгІвын, ацІла
 дхъалтІ, Ауи дшизыбуш ахъаз. Иисус ауи ам-
 гІвала дагІвсра атахъын. 5 Иисус ауи адзхъа дан-
 надза, хъахъыла дпшын йгъи йайхІвтІ ауи: Зак-
 хей, угвжважва угІакІныцІырыныс; ауаса уахъчІва
 Сара уара уыунагІва саъазара атахъыпІ. 6 Йар-
 гъи дгвжважвауа дгІакІныцын, йгъи дгІай-

райгватІ Ауи дгвыргъауа. 7 Йгъи йанырба, зымгІва йгІвыдмыдуа йалагатІ йгъи араса рхІвауа: Ауи дшпагІашІас ари йапш гвана-хІрхІагІвы йпны. 8 Закхейгъи дгІагылын йгъи йайхІвтІ ХІыхвитыгІв: абар, йсыму абжа, ХІы-хвитыгІв, сара арыцхІаква йрыститІ, чІыда гІаз-квсхызгъи пщынла йаласырхІата йырсрау-хуаштІ. 9 Йгъи йайхІвтІ ауи Иисус: уахъчІва йазгІайтІ агІахчахра ари аунагІва, йауа ухІва-раквын ауыгъи Авраам дипапІ. 10 Ауаса АгІвы-чІвгІвыспа дгІайтІ йыдзыз гІайаухырныс йгъи йгІайхчахырныс.

11 Ауат ауи йаназдыргІвуаз, Ауи йхІватІ аквырпшыгагІахІвахракІгъи, йауа ухІварыквын Ауи Иерусалим дачвыхъарамкІва даъан, даргъи араса йазхъвыцуан, Анчва Йнурштара йара ужвжвы йыншара атахъыта. 12 Иисус йхІватІ: гІвычІвгІвыскІ патІу зкву тІкъвымкІ йауаз къральхъаракІ дджвыквылтІ, апаштахІра гІай-ахвта дгІахъынхІвыхырныс. 13 ЙжвыгІвчрынчва зшІитын, ауи йриттІ ауат жвахъапщакІ йгъи йрайхІвтІ ауат: «сара сгІайхнацІкІъара ауат закІы йашврыхъва — йалашвырхІа». 14 Ауаса йыш-тагІвчва дырчвымгъын ауи, йгъи йауырцттІ йцІыхъвала ахІвачІвыгІвчваква, йшырхІвуш: «йгъхІтахъым, ари паштахІра йкІныс хІара хІый-напІыцІата». 15 Йгъи йаъан, ауи дангІахъын-хІвых, апаштахІра гІайахвта, унашва йчпатІ ауи йызгІазшІыртныс ауат ачрынква, ахча зыйтыз, йгІайырдырныс, дасу йалайчпаз — йшала-йырхІаз. 16 Йапхъахузгъи дгІайын йхІватІ: «ап-швыма, ухъапщакІ жвахъапщакІ гІанатІ. 17 Йаргъи йайхІвтІ ауи: «сузыразпІ, чрынбзи;

ахвыц уазцІабыргта уанГІацІцІзара, уырхъа-
 дзгылазла жвакъалакІ». 18 ЙгІвуджъхузгъи
 дГІайын йхІватІ: «уахчахъапщ, апшвыма,
 йгІанагтІ хвба». 19 ЙайхІвтІ арыгъи: «уаргъи
 уырхъадзгылазтІ хвкъалакІ». 20 Датшаджвгъи
 дГІайын йхІватІ: «апшвыма, абар уахчахъапщ,
 сара йкъасчІвахыта сзайгвгыГвуаз; 21 ауаса сара
 сучвшвун уара, йауа ухІварыквын зтахъыра
 багъята йыхвынглу угІвычІвГІвыспІ: йгІа-
 уахвитІ йыщтІауымцІаз, йгъи йгІацІаугитІ
 йлауымцІаз». 22 ЙайхІвитІ ауи: «уажваквала
 ухІаквым схуштІ, ачрын мцхІвагІв! Уара йуды-
 руан, сара зтахъыра багъята йыхвынглу
 сшГІвычІвГІвысу: йгІасахвитІ йыщтІасымцІаз,
 йгъи йгІацІазгитІ йласымцІаз. 23 Щта уара сах-
 ча закІы йзауымрыхъвайа-йзалаумырхІайа? Сар-
 гъи, санГІайхра, йышГІасутхуаш ауат йры-
 лархІата». 24 Йгъи йрайхІвтІ ауи йыцыгІвчва:
 «йгІайыквшхта ауи ахъапщачча, жваба зму
 йышвт». 25 Йгъи йархІвтІ ауат ауи: «апшвыма,
 ауи хъапщаччата жваба йымапІ». 26 «Йшвас-
 хІвитІ швара, дзачІвызлакІгъи йзыму йытхуштІ,
 йзымамгъи йгІайыквххуштІ, ауи йыму. 27 Ара-
 та сагъачвагъи, йзымтахъхаз, сара апаштахІра
 скІырныс йснапІыцІагІвта, араъа йгІажвдта
 спахъ йшвпкъа».

28 Ауи анрайхІв амцтахъ, Иисус Иерусалим
 ахъыла йымГІва дыквылтІ. 29 Йгъи йаъан: Ауи
 Виффагии Вифании данырзынаскІъа Елион-хІва
 йызпхъауа ахва апны, йщтийтІ Ауи апхъагІвчва
 рыуа гІвуджъ 30 йгъи йрайхІвтІ: хІызрайша
 йнажвбауа акыт швцата, шваннарылалра йгІа-
 швауаштІ йкІыдхІвалата заджвгъи дзыквымчІвас

тшадачкІвынкІ, йгІакІыдшвщтта ауи, йгІажвд.
31 АджвырагІв гІашвцІгузтынгъи: «ачІвыйа
швара йызгІакІыдшвщтуа ауи?» – швара араса
йшвхІва: «ауи ХІыхвитыгІв йтахъыпІта». 32
АущтыгІвчва йцан йгъи йгІараутІ, Ауи ауат
йшгІарайхІвыз апш. 33 Ауатгъи атшадачкІвын
йангІакІыдырщтуаз, ауи зчІвыз йгІарархІвтІ:
ачІвыйа швара йызгІакІыдшвщтуа ауи? 34 Дар-
гъи йырхІватІ: «ауи ХІыхвитыгІв йтахъыпІ». 35
Йгъи йгІардтІ ауи Иисус йпны; рчгІвычаквагъи
атшадачкІвын йаквдрышвын, Иисус даквдыр-
чІватІ. 36 Ауи даквчІвата данцузгъи, аугІаква
рчгІвычаква амгІва йыквырпсун. 37 Ауи ахва
Елион-хІва йызпхъауа агІакІнылырта дангІа-
заргванха, апхъагІвчва зымгІва гвыргъара рыкв
быжьдула Анчва ддыртшхъвауа йалагатІ аджъа-
щахъварадуква йырбаз зымгІва рыхъаз, 38 ара-
са рхІвауа:

*Бзирала дырчыпІ АпаштахІ,
ЙгІайуа, ХІыхвитыгІв йыхъызла;
ажвгІванд апны – мамыр,
гІарц апынгъи – артихъвара.*

39 Афарисейква рыуа зджъакІы йгІайархІвтІ
Ауи аугІажвпІарала: АрыпхъагІв, йашІарыс
уапхъагІвчва. 40 Йаргъи йджъауапхатІ: йшва-
схІвитІ швара: ауат ашІасуазтын, ахІахъвква
йгІацІыруа йалагуштІ. 41 Ауи рыцІагъи да-
заргванхата, акъала аниба, дазчІвыуа далагатІ
42 йгъи йхІватІ: йузыдырзарквын ура, йаму-
азтын ари амш, амамыр уазызырцауа, ауаса
ужвы ура ауи уылаква йырчыцІакІпІ. 43 Ауаса
йузгІайуаштІ амшква, уагъачва йгІаугвыквылта

уангІакІвдыршуш, ахъатаква зымгІвалагъи уангІадырпІцІуаш, 44 йгъи уаныркъуштІ адгъ-ыл уара, убзазагІвчвагъи, йгъІакврыжъуашым хІахъвкІ апны хІахъвкІгъи, Анчва йгІайра аза-ман ъауымдырыз ахъаз. 45 АныхІвартагъи дан-нашыл, Ауи атигІвчва гІаджвылыЙцауа далагатІ, 46 йрайхІвуа ауат: йгІвыпІ: «Йгъи йахъызхуштІ Сара стдзы ныхІварта тдзыта», ауаса швара ауи хІаджъратхъвмарртата йшвчпатІ.

47 Йгъи йайрыпхъун ансимшы аныхІварта апны. АпцагІвхъадаквагъи ахабзарыпхъагІв-чвагъи, Израиль рахІбачваквагъи йазыпшгІун Ауи йхІаквым рхарныс, 48 йгъи йгърымды-руазтІ йшырчпушыз, ауаса аугІа зымгІва йкъвымцІуата йыздыргІвуан Ауи.

ЙгІважвахауа ахъа

1 Йгъи йаъан: зны, Ауи аныхІварта апны аугІа анайрыпхъуз йгъи Анчва йгІахчахра агвыргъъара анрайхІвуаз, апцагІвхъадачви, ахъабзарыпхъагІвчви, ахІба уасаражвкви йгІайыдгылын 2 йгъи йархІвтІ Ауи араса: йгІахІахІв хІара, йамгІанхъгалрайа Уара ауи злаучпауа, йа дызда Ауи, йгІауызтыз Уара ауи ахъгалра? 3 Йаргъи йриттІ ауат джъауапта: сшвцІгІуштІ Саргъи швара закІыла, Саргъи йгІасашвхІв: 4 Иоанн йакІвигашуз адзыцІщра гІайызтда, Анчва йакІвма, момкІва аугІа ракІв-ма? 5 Даргъи йазхъвыцуа йабархІвуан: араса йыхІхІварыквын: «Анчва йгІайыйттІ», Ауи йхІвуштІ: «ачІвыйа швара йзйызхъашвымцІа

ауи?» 6 Арасагы йыхІхІварыквын: «аугІа
ракІвпІ», аугІа зымгІва хІахыла хІдырпІа-
пІуштІ, ауаса аугІа йазхъарцІитІ Иоанн
дшфигІамбару. 7 Даргы йырджъауапхатІ, йыш-
рымдыруа йгІайызтыз. 8 Иисусгы йрайхІвтІ
ауат: Саргы швара йгъшвасхІвуашым, йам-
гІанхъгалру ауи зласчпауа.

9 Йгы далагатІ йрайхІвуа аугІа ари апш
аквырпшыгагІахІвахракІ: гІвычІвгІвыскІ ажъ-
уатра лайцІатІ йгы йриттІ йынкъвыргарныс
ажьнкъвгачва йгы дджвыквылтІ щардала. 10
АцІагахра азаман аннадза, дырзагІайщтитІ ажьн-
къвгачва йычрын, йгІацІаргаз ажьн ауа гІайырт-
ныс, ауаса ажьнкъвгачва дырпкъан ауи, закІгы
йырымтуата дауырщтхтІ. 11 Уыжвгы датша
заджвы дищтитІ, ауаса ауат ауыгы йарауаса
дырпкъан дгІаджвыквырцІатІ; 12 йхыухауа-
гы дищтитІ, ауаса ауат ауыгы дырпкъатІ, хвыр-
тагы йыквырцІан дгІатырцатІ. 13 Йгы йхІватІ
ажъуатра апшвыма: «ачІвыйа сара йсчпуш?
ДсцтипІ бзидздза йызбауа спа. Ауи данырбара
йпхащарныс ауыпІ». 14 Ауаса ауи данырба,
ажьынкъвгагІвчва йазхъвыцуа йалагатІ, йабар-
хІвхуа: «ари дтынхагІвыпІ; дхІщыпІ ауи, атын-
ха хІара йшхІчІвхуш апш». 15 Йгы дгІатырцан
ауи ажъуатра, дырщытІ. Щта ужвы ажъуатра
апшвыма ауат йрзихушйа? 16 ДгІайта йайтуаштІ
апсра ауат ажьнкъвгачва йгы йритуаштІ ажъу-
атра датша зджъакІы. Ауи згІазгы йырхІатІ:
Анчва хІачвихчатІ! 17 Йаргы, дырпшын ауат,
йхІатІ: йгІаныцІуайа ари АгІвыра ажва:

*«АхІахъв, аргылыгІвчва йрымуыз,
ауи йцатІ ахъата йахІахъвхъадата»?*

18 ДзачІвызлакІгъи, ауи ахІахъв йаквшвауа, дхъвашуштІ, йгІазыквшвауагъи ауи дарпІ-цІуаштІ. 19 Йгъи йазыпшшгІун ауи азаман ахъабзарыпхъагІвчви апщагІвхъадачви йхІаквым рхарныс, ауаса аугІа йрчвшватІ. Ауат йгІаргІвынгІвытІ, Ауи ауат рыхъаз йшихІваз ари аквырпшыгагІахІвахра.

20 Йгъи ддырхъвыхуа Ауи ауат рыугІаква йзагІарщтитІ, Анчва йыджІылазшва тшырчпауа, дызладыркъванчуш ажвакІла дгІаркІырныс, алагІвчви йгъи ауысщтийгІви рхІаквым дартырныс. 21 Йгъи йцІгІатІ ауат Ауи, йырхІвауа: АрыпхъагІв, хІара йгІдыритІ, Уара тамамта йшухІвауа йгъи йшаурыпхъауа, алыхкІгъи шумчпауа, тамамта Анчва йымгІва йшазубжъауа. 22 ХІырхвитума хІара акесарь къвады йзыхІтийырныс, момкІва хІгъырхвитымма? 23 Йаргъи, ауат ркъвышра гІайгвынгІвын, йрайхІвтІ ауат: 24 йсшвырба Сара адинарий¹²: йызсурату-да ауагъа йану йгъи йызгІвыруда? Даргъи йырхІватІ: акесарь. 25 Йаргъи йрайхІвтІ ауат: ауи акІвпІта, кесарь йчІвы акесарь йышвтх, Анчва йчІвгъи — Анчва. 26 Йгъи йгърылымшатІ ауат ажвакІла дгІаркІырныс Ауи аугІа рпахъ, йджъауапгъи джъарщауа, закІгъи гърымхІвахтІ.

27 Йгъи йгІайыдгылтІ асаддукейква рыуа зджъакІы, агІабзаргылхра йазхъазымцІуз, йгъи йцІгІатІ Ауи: 28 АрыпхъагІв, Моисей йыхІзигІвтІ хІара: «Заджвы йаща гІари димауата дпсрыквын, ауи йгІайтынхаз йпхІвыс йара днайахв-ра атахъыпІ, йаща хъшара йымамкІва

¹² *Динарий* — аимператор йсифат аныта римрызнахча.

дгІанымхара ахъазла». 29 Ауи акІвпІта, быжь-гІвайщчва аъан: йапхъахуз тагвжва дгІайгын, гІари дйымамкІва дпсытІ; 30 йгІвыджьхузгьи, 31 йхыгІвхузгьи дгІайгтІ ауи, йарауаса абжьы-гІвгьи, гІари дгІартнымхауата йпсытІ. 32 ЙцІы-хъвахуз апхІвысгьи дпсытІ. 33 Ауи акІвпІта, агІабзаргылхрамш, ауат рыуа дызтагвжвахуш-да ауи? Ауаса абжьыгІвгьи тагвжвата дрыман ауи. 34 Йгьи йрайхІвтІ ауат Иисус: ари аскв-шышв агІариква тагвжвагьи дгІаргитІ, хъацІагьи йыццитІ. 35 ЦІхъва змам абзазара эквнайырга-та апсчваква ргІабзаргІылхра зылшуш, тагвжва дгыгІаргуам, хъацІагьи йгъйыццум, 36 ауаса йп-нысгьи ауат йгърылшахуашым: йауа ухІвузтын амальяиккъква йрапшхуштІ, Анчвагьи йпачвапІ ауат, агІабзаргылхрамш йъапачву ахъаз. 37 Апс-чва шгІабзаргылхауа, — Моисейгьи йгІайырбатІ адзхІвы ахъаз агІахІвахра апны, ауи ХІыхви-тыгІв данйыпхъауа Авраам дйы-Нчвата, Исаак-гьи дйы-Нчвата, Йаковгьи дйы-Нчвата. 38 Ауи — апсчва дгъры-Нчвам, ауаса йыбзу; йауа ухІва-рыквын Ауи йпны зымгІва бзапІ. 39 Ари ахъаз ахъабзарыпхъагІвчва рыуа азджьакІ йырхІватІ: АрыпхъагІв, Уара бзита йыухІватІ. 40 Ауаса ауат закІылагьи йцІгІаныс йгъымгвышхвахуазтІ. Йаргьи йрайхІвтІ ауат: 41 йшпакІву йшырхІвауа, Мессийа Давид дипата? 42 Ауаса Давид йара йхІвитІ Ауарадкава ркътап апны:

«ЙайхІвтІ ХІыхвитыгІв СыхвитыгІв: угІачІва Сара сагъьмала, 43 Сара Уара уагъа-чва ущанІква йгІарыцІасцІанцІкІа».

44 Ауи акІвпІта, Давид Ауи ДйыхвитыгІвта дйыпхьитІ. ЙшпакІву щта Ауи дшипуп?

45 АугІаквагьи зымГІва аныздзыргІвуаз, Ауи йапхьягІвчва йрайхІвтІ: 46 тшырчвыхъышвхча ахьябзарыпхьягІвчва, ачГІвычакІархвхваквва зшвыта йныкъварныс бзи йызбауа, аугІа райзартаква рпны хвы рыквырцІауа йГІарпылныс бзи йзбауа, аныхІвартаква рпны аугІа рпахъ апхъачІвартаква йчІварныс бзи йзбауа, ачаражвраквва рпны пІатІу зкву ачІвартаква йчІварныс бзи йзбауа; 47 апхІвысчвзабаквва рымлыкв зымгІва йтадзуа, ауыратагьи Анчва йшІапхьядзауа тшызчпауа: арат рыцІа хІаквымхара ду рауаштІ.

ЙГІважвизакІхауа ахъа

1 Йгьи йылаквва гІащтІихын, Ауи йбатІ абайачва, ахчатацІарта рГІаграквва тазцІуз. 2 Йгьи йбатІ Ауи, пхІвысчвзабарыцхІакІ йарауагъа гІвахчяхъвашакІ тазцІаз, 3 йгьи йхІватІ: тамамта йшвасхІвитІ швара: ари ачвзабарыцхІа зымГІва рацкІыс щарда талцІатІ; 4 йауа ухІварыквын ауат зымГІва рчІыда акІвпІ йтарцІаз ахчатацІарта, ларгьи лрыцхІагІара йГІалылхын йталцІатІ зымГІва, дызлабзазушта йлымаз.

5 Йгьи йаналачважвуз азджъакІ аныхІварта, ауи хІахъвпшдзала йшрыпшдзу йгьи йшырчІарачІу, Ауи йхІватІ: 6 йГІайуаштІ амшквва, швара арагъа йыжвбауа ахІахъв хІахъвкІгьи йГІаквымхауата йаналарыхъвашахуш. 7 Йгьи йцІгІатІ Ауи: АрыпхьягІв, ауатквва анбагІаншуш? Дыргатагьи йагъазлушйа ауатквва анГІаншуш? 8 Йаргьи йхІватІ: швсакъха, ар-

гІващара швшаздмырцуш апш. Ауаса щарда-
гІвы гІайуаштІ Сара сыхъыз тшыцІаркІуа, йыр-
хІвауа: «ауи Сара сакІвпІ», йгьи: «азаман аргва-
ныпІ». Ауат шврыщтамгылын. 9 ЙаныжвгІа-
рагьи айсракви атшгІащгІыхракви рыхъаз, аша-
ра тшашвымтын: ауаса ауатква йгІаншара
атахъыпІ апхъапхъа, ауаса ауи асахІат гъакІвым
йдунептшагІу.

10 Ауи агІан йрайхІвуан ауат: угІахъакІ
аугІахъакІ йыргвыквылуаштІ, апаштахІракІгьи
– апаштахІракІ; 11 йаъазлуштІ адгъылцІсраду-
гьи, згІвачвгъагьи, млачвгъагьи, йаъазлуштІ
угІазрыхІауа агІаншараква, ажвгІвандлагьи —
адыргадуква. 12 Ауаса ауатква рапхъала чвгъа-
рала швцІыхъва йгІатагылуаштІ швара, рнапІ-
квагьи швыквщтІырхуаштІ, аджъутныхІварта-
кви атутанакътаракви шврыртуаштІ, апашта-
хІкви ащтауысынкъвгагІвкви швырзыдырцуштІ
Сара сыхъыз ахъазла. 13 ШвазнарцуштІ ауи шва-
ра ашахІатра. 14 Ауи акІвпІта, швгвы йташвкІы
швшазымхъвыщуаш йнамдзаскІва, швгІахчахра
ахъазла йшвхІвуш, 15 ауаса Сара йшвыстуаштІ
швара ауи апш ажвии, уасаражври, йзылымшуш
йгІапшІагылныс, джъауапгьи гІартныс заджвза-
джвыкІгьи швара йгІашванкъвакъвуа. 16 Раз-
хъацІарагьи птшуаштІ швгІазрийызгьи, швай-
щчвагьи, швъахІыльчвагьи, швыгІвзачвагьи.
Швыуа азджъакІгьи рщуаштІ. 17 Йгьи швыр-
чвымыгъхуштІ зымгІвагьи Сара сыхъыз ахъаз.
18 Ауаса швхъа хъвыцкІгьи гъыдзуашым.
19 ШвчхІарала йшвхча швпсква швара.

20 Йаныжвбара, Иерусалим рыла йкІвыр-
шата, ауи асхъан йжвдыр, ауи аларыхъвашара

шхъарахым. 21 Ауи асхъан Иудейшта йыгъу ащхъаквала йыгІвыргІатІ; Иерусалим йтугъи, угІатыці ауагъа; акытква йыгъугъи, утамылхын ауагъа, 22 ауаса ауи ахІаквымхара амшква ракІвпІ, йшыншуш йгІву зымгІва. 23 ЧІвыуара рызгІайуаштІ зчва йалашваз йгъи кІкІахшыла йзырчауа; ауаса йагъазлуштІ рыцхІараду адуней апны йгъи йрызгІайуаштІ гІазабчакъраду ари аугІа; 24 ахІвапынцІагъи йщтІанацІуштІ йгъи йырцахуштІ агъарта аугІаква зымгІва рпны, Иерусалимгъи Анчва дзымдыруа аугІаква рщапны йагвычІуштІ, аугІаква рзаман алымгахын-цІкъа. 25 Йгъи йагъазлуштІ дырга амарагъи, амызгъи, айачІваквагъи рпны, адгъыл апынгъи аугІаква ргвгъаджъра, амшын йгІапкІыз абжъы ргІауа, 26 аугІаква ашвара йанакъватшуаш адуней йазгІайуа агвмачІыгІвараква йазпшуа: ауаса агІарцкъаруква рыцІсхуштІ. 27 Йгъи дырбуштІ ауи агІан АгІвычІвгІвыспа, апстхІва далагылата дгІайхуа къарудудздзи ртшхъварадудздзи йымата. 28 Ауатква ншауа йаналагара, швгІагылта швхъаквагъи гІащтІышвх, ауаса йгІаргванхитІ швгІархвитра.

29 Йгъи йрайхІвтІ Ауи ауат аквырпшыга-гІахІвахракІ: швапшы ари ахІацІла, анахъанатацІлаква зымгІвагъи: 30 ауат къагІауата йаныжвбауа, йгІашварымхІвуатагъи йыжвдыритІ апхын шаргвану. 31 Йарауаса шваргъи, йаныжвбара, ауи йыншауа, йыжвдыр, Анчва Йнурштарашаргвану. 32 Тамамта йшвасхІвитІ швара: ари абанпара йгъыквцІуашым, ауатква зымгІваншандзкІа. 33 АжвгІвандгъи адгъылгъи йгъагъазлахуашым – йагІвсуаштІ; ауаса Сара сажва-

ква гъагІвсуашым. 34 Швхъаква швырхъвых, швгква шымхІахъахуш чара-жврали абазара ахъгвыргІвараквали, ауи амш йжвымдырдзакІва йышгІашвхъымдзуш, 35 акІата апш. Ауаса йгІанакІуаштІ ауи шардагІвы адгъыл алакта йыквбзазауа зымгІва. 36 Швгвантшнызла, йанакІвызлакІгъи Анчва швишІапхъадза, йышшвызрыкъъарууаш ауатква швгІарыцІсныс, АгІвычІвгІвыспа йпахъ швымпхацауа швшзагІагылуаш апшта.

37 Тшынла Ауи йбжьун аныхІварта апны, ацІхквгагъи дгІатыцІуанта Елеон – хІва йзпхъауа ахва апны йгун, 38 аугІахъа зымгІвагъи щымтадза йызгІайуан Ауи аныхІварта йыздыргІвныс.

ЙгІважвигІвбахауа ахъа

1 Пасха – хІва йзпхъауа АчІахъвамщаква ргвыргъяхъвмш гІаргванхун. 2 Йгъи йазыпшшгІун апщгагІвахІбачви ахъабзарыпхъагІвчви, Ауи дшырщуаш, ауаса ауат аугІа йырчвшун.

3 Йгъи дйылалтІ Иблис Иуда, Искарот – хІва йзыпхъуз, АжвыгІвыгІв рпхъадзара йауаз; 4 йаргъи дцатІ драйкъангъашныс апщгагІвахІбачви ачІапщгагІвчва рахІбачви, Ауи ауат дшырнапІыцІайцІуш. 5 Даргъи гвыргъьатІ йгъи йадгылтІ ахча йыртныс. 6 Йаргъи йыргвыгъатІ йгъи дазыпшгІауа далагатІ йырзымайрахуш азаман, Ауи аугІа йрымбауата дшырнапІыцІайцІуш.

7 АчІахъвамщаква рымш аннадза, пасхасыс къвырманта йырщра анатахъыз; 8 йщтитІ Иисус Петри Иоанни, йрайхІвын: швцата пасха хІызшврыхІазыр, хІара ауи йышхІфуш апшта. 9 Даргъи йархІвтІ Ауи: йхІрыхІазырныс йабаутахъу? 10 Йаргъи йрайхІвтІ ауат: абар, акъала шванрылалра, дгІашвшІашвуштІ гІвычІвгІвыскІ цІыквла дзы йгауа; ауи йцІыхъва швтагылта атдзы дъанашылуа швнашыл; 11 йгъи йашвхІвуаштІ атдзы апшвыма: «йгІауайхІвитІ уара АрыпхъагІв: «Йабаъу апещ, Сара сапхъагІвчва сыцта пасха ъасфуш?» 12 Йаргъи йшвйырбуштІ асасчва йрызрыхІазыру пещдукІ, йалыргата; ауаъа йшврыхІазыр. 13 Ауат цан йгъи йгІараутІ, Ауи йшгІарайхІвыз апшта, йгъи йдыхІазыртІ апасха.

14 Ауи асахІат аннадзагъи, Ауи айшва дадзхъачІватІ, апостолквaгъи йыцта. 15 Йаргъи йрайхІвтІ ауат: швабыжта тахъыра ду азсыман Сара йшвыцсфныс ари апасха сгІазабчакърагІацІсраква рапхъала: 16 ауаса, йшвасхІвитІ швара, йшсымфуш ауи, Анчва Йнурштара апны йнымшакІва. 17 АквпІигъи гІайахвын, дхІвахІвын, йхІватІ: йнашвахвта ари агІвшвша, 18 ауаса йшвасхІвитІ швара, йшсымыжвуаш ужвы уалагата ажъмахъв ашвыр йгІалху гІвадзы, Анчва Йнурштара гІамикІва. 19 АчІахъвагъи найахвын, дхІвахІвын, йакъвитшын йгъи йриттІ ауат, йхІвауа: ари Сара схъвади акІвпІ, швара швыхъаз йщтІацІахауа. Йшвчпала ари Сара салагІашвшвыргвалашвахлауа. 20 Йарауаса аквпІигъи ахъвлапынчара амщтахъ, йхІвауа: ари акІвпІи Сара сщала йрыбагъу агвынгІыра шІыцпІ, швара швыхъазла йрычІвахауа.

21 Ауаса абар анапІы Сара спны азхъацІара пыз-
тшуа дсыдзхъачІвапІ айшва, 22 ауи акІвымкІва
йыухІварыгыи АгІвычІвгІвыспа Йара йзалххъаз
амгІвала дцитІ, ауаса чІууара йызгІайуаштІ
агІвычІвгІвыс зхъатала азхъацІара аптшра
гІайуа. 23 Даргы аджв аджв йцІгІауа йалагатІ:
рыуа дзачІвыйа ауи зчпуш?

24 ЙгІаншатІ амакІыракІгыи ауат рквта,
рыуа рыцІа дута йпхъадзачІву. 25 Йаргы
йрайхІвтІ ауат: аугІахъаква рпаштахІква йры-
хвитыгІвпІ ауат, хъгалра зымугыи ауат рпны
йрыпхъитІ «БзирахагІвыта». 26 Швара ауат
швырмапшхан: ауаса дута йпхъадзу швара
швпны даъазтІ айцІбазшва, ауысщтийыгІвгыи —
чынызшва. 27 Ауаса дута йпхъадзуда: айшва
йадзхъачІву момкІва ауи йзычрынуа? Йадзхъа-
чІу гъйакІвымма щта? Сара швквтабжъара —
йшвзычрынуа сйапшпІ. 28 Ауаса швара йсыцыз
швакІвпІ, Сара сгІазабрхъвыхраквара рпны; 29
Саргы йшвыститІ швара сажва багъа, Сара Саба
йшгІаситыз апшта Анурштара, 30 швара Сара
сайшва швадзхъачІвата швшчуш йгыи швшы-
жвуаш Сара Снурштара апны. Йгыи швры-
квчІвуштІ швара атахтаква йгыи йрыквшвхуштІ
хІаквым Израиль ржвыгІв йгІархъшахъыцыз
аугІахъакІва. 31 Йгыи йхІватІ ХІыхвитыгІв: Си-
мон, Симон, абар, аркъванчагІв (Иблис) дахвун,
агвадз апш швирыпшарныс: 32 ауаса Сара уара
уыхъазла Анчва сйыхІвун, уазхъацІара шым-
пскІбахуш, уаргы зныкІ, уангІахъынхІвыхра
уайщчваквара гІарыбагъа. 33 Йаргы йайхІвтІ
Ауи: СыхвитыгІв, Уара суыцнайныс схІазырпІ
атутанакътараргыи спсгыи щтІасцІарныс. 34 Ауаса

Иисус йхІватІ: йуасхІвитІ уара, Петр: уахьчІва аквТІурба йгІашТырныс йахамдзаскІва, уара хын йухІвуштІ Сара сумдыруата. 35 Йгьи йрайхІвтІ ауат: Сара швансцти швара хъантадъа, багІвчадъа, амгІадъа, кІара швазыбжазма? Ауат йырхІватІ: закІгьи. 36 Йаргьи йрайхІвтІ ауат: ауаса ужвы, хъанта зму, йнайахвыргІатІ; йарауаса багІвчагьи; йзымамгьи, йчгІвыча йтирагІатІта йгьи йхвгІарагІатІ шІахІвапс; 37 ауаса йшвасхІвитІ швара: йатахъпІ, йыншарныс Сара спны, ари АгІвыра ажва: «Йгьи дрылапхъадзапІ Анчва йщаквыргылраква йахъыпаз». Ауаса Сара сыхъаз йхІвугьи, ацІыхъва йазцитІ. 38 Даргьи йырхІватІ: ХІыхвитыгІв, абар араъа гІвшІахІвапскІ. Йаргьи йрайхІвтІ ауат: йнахъапІ.

39 Йгьи дангІаджвылцІ, дцатІ, йанакІвызлакІгьи йшичпуз апшта, Елион – хІва йызпхъауа *ахва* апны; апхъагІвчвагьи Ауи йцІыхъва йтагылтІ. 40 Йъацушызгьи йаннадза, Ауи йрайхІвтІ ауат: Анчва швйыхІва, архъвыхра швшаламшвуш апш. 41 Йаргьи йауцту ахІахъв акІашварта аъарала дгІаркъвыцІын; щамхъашагьи дгылын, дныхІвун, 42 йхІвауа: Саба, утахъыра йа-лазтын, Сара йсыгІвга ари аквпІи; ауаса, Сара стахъыра гъакІвым, Уара утахъыра аъазтІ. 43 Йгьи дйызыгІаншатІ Ауи амальяикъ ажвгІвандла, дгІайрыбагъауа Ауи. 44 Агвъаджъра даналашва рыцІагьи мчыта Анчва дишІапхъадзун; йгьи йцатІ Ауи йпхдзы, ащацыра адгбыл йкІаквкІвауа апш. 45 Йгьи дгІагылын аныхІвара амщтахъ, йапхъагІвчва данрызгІай, йгІайаутІ ауат йычвата алахъ аквцІара йгІалырхын. 46 Йгьи йрайхІвтІ ауат: ачІвыйа швзычву? ШвгІагылта

швныхІва, архъвыхра швшаламшвуш апш. 47 Ауи ауатква шрайхІвыркІвуз, абар угІажв-пІаракІ гІаншатІ, ауат рапхъа дгыла дгІайуан Иуда — хІва йзпхъуз, ажвыгІвыгІв рыуа азаджв. Йгъи дизыгІаскІятІ ауи Иисус, тшйыкІвйыр-шарныс Ауи. 48 Иисусгъи йайхІвтІ ауи: Иуда, тшкІвыршаралума агІвычІвгІвыспа йызхъацІара злапутшуа? 49 Ауи йыцыгІвчва, йанырба йгІаншупш, йырхІватІ: ХІыхвитыгІв, ашІахІвапсква хІырхвитырма? 50 Рыуа азаджвгъи дйыстІ апщагІвахъада йлыг йгъи йгІашІнайыргатІ ауи йагъмалымхІа. 51 Иисусгъи йхІватІ йджъауапхауа: йныжвыжь, йнахъап! ЙлымхІагъи дахъысын, дйырбзихатІ алыг. 52 Йгъи йрайхІвтІ Иисус йгІайыз Ауи йыхъаз апщагІвхъадачви, аныхІварта ачІапщагІвчва рнапІыцІагІвчви, ахІбауасаражвкви: ахІаджърат йшйызцауа апш, ашІахІвапскви ачІвгІванкви швыма швгІайтІ швара? 53 Ансимшгъи сшвыцаъан Сара АныхІварта, шваргъи Сара швнапІква гъсыквцтІышвымхтІ; ауаса ари асахІат — швара йшвшІыпІ, алащцарагъи йахъгалрапІ.

54 Ауи днарахвын, ддырцан йгъи днардылтІ апщагІвхъада йтдзы. Петргъи хъарачІвыла дрыщтацун. 55 АпщцІа агвбырггъи мца ацІархъыйта йанадзхъачІва, Петргъи зымгІва дрылачІватІ. 56 ПхІвысгІвнагІвыкІ ауи данылба амца дадзхъачІвата, бзи-бзи днайпшын, йылхІватІ: арыгъи дйыцын Ауи. 57 Ауаса ауи Иисус дырхъарауа йхІватІ: апхІвыс, сара дгъсыздырам Ауи. 58 Щарда йнамихуата датшазаджвы, ауи дибан, йхІватІ: уаргъи ауат урыуапІ. Ауаса Петр йхІватІ: агІвычІвгІвыс, сара ауат сгърыуам. 59 СахІаткІ

аъара анцы, датшазаджвгы далагатI йрыба-
гъята йхIвауа: мцы гьалам, арыгы Ауи дйы-
цын; йгы дгалъильейыгIвпI ауи. 60 Ауаса Петр
йхIватI: агIвычIвгIвыс, сара йгъсыздырам, уара
узылачважвауа. Йарауи асахIатггы, ауи дчва-
жваркIвауата, аквIтурба гIашIтытI. 61 Йгы
дгIацапшын, XIыхвитыгIв Петр дгIайпшытI.
Йгы йгIайгвалашвахтI Петр XIыхвитыгIв
йажва, Ауи йшгIайайхIвыз апш: уахъчIва, акв-
турба гIашIымтыскIва, уара хын Сара суымды-
руата йыухIвуштI. 62 Йгы дгIатшкIарыцIын,
йхъыйцIан дчIвыуа далагатI.

63 АугIагы, Иисус дызхчуз, джъабагIа йдыр-
бун йгы йысуан Ауи; 64 йшIахъагы хъыргIван
Ауи, йцIгIун: афигIамбар, дгIахIахIвстI Уара
йуысыз? 65 Датша ажвайшашардагы йархIвуан
Ауи йзынархата.

66 Амш ангIаталгы, тшазыркIын аугIа
рахIбачва райкъангъашра: апщагIвхъадачви
ахъабзарыпхъагIвчви; йгы дгIарддтI Ауи рай-
къангъашайззара апны. 67 Йгы йырхIватI: Уара
Анчва ЙгIащтийыгIв уакIвызтын, йгIахIахIв
хIара. Йаргы йрайхIвтI ауат: Сара йшвасхIвыр-
квын швара, йгъхъашвцIушым; 68 сшвцIгIа-
рыгы, швара джъауап гьгIашвтуашым. 69 Ужвы
йнанаркIыта АгIвычIвгIвыспа дчIвуштI ЗымгIва
зылшауа йагъманашы ахъыла. 70 Йгы йыр-
хIватI зымгIва: ауи акIвпIта, Уара – Анчва Йпа
уакIвма? Йаргы ауат йрайхIвтI: швара йшв-
хIвитI, Сара сакIвта. 71 Даргы йырхIватI: хIара
йхIтахъыйа датша шахIатта? Ауаса хIара йгIгIатI
Йара йшIала йхIваз.

ЙгІважвихпахауа ахъа

1 Йгъи йгІагылын ауат райззара зымгІва, йгъи ддырцатІ Ауи Пилат йпны; 2 йгъи ддыркъванчауа йалагатІ Ауи, йырхІвауа: хІара йгІахІаутІ, Ари АгІвчІвгІвыс хІыугІа шыгІвхъидауа: йгъиырхвитуам акесарь къвады йзыртирныс йгъи Анчва ЙгІацтийыгІв ПаштахІта тшипхъадзитІ. 3 Пилат дицІгатІ Ауи: Уара Аджъутква УырпаштахІума? Йаргъи йайхІвтІ ауи йджъауапхауа: уара йыухІвитІ. 4 Пилатгъи йрайхІвтІ апцагІвахІбачви йгъи аугІакви: сара йгъгІасауам къванчагІаракІгъи Ари АгІвычІвгІвыс йпны. 5 Ауаса ауат йырхІваз йахвынгылан, йырхІвауа, Ауи аугІа мгІвахъидауата, йайрыпхъауа Иудейшта зымгІва апны, Гальильейа угІалагата араъадза. 6 Пилатгъи, йанигІа, дазцІгатІ: Ари АгІвычІвгІвыс ДгальильейгІвума? 7 Йанидыр амцтахъгъи, Ауи Ирод йшІнахъа дшауаз, дицтитІ Ауи Ирод йпны, ауат амшква Иерусалим йаъаз. 8 Иродгъи, Иисус даниба, швабыжта дгвыргъьатІ, ауаса шарда цІуата дибара йтахъын Ауи, йауа ухІварыквын Ауи йыхъаз йгІахъан; йгъи дгвыгъун ауи йбарныс Иисус йахъыла дыргакІ. 9 Йгъи дицІгІун Ауи азцІгІара шардала. Ауаса Ауи закІгъи йгъгІайыйымттІ ауи джъауапта. 10 Йгъи йгылан апцагІвахІбачви йгъи ахъабзарыпхъагІвчви, йашІамсуата ддыркъванчауа Ауи. 11 Иродгъи йырыгІвчва йыцта, йчва дтайхын Ауи йгъи дйылахъвмарын, чІара-чІатагъи дигІвычан Пилат дизицтихтІ. 12 Йгъи йагІвзачвахатІ ауи амш уалагата Ироди Пилати, ауаса ауи апхъала ауат агъара рызбжъан.

13 Пилатгъи, апщагІвахІбачва, айкъангъаш-
 ра алагІвчва йгъи аугІа азиддан, 14 йрайхІвтІ
 ауат: швара дсызгІажвдтІ Ари АгІвычІвгІыс,
 аугІа мгІвхъидауата швхІван; йгъи абар сара,
 алыхрауыс акІвсыршан швара швшахІатта, йгъи
 йгъгІасмаутІ Ари АгІвычІвгІыс йхъкъъачІвыла
 ркъванчаракІгъи, швара къванчагІата йызшвыр-
 гылуаз Ауи. 15 Ауаса йгъимаутІ Иродгъи, йауа
 ухІварыквын ауи дхІзагІайщтихтІ Ауи хІара
 хІпны. Йгъи абар, закІгъи апсра йквнауыргуш-
 та Ауи гъйымчпатІ. 16 Ауи акІвпІта, йчва
 дтасхыпІта Ауи, даусцтхпІ. 17 Йаргъи, апас-
 хамш, атутанакътара йтакІу рыуа заджвы дыр-
 зауицтра атахъын. 18 Ауаса дара аугІажвпІара
 йацшІакІта йцІыруа йалагатІ: апсра данырІа
 Ауи, Варавва дхІызгІауцтІ хІара. 19 Варавва-
 хауа, акъала апны йгІащтІихыз акъазауатри
 агІвщри рыхъаз атутанакътара дтарышвын.
 20 Пилат йатаркІвах тшатарзынайырхахтІ дре-
 убжъауа, Иисус дйырхвитра йтахъыта. 21 Дар-
 гъи цІыруан: аджъуар дыквыркІ, дщы Ауи!
 22 Йаргъи йхынхауа йрайхІвтІ ауат: йамгІан-
 чвгъарайа йчпаз Ауи? КъванчагІакІгъи, апсра
 йквнауыргвушта, сара йгъгІасмаутІ Ауи йпны;
 ауи акІвпІта, йчва дтаспкъапІта Ауи, дсыр-
 хвитхпІ. 23 Ауаса ауат йырхІваз йахвынгылан
 быжъдула йцІыруа, Ауи аджъуар дшаквйыр-
 кІуаш, дшыйщуаш. РцІырбыжъгъи ауат рыцІа-
 рыцІа йдухун. 24 Пилатгъи йщаквйыргылтІ
 йакІвйыршарныс ауат ртахъыра: 25 дйырхвиттІ
 атутанакътара йтарышвыз акъазауатри агІвщри
 рыхъаз, йырзауицтра ртахъыз, Иисусгъи дана-
 пІыцІайцІатІ ауат ртахъыра.

26 Йгъи данджвыквырда ауат Ауи, Симон-хIва заджвы Киренейа йауаз дгIаркIын, аджъуар йыквырцIатI, Иисус йцIыхъва дтагыла йшигуш апш. 27 Йгъи йцун Ауи йцIыхъва йтагыла угIащарда йгъи апхIвысква, згвытшпква йрысуаз йгъи йчIвыуаз Ауи йыхъаз. 28 Йгъи тшырзгIацайырпан ауат, Иисус йхIватI: Иерусалим апхIчваква, швымчIвыуын Сара сыхъаз; ауаса швхъакви швсабикви рыхъаз швчIвыу, 29 ауаса абар йгIайитI амшква, йанырхIвуш: «насып ду рымапI амхъаква – мгва зынгъи саби дынкъв-зымгаз, гвпгъи зынгъи йызмырчаз!» 30 Ауи агIан йалагуштI абхъвква йрархIвуа: «швгIа-хIыквгIвыр!» йгъи атобаква: «хIхъыжвгIва!» 31 Ауаса йыудзышвахаз ацIла ауи аназырхауа, йгIваз йазниуашйа? 32 Йдырцун гIвгIвычвгъа-хагIвыкIгъи йырщырныс Ауи йыцта.

33 Йгъи йангIай, ХъабыгIв – хIва йзпхъуз ахва апны, ауаъа аджъуар дыквдыркIтI Ауи йгъи ачвгъахагIвчва: азаджв агъьмала, аджвгъи – ар-мала. 34 Иисусгъи йхIвун: Саба, йырзыргIва ауат, ауаса йгъырдырам ауат йырчпауа. Йгъи йагIвыршвун Ауи йчгIвычаква, чIвы дрышвауа. 35 Йгъи йгылан аугIа йгъи йпшвуан. Лакъырды дырчпун анапIыцIагIвчвагъи, йырхIвауа: анахъанат йгIайхчун, ужвы йгIайхчарагIатI Йара йхъа, Ауи Анчва ЙгIацтийыгIв, ЙалкIгIагIв йакIвызтын. 36 Рычвгъара йтшпнырхIватI Ауи аргIвчвагъи, йыцхъагылуа, дзыуау йзрауа Ауи 37 игъи йырхIвауа: Уара Аджъутква УырпаштахIызтын, Ухъа Уара йгIахча. 38 Йаъан Ауи йхъахъла, джъут, рым, грек ажвала йгIвыта ари апш гIвыра: Ари — Аджъутква ДырпаштахIпI. 39

АчвгъахагІвчва йкІныхІаз рыуа азаджвгъи дйыр-
джьун Ауи: Уара Анчва ЙгІацтийыгІв [Мессийа]
гъуакІвымма щта? ЙгІахча Уара Ухъагъи,
хІаргъи. 40 Анахъаныгъи, дщаквикІуа, йайхІвтІ
ауи йджъауапхауа: угъичвымшвума Анчва, йара
ауи гъакІвымма уаргъи йуыквху? 41 Ауаса хІара
тамамта хІуысква йырквнагуз хІаухитІ. Ауаса
ауи гвымхаракІгъи гъйымчпатІ. 42 Йгъи йхІвун
ауи: Иисус, сгІауыргваларшвах сара, ПаштахІта
уангІайхуаш Уара. 43 Йгъи йайхІвтІ ауи Иисус:
Тамамта йуасхІвитІ уара: йарауахъчІва усы-
цызлуштІ Сара аджъанат апны.

44 Йгъи йнадзахъан асахІат ацба, адгъыл
зымгІва апны хсахІаткІла йангІалаццараха, 45
амара йъахъгІвахаз ахъаз. Йгъи йагІвжвахатІ
аныхІварта апрапса гІвбата. 46 Йгъи дцІрын
быжьдула, Иисус йхІватІ: Саба, Уара унапІква
йнарыцІасцІитІ Сара сдыхв. Ауат ажваква йрыц-
цауата йдыхв йылцІтІ. 47 Ацентурион йгІаншаз
аниба, Анчва дйыртшхъвун, йхІвауа: цІабыр-
гыпІ, ари агІвычІвгІвыс дыгъкъванчамызтІ. 48
АугІа зымгІвагъи, апстыхра пшыртата йрчпауа
йгІайыззас, йгІаншаз анырба, йгІахъынхІвыхтІ
ргвтшпква йрысуа. 49 Йгылан йхъарамкІва Ауи
дыздыруаз зымгІвагъи, апхІвысквагъи, Гальи-
льейа йгІатыцІта Ауи йцІыхъва йтагылата йгІа-
йыз, йырбатІ ауи.

50 Йгъи абар хъацІакІ, Иосиф – хІва йызхъ-
зыз, айкъангъашра алагІвкІ, хъацІа хІалъалькІ
йгъи рейшакІ – 51 ауи дгъазыразымызтІ ауат рщак-
квыргылри руыси, — Аримафейа йауаз, Йудейа
акъала. Ауи дазпшуан Анчва Йнурштара агІайра.
52 Пилат йпны дгІайын, ауи Иисус йхъвади

дахІватІ. 53 Йгѳи йгІакІнихын, ахъвади къасе акІвйыршан йгѳи дтайцІатІ Иисус анышвын-тара, абыхъв йгІатпкъгІаз апны, зынгѳи заджв-гѳи дъатарымцІасыз. 54 Амшгѳи хвашан, асаб-шагѳи гІаталуан. 55 АпхІвысква, Гальильейа йгІатыцІта Иисус йыцгІайыз, Иосиф йыщтацан, зымгІва рбатІ: анышвынтарагѳи, Ауи йхъвади штарцІазгѳи. 56 ЙангІахъынхІвыхгѳи, йдрыхІа-зыртІ ахъщфыгІвпшдзаква.

ЙгІважвищбахауа ахъа

1 Асабшамшгѳи ауат йыргатІ тшдыртынчуа, Анчва йщаквыргылра йшгІанахІвауа апш, ам-чбыжъ йапхъахауа амшгѳи, щымта щажъыта йазгІайтІ анышвынтара, ахъщфыгІвпшдзаква йдрыхІазырыз рымата. 2 Йгѳи йгІараутІ ауат ахІахъв апырхта анышынтара 3 йгѳи, йантал, йгѳгІармаутІ ХІыхвитыгІв Иисус йхъвади. 4 Йгѳи йаъан: ауат йгІаншаз ангІаргвнымгІвуаз, абар рпахъ йгІагылтІ гІвхъацІакІ рчгІвычаква ккІауа. 5 Ауат йаншва йгѳи ршІахъаква ачІвыла ахъы-ла йаннадыркъвуаз, ауахъауат арат йгІарархІвтІ: ачІвыйа швара швзизыпшшгІауа абза апсчва рпны? 6 Ауи дгъаъам араъа, Ауи дгІабзагылхтІ. ЙгІашвшвыргвалашвах, Ауи йшгІашвайхІвыз швара, Гальильейа даъаркІвата, 7 АгІвычІв-гІвыспа дйылачважвауата, агванахІрхІагІвчва рнапкѳва дрыцІацІара шатахъу Ауи, аджьюаргѳи дшыквыркІхуш – дшщхуш, йхымшкІхауагѳи дшгІабзагылхуаш. 8 Йгѳи йгІаргвалашвахтІ ауат Ауи йажваква 9 йгѳи, йгІахъынхІвыхын аны-

швынтара, йрархІвТІ йгІаншаз зымгІва ажви-
зыгІвгьи, анахъанат зымгІвагьи. 10 ЙракІвын
ауат Магдалина Марийа йгьи Иоанна йгьи Ма-
рийа Йаков йпхІа. Ауат йрыцызгьи йрархІвуан
апостолква йарауи. 11 Йгьи йырбатІ ауат ра-
жваква гІахъвыцрата, йгьи йгърызхъарымцІузтІ
ауат апхІысква. 12 Ауаса Петр, дгІагылын, аны-
швынтара дазыгІвТІ йгьи, тшынайыркъвын,
йбатІ акъасейгІвацаква. Йгьи дцахтІ ауи йпны,
йгІаншаз джъайщауа.

13 Йгьи абар, ауат рыуа гІвыджъ йарауи
атшын йцун акыт, Иерусалим йачвыхъарамыз,
Эммаус – хІва йызпхъуз. 14 Йгьи йалачважвун
ауат ари йакІвшаз агІаншараква. 15 Йгьи йаъ-
ан: ауат йанайчважвуз йгьи йаназхъыцуаз, Йара
Иисус, тшырзыгІайраргванын, дрыцымгІвайстІ;
16 ауаса ауат рылаква хъгІвахан, Ауи дгъырзым-
дырхтІ. 17 Йаргьи йрайхІвТІ ауат: ачІвыйа шва-
ра, швымгІвайсуа швзылачважвауа? Даргьи гІа-
шІастІ рылахъква аквыта. 18 Рыуа азаджвгьи,
Клеопа – хІва зыхъзыз, йайхІвТІ Ауи йджъауап-
хауа: Уара азаджв уакІвпІ Иерусалим апны
йгІаншаз зымдыруа ари амшква? 19 Йгьи
йрайхІвТІ ауат: ачІвыйа? Даргьи йархІвТІ Ауи:
Иисус НазарйаныгІв йызнийыз, ЙфигІамбарыз,
йымчыз уыслагьи ажвалагьи Анчвагьи аугІагьи
рпахъ; 20 рйызцІабыргра шпыртшыз, хІпща-
гІвахІбачви хІнапІыцІагІвчви апсра дартра
ртахъыта йгьи аджъуар даквдыркІтІ Ауи. 21
ХІаргьи хІйайгвгъун, Ауи Мессия йакІвта, Из-
раиль гІазырхвитра атахъу. Ауаса хымшкІта
йцІитІ ауи гІаншицтара. 22 Ауаса хІпхІвысква
рыуа азджъакІгьи йджъахІдырщатІ: щымта ща-

жъыта анышвынтара йазгІайта, 23 йгъи йаныр-
мау Ауи йхъвади, ауат йгІайхтІ йырхІвауа, йыр-
бата амальяикъква ргІаншара йгъи йшгІарар-
хІвыз ауат Ауи дбзата. 24 Йгъи йцатІ хІуа
азджъакІ анышвынтара апны йгъи йгІараутІ,
апхІвысква йшырхІваз апшта, ауаса Йара
дгърымбатІ. 25 Йаргъи йрайхІвтІ ауат: швара
гвзазаква йгъи амгІаны ззагІамкІуа, йазхъашв-
цІаныс зымгІва, афигІамбарква йырхІваз! 26 Ауи
гъакІвмызма щта дгІазыцІсра атахъыз Мессия
йыртшхъвара далалра апхъала? 27 Моисей йпын-
гъи угІалагата, афигІамбарква зымгІва рпны-
дза, йгІаргвынйыргІвытІ АгІвыраква зымгІва
рпны, Йара йзынарху. 28 Йгъи йазаргванхатІ
ауат акыт йъацуз; Йаргъи дагІвста дцушызшва
тшазичпатІ. 29 Ауаса ауат дгІашІаркІуан Ауи,
йырхІвауа: хІара ухІыцгІанха, йауа ухІвузтын,
йгІалащцарахитІ, амшгъи хъвжвыкІытІ. Йар-
гъи дталын, ауат дрыцгІанхатІ. 30 Йгъи йаъан,
Ауи ауат айшва данрыцадзхъачІва, ачІахъва
гІайахвын, Анчва дйызхІвахІвын, йакъвитшын,
ауат йритуан. 31 Йгъи тшгІахъыртІытІ ауат ры-
лаква, йгъи дгІардырхтІ ауат Ауи, Йаргъи дыр-
зымбауата дцатІ. 32 Йгъи йабархІвтІ ауат: йгъым-
былуазма хІгІвква хІара, Ауи амгІва апны йан-
гІахІайхІвуаз, Ауи АгІвыра анхІзагІахъитІуаз?
33 Йара ауи асахІатгъи йгІагылын, ауат Иеруса-
лим йхъынхІвыхтІ йгъи йгІараутІ йацыта
ажвизыгІв йгъи йрыцыз, 34 йызхІвузгъи, ХІы-
хвитыгІв, цІабыргыта дгІабзагылхта, Симонгъи
дизагІаншата. 35 Даргъи йрархІвтІ амгІва йаны-
квыз йыншаз, Ауи дшырдырхызгъи ачІахъва
анакъвитшуаз.

36 Ауат ауи йаналачважвуз, Иисус Йара дГІагылтІ ауат ргвтабырг, йгъи йрайхІвтІ ауат: амамыр швымазтІ. 37 Даргъи йашІпссГІатІ, ашварагъи йакІын дыхвкІ дырбауадзырщун. 38 Йаргъи йрайхІвтІ ауат: ачІвыйа швара швызшваз, швыгвквагъи йызшврыгІвбауа? 39 ШвГІарпшы Сара снапІквагъи, сщапІквагъи: ари Сара СакІвпІ; бзи-бзи швГІаспшы йгъи швГІасхъыс Сара: дыхв чви бГІви гъамам, Сара спны йшыжвбауа апш. 40 Ауыгъи йхІван, Иисус йдйырбатІ ауат йнапІквагъи, йщапІквагъи. 41 Ауат агвыргъара йГІалырхта йаназхъарымцІаркІвуз йгъи йанджъарщуз, Ауи йрайхІвтІ ауат: швара араъа рызкъы кІара швымма? 42 Даргъи йзаГІадраутІ Ауи пслачварыдз тшыткІ, ачваба йтата цхагъи. 43 Йаргъи йнайахвын дара йшырбуз йфатІ.

44 Йгъи йрайхІвтІ ауат: абар Сара сажваква, Сара йшвасхІвуаз швара, саншвыцыркІваз, йшатахъу йыншарныс зымГІва, йГІву Моисей Анчва йГІайыйтыз йщаквыргылраква, йгъи АфиГІамбарква йгъи Анчва йуарадква рпны Сара сыхъаз. 45 Ауи асхъан Иисус йырзыхъитІтІ ауат ракъыль АГІвыраква йшГІаргвынгІвуаш апш. 46 Йгъи йрайхІвтІ ауат: ауаса йГІвыпІ, Мессия ГІазабчакъра дшГІацІсуаш, йхымшкІхауагъи дшГІабзагылхуаш, 47 йгъи йшдыргІахуш Ауи йхІыызла агІахъынхІвыхра йгъи агваныхІква арзыргІвара аугІахъаква зымГІва рпны, Иерусалим апны угІалагата. 48 Швара швазшахІатпІ ауи. 49 Йгъи абар, Сара йшвзынасщитІтІ швыззйыргвыгъаз Сара Саба. Шваргъи швГІанха ари акъала апны, гІарщла йшвызгІайуаш къарула швГІарымчнацІыкІа.

50 Йгы йґІатидатІ ауат акъала Вифанийа-
дза, йнапІквагы щтІихын, дрыквхІвахІвтІ ауат.
51 Йгы йаъан: ауат данрыквхІвахІвуаз, Ауи ауат
дґІаркъвыщын ажвґІвандла дщтІыщІуа далагатІ.
52 Даргы, квырмыш йзырчпан Ауи, Иерусалим
йґІахъынхІвыхтІ гвыргъара ду рыма, 53 йгы
йаъан йанакІвызлакІгы аныхІварта, Анчва йыз-
хІвахІвуа.

Аминь.

**АНЧВА ЙГІАХЧАХРА
АЖВАБЫЖЬБЗИ**

Подписано в печать 26.12.12. Формат 84x108^{1/32}.
Бумага офсетная. Гарнитура «SchoolBookСТТ».
Печать офсетная. Усл. печ. л. 3,8.
Тираж 500 экз. Заказ № 975.

Отпечатано с готового оригинал-макета
в ООО «Полиграфист-2».
369000, г. Черкесск, ул. Первомайская, 47.



